

BUKU TEKS KELAS PENGAJIAN ISLAM PERKIM

SIRAH TAHAP LANJUTAN



PERTUBUHAN KEBAJIKAN ISLAM MALAYSIA (PERKIM)

Edisi Pertama

BUKU TEKS KELAS PENGAJIAN ISLAM PERKIM

SIRAH TAHAP LANJUTAN



PERTUBUHAN KEBAJIKAN ISLAM MALAYSIA (PERKIM)

Edisi Pertama

Cetakan Pertama, 2021
©Pertubuhan Kebajikan Islam Malaysia, 2021

Hak cipta terpelihara. Setiap bahagian daripada terbitan ini tidak boleh diterbitkan semula, disimpan untuk pengeluaran atau dipindah kepada bentuk lain sama ada dalam bentuk termasuk elektronik, mekanikal, gambar, fotokopi, rakaman atau lain-lain tanpa mendapat izin daripada Pertubuhan Kebajikan Islam Malaysia (PERKIM) terlebih dahulu.

Perpustakaan Negara Malaysia
Data Pengkatalogan-dalam-penerbitan

ISBN 978-967-25609-9-9

Prof. Madya Dr. Mohd Afandi Mat Rani,
Dr. Mohd Izzat Amsyar Mohd Arif, Dr. Faezy Adenan

1. Pengajian Untuk Mualaf
2. Pengajian Sirah Tahap Lanjutan- Religious Aspects-Islam I.Judul

Penerbit

Pertubuhan Kebajikan Islam Malaysia (PERKIM)
Ibu Pejabat PERKIM Kebangsaan
Tingkat 4 & 6, Bangunan PERKIM
150, Jalan Sultan Azlan Shah (Jalan Ipoh)
51200 Kuala Lumpur

Laman sesawang: www.perkim.net.my
Tel: 03-40412482/ 03-40426224
Faks: 03-40427403
Website: <https://perkim.net.my>
Emel: info@perkim.net.my

Pencetak

Sarjana Media Sdn. Bhd.
No.38, Jalan Usahawan 7 Off Jalan Kilang
Taman Sri Rampai,Wilayah Persekutuan
53300 Kuala Lumpur
Tel 03 41417424

EDITORIAL

Penasihat

Y.Bhg. Tan Sri Dr. Mohd Yusof Noor

Ketua Editor

Tuan Haji Mamat Che Chik

Penolong Ketua Editor

Dr. Suariza@Hidayah Muhammad

Editor

Encik Muhammad Farhan Tee Abdullah

Encik Muhammad Jais Mariappan Abdullah

Puan Siti Munirah Sayed Mohd Hamdan

Puan Nur Syahirah Musa

Encik Abdul Qawi Navine Abdullah

Encik Mohd Yusoff Ahmad

Encik Ghazali Ismail

Encik Mohamad Nizam Abd Razak

Cik Zaatil Hidaayah Ahmad Bustaman

Puan Wan Zubaidah Wan Yusoff

Puan Rukiah Sungip

Encik Zafri Ismaiskandar Abdul Ghani

Encik Sh Muhammad Amiruddin Sh Sulaiman

Haji Khalid Mohd Noor

Encik Syed Azman Syed Ariffin

Puan Siti Nasryah Rosli

Encik Muhammad Faiz Md Yusoff

Haji Mohd Subri Jaafar

Puan Rosnaliza Ahmadiah

Puan Aishah Abdul Wahab

Encik Mohd Jogi Panjaitan Maruli

Dr. Mohd Faisal Mohamed

Encik Abdul Ghani Abdullah

Encik Ali Abdullah @ Lee Kin Hong

Puan Nur Habeebah Muniandi

Sidang Editorial

Prof. Madya Dr. Razaleigh Muhamat @ Kawangit
Prof. Madya Dr. A'dawiyah Ismail
Prof. Madya Dr. Mohd Afandi Mat Rani
Prof. Madya Dr. Mariam Abd. Majid
Dr. Muhammad Yusuf Marlon Abdullah
Dr. Nor Raudah Hj. Siren
Dr. Muhammad Ayman al-Akiti
Dr. Aisyah Jami'an, S.Ag
Dr. Azri Bhari
Dr. Mohd Izzat Amsyar Mohd Arif
Dr. Amiratul Munirah Yahaya
Dr. Nur A'thiroh Masyaa'il Tan Abdullah @ Tan Ai Pao
Dr. Faezy Adenan
Encik Ahmad A'toa' Mokhtar
Encik Kamarulzaman Kawi

Urusetia

Encik Firdaus Lokman Tah
Encik Ahmad Hasaidi Said
Encik Muhammad Hizam Abdul Rahim
Cik Nur Shazleen R. Samsul Bahari
Cik Umi Musfirah Abdul Ghani

PENDAHULUAN

Buku Pengajian Sirah Tahap Lanjutan adalah sambungan bagi Pengajian Sirah Tahap Pertengahan yang memberikan pendedahan, pemahaman serta penjelasan dari segi aspek yang penting untuk memahami dan menghayati sirah Rasulullah SAW dan dijadikan sebagai panduan hidup.

Dijelaskan juga bagi tahap lanjutan ini sirah-sirah para sahabat yang ikhlas, jujur dan bersemangat dalam memperjuangkan Islam yang perlu dicontohi dan dijadikan teladan.

Oleh itu, buku ini diterbitkan kepada mualaf yang mahu mengenali dirinya sebagai hamba yang mengenali Allah SWT sebagai Penciptanya dan Nabi Muhammad SAW itu sebagai utusan-Nya.

KANDUNGAN

BAHAGIAN 1 - PEMBENTUKAN NEGARA ISLAM MADINAH

1. PEMBENTUKAN NEGARA ISLAM MADINAH	1
1.1 Kepimpinan Rasulullah SAW di Madinah	1
1.2 Pembinaan Masjid	2
1.3 Mempersaudarakan Golongan Muhajirin dan Ansar	5
1.4 Piagam Madinah	6
1.4.1 Faktor Pembentukan Piagam Madinah	7
1.4.2 Matlamat Piagam Madinah.....	8
1.4.3 Isi Kandungan Piagam Madinah	9
1.4.4 Prinsip-prinsip dalam Piagam Madinah.....	19
1.4.5 Kepentingan dan Kesan Piagam Madinah	20
1.5 Pelaksanaan Syura.....	22
1.6 Penyebaran Dakwah	26
1.7 Kesimpulan	27

BAHAGIAN 2 - KISAH PARA SAHABAT

2. KISAH PARA SAHABAT	28
2.1 Pendahuluan.....	28
2.1.1 Kisah Hidup Bilal Bin Rabah RA	28
2.1.2 Kisah Hidup Ammar Bin Yasir RA	31
2.1.3 Kisah Hidup Sumayyah Binti Khabbat RA.....	35
2.2 Kisah Sepuluh Sahabat Dijamin Syurga.....	38
2.2.1 Kisah Talhah Bin Ubaidullah RA	41
2.2.2 Kisah Zubair Bin Al-'Awwam RA	44
2.2.3 Kisah Sa'ad Bin Abi Waqqas RA.....	48
2.2.4 Kisah Abdul Rahman Bin 'Auf RA	50
2.2.5 Kisah Sa'id Bin Zaid RA	53
2.2.6 Kisah Abu Ubaidah Bin Al-Jarrah RA.....	55

BAHAGIAN 3 - PEPERANGAN DALAM ISLAM

3. PEPERANGAN DALAM ISLAM	59
3.1 Perang Badar.....	61
3.2 Perang Uhud.....	70
3.3 Perang Khandaq.....	76
3.4 Tentera Gabungan.....	78

3.4.1	Pertahanan Muslim.....	79
3.4.2	Pengepungan Madinah	81
3.4.3	Gerak Balas Muslim	84
3.4.4	Keruntuhan Gabungan	86
BAHAGIAN 4 - SEMANGAT JIHAD DALAM KEHIDUPAN		
4.	SEMANGAT JIHAD DALAM KEHIDUPAN	95
4.1	Konsep Jihad dalam Islam.....	95
4.2	Empat Keutamaan Berjihad.....	96
4.2.1	Jihad di dalam Mencari Petunjuk dan Kebenaran Agama	97
4.2.2	Berjihad Untuk Tunduk dan Beramal	97
4.2.3	Berjihad Menyebarluaskan Dakwah	98
4.2.4	Berjihad Menghadapi Kesukaran Dakwah dan Rintangan oleh Musuh.....	100
4.3	Salah Faham Terhadap Jihad	101
4.4	Peringkat-peringkat Jihad	103
4.4.1	Jihad Melawan Nafsu	104
4.4.2	Jihad Melawan Syaitan.....	105
4.4.3	Jihad Melawan Bid'ah dan Penyelewengan Intelektual	105
4.4.4	Jihad Melawan Musuh yang Jelas	107
BAHAGIAN 5 - KEWAFAKATAN NABI MUHAMMAD SAW		
5.	KEWAFAKATAN NABI MUHAMMAD SAW.....	108
5.1	Peristiwa Haji Wada.....	108
5.2	Peristiwa Kewafatan Nabi Muhammad SAW	111
BAHAGIAN 6 - KEPIMPINAN KHULAFYA AR-RASYIDIN		
6.	KEPIMPINAN KHULAFYA AR-RASYIDIN.....	115
6.1	Sayidina Abu Bakar al-Siddiq RA	116
6.1.1	Peristiwa Hijrah ke Madinah	117
6.1.2	Menyertai Perang Bersama Nabi Muhammad SAW.....	118
6.1.3	Sikap Dermawan	118
6.1.4	Calon Pengganti Rasulullah SAW	120
6.1.5	Keberanian Sayidina Abu Bakar As-Siddiq RA.....	121
6.1.6	Sayidina Abu Bakar As-Siddiq RA Khalifah Pertama	122
6.2	Sayidina Umar al-Khattab RA.....	124

6.2.1	Sayidina Umar Al-Khattab RA Memeluk Islam.....	126
6.2.2	Peribadi Sayidina Umar al-Khattab RA	127
6.2.3	Pelantikan Sayidina Umar Al-Khattab RA Sebagai Khalifah.....	128
6.3	Sayidina Uthman Bin Affan RA.....	129
6.3.1	Kepimpinan dan Sejarah Pentadbiran.....	131
6.3.2	Pembukuan Al-Quran	131
6.3.3	Pembesaran Masjid Nabawi.....	132
6.4	Sayidina Ali Bin Abi Talib RA.....	133
6.4.1	Latar Belakang Sayidina Ali RA	135
6.4.2	Kebijaksanaan Sayidina Ali RA	136
6.4.3	Perkembangan di Darul al-Arqam	137
6.4.4	Tugasan Penting Sayidina Ali RA.....	137
6.4.5	Peristiwa Hijrah Sayidina Ali RA.....	138
6.4.6	Hijrah Sayidina Ali RA Ke Madinah	139
6.4.7	Menyertai Peperangan	140
6.4.8	Perkahwinan Sayidina Ali RA dengan Fatimah RA...141	
6.4.9	Pelantikan Sayidina Ali RA Sebagai Khalifah.....	142
6.5	Pengajaran daripada Perjuangan Para Sahabat.....	143
7.	BAHAGIAN 7 - PENUTUP	
7.	PENUTUP.....	145

BAHAGIAN 1

PEMBENTUKAN NEGARA ISLAM

MADINAH

1. PEMBENTUKAN NEGARA ISLAM MADINAH

Kepimpinan Islam telah tertegak di Madinah semasa di bawah pemerintahan Nabi Muhammad SAW di mana Baginda SAW telah membentuk sebuah negara Islam yang berteraskan perlembagaannya kepada perintah Allah SWT. Baginda SAW telah menyusun masyarakat berdasarkan siasah Islamiah dalam urusan keduniaan dan keagamaan yang meletakkan segala asas hukum syarak sehingga tiada satupun yang ditinggalkan oleh Baginda SAW. Antara tugas Baginda SAW di Madinah dalam membentuk masyarakat Islam ialah mengatur sistem pertahanan negara, menjaga keselamatan umat di samping melengkapkan struktur pentadbiran negara agar dapat menjalankan urusan negara dengan adil, menyebarkan dakwah Islamiah secara lebih meluas, mengikat beberapa perjanjian dan menghantar duta-duta negara ke negara jiran. Semuanya ini diuruskan oleh Baginda SAW selaku Ketua Negara, malah di waktu yang sama Baginda SAW juga sebagai utusan Allah SWT. Bagi mencapai matlamat pembentukan masyarakat Madinah di bawah kepimpinan Islam, Baginda SAW telah mengambil beberapa langkah utama dalam meletakkan Madinah sebagai sebuah negara yang terkenal dengan pentadbiran yang bersistematis.

1.1 Kepimpinan Rasulullah SAW di Madinah

Kepimpinan Islam telah tertegak di Madinah semasa di bawah pemerintahan Nabi Muhammad SAW. Baginda SAW telah membentuk sebuah negara Islam berteraskan perlembagaan yang mengikut perintah Allah SWT. Penduduk Madinah terdiri daripada masyarakat majmuk pelbagai kaum. Antara suku-suku kaum yang popular termasuklah suku Aus dan Khazraj yang majoritinya menganut agama Islam di bawah kepimpinan

Baginda SAW. Kemudian sebahagiannya adalah daripada suku Bani Quraizah, Bani Nadir dan Bani Qainuqa yang menganut agama Yahudi dan Kristian.

Penghijrahan Rasulullah SAW ke Madinah telah membuka lembaran baru kepada masyarakat Madinah yang sebelumnya mereka saling bergaduh serta bermusuhan. Baginda SAW telah menyusun dan menstruktur semula masyarakat yang terdiri daripada kaum Muhajirin, kaum Ansar dan kaum Yahudi berdasarkan Piagam Madinah yang bertujuan mengurus dan membina hubungan kerjasama dalam masyarakat majmuk. Di bawah pemerintahan Baginda SAW di Madinah, Rasulullah SAW telah mengatur sistem pertahanan negara untuk menjaga keselamatan penduduk Madinah, memperkemas struktur pentadbiran negara agar dapat menjalankan keadilan, menyebarkan dakwah Islamiah secara lebih meluas dan mengadakan perjanjian-perjanjian di samping mengutus duta-duta ke negara jiran untuk menjalinkan hubungan kerjasama yang baik.

1.2 Pembinaan Masjid

Dalam mentadbir kerajaan Islam Madinah, Rasulullah SAW menempuh suatu perjalanan yang amat berat ketika Baginda SAW berada di Mekah hingga ke Madinah iaitu sebuah bandar yang dipelopori oleh beberapa kaum. Terdapat banyak kebijaksanaan yang dilakukan oleh Rasulullah SAW sebaik sahaja tiba di Madinah. Inisiatif terawal yang dilakukan oleh Rasulullah SAW sebaik sahaja tiba di Madinah dalam hijrah agung ialah mengasaskan masjid. Sebagai pemimpin berpandangan jauh dan mempunyai komitmen penuh dalam mengerakkan kesedaran Islam, pembinaan masjid dilihat sebagai agenda yang sangat penting dalam merangka pembangunan dunia ini mahupun ukhrawi. Sehubungan dengan itu, langkah terawal dilakukan Rasulullah SAW sebaik sahaja tiba di Madinah ialah mendirikan masjid.



Gambar 1: Masjid Quba di Madinah yang Terkini

Masjid Quba merupakan masjid pertama yang dibina oleh Rasulullah SAW sebaik sahaja Baginda SAW tiba di Madinah dan ia merupakan langkah pentadbiran yang cukup strategik dan bijak. Hal ini demikian kerana Rasulullah SAW mengetahui melalui institusi ini seluruh tenaga, fikiran dan emosi masyarakat Islam dapat disatukan dan digerakkan untuk pembangunan masyarakat dan Islam. Malah ia juga merupakan langkah terbaik dalam mempertahankan kelangsungan pentadbiran umat Islam daripada terus ditindas dan diburu oleh golongan musyrik. Pembinaan masjid ini dari segi psikologinya telah memberikan satu keyakinan yang tinggi dalam kalangan orang Islam di Madinah. Di pihak yang lain pula, kaum musyrikin Mekah dan Madinah berasa tertekan dengan kebangkitan baru umat Islam yang digerakkan oleh institusi masjid. Kewujudan masjid ini secara psikologinya merupakan kemenangan awal umat Islam dari segi moral dan siasah.

Berikut adalah peranan masjid pada zaman Rasulullah SAW, antaranya:

- 1) **Pusat ibadah:** Solat berjemaah dilakukan di masjid. Begitu juga khutbah Jumaat yang setiap minggu dilaksanakan di

masjid. Rasulullah SAW sendiri menyampaikan khutbah dan mengimamkan solat di masjid.

- 2) **Pusat dakwah:** Masjid telah menjadi tempat menyampaikan mesej dan ajaran Islam. Ia juga berperanan sebagai pusat latihan pendakwah. Strategi-strategi dakwah juga dirangka di masjid.
- 3) **Pusat strategi ketenteraan:** Masjid berfungsi untuk melatih dan memberi galakan kepada tentera untuk berjihad. Ketika hampir berlaku perperangan Badar, Rasulullah SAW telah mengumpul orang-orang Islam daripada kalangan Muhajirin dan Ansar di masjid sebagai persiapan untuk berjihad. Mereka diminta oleh Rasulullah SAW supaya mengemukakan pendapat berhubung dengan strategi menghadapi puak Quraisy yang dalam perjalanan pulang dari perdagangan di Syam.
- 4) **Institusi pendidikan:** Masjid telah diguna sepenuhnya sebagai pusat pendidikan. Proses pengajaran dan pembelajaran telah dilaksanakan secara intensif di masjid. Rasulullah SAW sendiri mengajar dan menyelia secara langsung aktiviti-aktiviti pengajaran di masjid.
- 5) **Fungsi sosial:** Sebagai tempat menawarkan perkhidmatan kebajikan seperti perlindungan kepada musafir, orang-orang yang berlindung daripada hujan, orang miskin yang tiada rumah dan juga anak yatim.
- 6) **Institusi Politik:** Selain berfungsi sebagai pusat ibadah, masjid juga telah melaksanakan kegiatan yang bersifat siasah. Rasulullah SAW dalam merealisasikan polisi siasahnya telah menerima utusan dari luar negara. Melalui institusi masjid juga Rasulullah SAW telah menghantar duta umat Islam kepada raja-raja di merata tempat di dunia. Delegasi luar juga datang ke masjid untuk menyatakan kesetiaan kepada kepimpinan Nabi Muhammad SAW.

1.3 Mempersaudarakan Golongan Muhibin dan Ansar

Umat Islam di Madinah terdiri daripada dua kelompok besar iaitu kaum Muhibin dan kaum Ansar. Kaum Muhibin adalah penduduk yang berasal dari Mekah, mereka datang bersama-sama dengan Nabi Muhammad SAW untuk berhijrah ke Madinah. Kaum Muhibin telah menjadi miskin dan mengalami kesusahan setelah berpindah ke Madinah. Mereka telah meninggalkan keluarga, kampung halaman serta harta benda mereka di Mekah semata-mata kerana mengikuti kehendak agama dan akidah. Berdasarkan situasi inilah Rasulullah SAW telah memulakan usahanya untuk merapatkan hubungan antara kaum Muhibin dan kaum Ansar yang merupakan penduduk asal Madinah.

Baginda SAW telah mempersaudarakan kedua-duanya bagi menjamin kekuatan umat Islam yang kukuh. Ini merupakan satu cara ke arah penyatuan barisan umat Islam dan untuk mengikis perasaan permusuhan yang selama ini bertapak di jiwa mereka kerana sebelum ini mereka (khususnya kaum Ansar) dihantui dengan pelbagai peristiwa peperangan sesama mereka. Sebagai langkah ke arah perpaduan ummah, Rasulullah SAW telah mempersaudarakan antara golongan Ansar dan Muhibin dengan ikatan Ukhwah Islamiah.

Kesannya Baginda SAW telah berjaya membentuk sebuah masyarakat Islam, di mana semua orang Islam bersaudara. Maka lahirlah perasaan muhibah, tolong-menolong di antara satu sama lain. Terbukti, masyarakat ketika itu hidup bersatu padu di bawah satu akidah dan di bawah slogan “semua umat Islam adalah bersaudara”. Sebagaimana Firman Allah SWT dalam Surah al-Hujurat (49) ayat 10:

إِنَّمَا الْمُؤْمِنُونَ إِخْرَوْهُ فَأَصْلِحُوْهُ بَيْنَ أَخْوَيْكُمْ وَاتَّقُوا
ۚ
اللَّهُ لَعَلَّكُمْ تُرْجَمُونَ

Maksudnya: Sebenarnya orang-orang yang beriman itu adalah bersaudara, maka damaikanlah di antara dua saudara kamu (yang bertelingkah) itu; dan bertaqwalah kepada Allah supaya kamu peroleh rahmat. (10)

1.4 Piagam Madinah

Rasulullah SAW merupakan pemimpin yang bijaksana. Baginda SAW telah membentuk Perlembagaan Madinah atau dikenali sebagai Piagam Madinah bagi mewujudkan keamanan dan keharmonian antara umat Islam dan kaum bukan Islam di Madinah. Melalui undang-undang tersebut, jaminan keadilan sosial masyarakat Madinah adalah lebih terbela dan risalah dakwah Islam makin tersebar kerana Islam itu adalah rahmat untuk semua.

Piagam atau *Sahifah* dalam konteks sejarah Islam zaman Nabi Muhammad SAW seperti yang disebut dalam kitab sirah al-Nabawiyah oleh Ibnu Hisham dan kitab sirah Rasulullah oleh Ibnu Ishaq adalah merujuk kepada dokumen, kanun atau perjanjian bertulis mengenai hak dan tanggungjawab pemerintah dan orang yang diperintah yang mana ia dibuat oleh Nabi Muhammad SAW sewaktu Baginda SAW berada di Kota Madinah. Perjanjian ini dibuat antara orang Islam (Muhajirin dan Ansar) dengan kaum Yahudi dan juga diantara umat Islam. Piagam Madinah ini merupakan satu dokumen politik yang mempersatukan komuniti-komuniti penduduk Madinah dalam kehidupan sosial politik bersama di bawah pimpinan Rasulullah SAW yang mana telah dimeterai pada tahun pertama hijrah ke Madinah.

Masyarakat Madinah secara keseluruhannya menerima baik Perlembagaan Madinah dan Baginda SAW mendapat sokongan daripada pelbagai kaum. Perlembagaan Madinah tersebut terdiri daripada 47 fasal iaitu 23 fasal berkaitan undang-undang terhadap umat Islam dan selebihnya 24 fasal untuk penduduk Madinah yang bukan beragama Islam yang terdiri daripada orang-orang Yahudi dan Kristian.

Secara umumnya perjanjian bertulis ini memberi kefahaman bahawa Islam mengajar umatnya supaya bergaul dengan melakukan keadilan walaupun dengan orang yang berlainan agama seperti yang dilakukan oleh Rasulullah SAW sendiri terhadap orang Yahudi. Umat Islam juga terjamin kedudukan mereka daripada segala pengkhianatan, serta penduduk Madinah sama-sama mempertahankan tanah air daripada sebarang pencerobohan.

Piagam ataupun *Sahifah* Madinah merupakan satu daripada tiga dasar penting yang telah dilaksanakan oleh Rasulullah SAW di Madinah dalam proses penyebaran dakwah dan pembangunan negara Islam iaitu selepas pembinaan masjid dan usaha-usaha dalam persaudaraan. *Sahifah* merupakan perlembagaan bertulis yang pertama yang pernah diwujudkan dalam sejarah dunia. Apabila diteliti tentang isi kandungannya, jelas menunjukkan bahawa Rasulullah SAW merupakan seorang tokoh pemimpin yang mempunyai pandangan politik yang jauh dan memiliki kebolehan meyakinkan pihak lain.

1.4.1 Faktor Pembentukan Piagam Madinah

Antara faktor pembentukan Piagam Madinah ialah:

- 1) Kota Madinah mempunyai banyak suku bangsa iaitu suku bangsa Yahudi dan suku bangsa Arab yang mempunyai banyak etnik yang sentiasa bertelingkah antara satu sama lain. Dengan terbentuknya piagam ini, ia dapat mengatur dan menyusun struktur masyarakat yang lebih bersepadan dan unggul serta dapat mengelakkan pergaduhan hasutan dan fitnah dalam kalangan mereka.
- 2) Orang-orang Yahudi Madinah mempunyai hubungan dengan suku-suku di luar Madinah, sama ada daripada suku Yahudi sendiri, orang Quraisy ataupun

musuh-musuh Islam lain daripada bergabung untuk menentang Islam.

- 3) Orang Yahudi sebagai golongan yang menguasai ekonomi di Madinah sering menindas golongan bawahan iaitu orang Arab yang datang dari Yaman kerana keruntuhan empayar dan sumber ekonomi di sana. Orang-orang Yahudi ketika itu hidup mewah kerana mempunyai kebun-kebun tamar yang luas dan pasar sendiri.
- 4) Kota Madinah belum mempunyai pemimpin dan undang-undang yang boleh menjamin keamanan dan kebebasan hak asasi manusia.

1.4.2 Matlamat Piagam Madinah

Secara ringkasnya, matlamat Piagam Madinah antaranya ialah:

- 1) Mewujudkan perdamaian dan mempergiatkan gerakan dakwah Islam ke seluruh negara di dunia.
- 2) Rasulullah SAW berazam untuk mendirikan sebuah negara yang akan melindungi agama Islam dan mewujudkan keamanan.
- 3) Bagi merangka persefahaman dan menyatupadukan antara kaum dan suku tanpa mengira bangsa, puak atau warna kulit.
- 4) Untuk membendung usaha-usaha jahat orang-orang Yahudi dan musuh Islam terhadap agama Islam dan juga kaum muslimin serta menyekat serangan musuh dari luar dan dalam negeri.
- 5) Membentuk suatu disiplin dalam kalangan masyarakat Islam sendiri agar mereka menjadi suatu umat yang kuat dan disegani musuh.

1.4.3 Isi Kandungan Piagam Madinah

Perjanjian ini mengandungi 47 fasal yang mengenai pembentukan umat yang merangkumi penyataan-penyataan mengakui hak-hak dan kewajipan semua golongan, perlunya menegakkan kesatuan persamaan, kebebasan, *musyawarah*, keadilan, pertahanan dan perdamaian, amar makruf nahi mungkar, ketakwaan dan ketaatan, posisi kedudukan Nabi Muhammad SAW sebagai pemimpin masyarakat dan lain-lain. Piagam Madinah merupakan satu piagam yang lengkap dari segi struktur politik sosial mahupun ketenteraan. Contohnya dalam fasal 2 hingga 11 memperkatakan mengenai tebusan darah dan tebusan tawanan iaitu langkah penting untuk kesejahteraan sosial dalam struktur kabilah orang Arab. Begitu juga fasal 12 hingga 19 yang memberi jaminan sosial kepada seluruh penduduk Madinah.

PIAGAM MADINAH

Fasal	Perkara
1	Dengan nama Allah yang Maha Pemurah Lagi Penyayang : Inilah kitab (Piagam Bertulis) daripada Nabi Muhammad, pesuruh Allah bagi orang-orang yang beriman dan orang-orang yang memeluk Islam dari Quraisy dengan penduduk Yathrib dan orang-orang yang bersama mereka lalu masuk ke dalam golongan mereka dan berjuang bersama-sama mereka.
2	Bahawa mereka adalah satu umat (bangsa) berbeza dari manusia-manusia lain.
3	Golongan Muhibbin dari Quraisy tetaplah di atas pegangan lama mereka: mereka saling tanggung-menanggung membayar dan menerima diyat (wang tebusan) di antara sesama mereka dalam mana

- mereka menebus sesiapa yang tertawan dengan cara berkebajikan dan adil di kalangan orang-orang beriman.
- 4 Bani Auf (dari Yathrib) tetaplah di atas pegangan lama mereka dalam mana mereka bersama-sama tanggung-menanggung membayar serta menerima wang tebusan seperti dulu; dan setiap taifah (golongan) tetaplah menebus sesiapa yang tertawan dari kalangan mereka sendiri dengan cara berkebajikan dan adil di kalangan orang-orang yang beriman.
 - 5 Bani al-Harith (dari Yathrib – Madinah) bin al-Khzraj tetaplah di atas pegangan lama mereka bersama-sama bertanggungjawab membayar wang tebusan darah seperti dulu, dan tiap-tiap puak dari (Suku Khzraj) hendaklah membayar wang tebusandarah mereka sendiri dengan adil dan berkebajikan dikalangan orang-orang yang beriman.
 - 6 Bani Saidah (dari Yathrib) tetaplah di atas pegangan lama mereka bersama-sama bertanggungjawab membayar wang tebusan darah seperti dahulu dan tiap-tiap puak dari mereka hendaklah membayar wang tebusan darah untuk mereka sendiri dengan berkebajikan dan adil di kalangan orang-orang yang beriman.
 - 7 Bani Jusyam (dari Yathrib) tetaplah di atas pegangan lama mereka bersama-sama bertanggungjawab membayar wang tebusan darah seperti dahulu dan tiap-tiap puak dari mereka hendaklah membayar wang tebusan darah untuk mereka sendiri dengan berkebajikan dan adil di kalangan orang-orang yang beriman.
 - 8 Banu al-Najjar (dari Yathrib) tetaplah di atas pegangan lama mereka bersama-sama bertanggungjawab

- membayar wang tebusan darah seperti dahulu dan tiap-tiap puak dari mereka hendaklah membayar wang tebusan darah untuk mereka sendiri dengan berkebijakan dan adil di kalangan orang-orang yang beriman.
- 9 Bani Amru bin Auf tetaplah di atas pegangan lama mereka bersama-sama bertanggungjawab membayar wang tebusan darah seperti dahulu dan tiap-tiap puak dari mereka hendaklah membayar wang tebusan darah untuk mereka sendiri dengan berkebijakan dan adil di kalangan orang-orang yang beriman.
- 10 Bani al-Nabiet (dari Yathrib) tetaplah di atas pegangan lama mereka bersama-sama bertanggungjawab membayar wang tebusan darah seperti dahulu dan tiap-tiap puak dari mereka hendaklah membayar wang tebusan darah untuk mereka sendiri dengan berkebijakan dan adil di kalangan orang-orang yang beriman.
- 11 Bani Aus (dari Yathrib) tetaplah di atas pegangan lama mereka bersama-sama bertanggungjawab membayar wang tebusan darah seperti dahulu dan tiap-tiap puak dari mereka hendaklah membayar wang tebusan darah untuk mereka sendiri dengan berkebijakan dan adil di kalangan orang-orang yang beriman.
- 12 Bahawa orang-orang yang beriman tidaklah boleh membiarkan sebarang masalah di antara mereka sendiri bahkan mestilah sama-sama bertanggungjawab memberi sumbangan, dengan berkebijakan untuk membayar wang tebusan darah dengan adil.
- 12-b Hendaklah seseorang yang beriman itu tidak membuat apa-apa perjanjian dengan orang yang di

- bawah kawalan seseorang yang beriman yang lain dengan tidak mendapat persetujuan terlebih dahulu.
- 13 Bahawa orang-orang beriman lagi bertaqwa hendaklah menentang sesiapa yang membuat kesalahan, melanggar kesusilaan, melakukan kezaliman atau dosa atau perseteruan atau kerosakan di kalangan orang-orang beriman, dan mereka hendaklah bersatu bersama-sama menentang orang tersebut walaupun jika orang itu anak kepada salah seorang dari mereka.
- 14 Tidak selayaknya seseorang mukmin itu membunuh seorang mukmin lain kerana seorang kafir, tidak selayaknya ia menolong mana-mana kafir terhadap seseorang mukmin.
- 15 Bahawa jaminan Allah itu adalah satu dan sama; ia melindungi nasib orang yang lemah dari perbuatan mereka; dan bahawa orang-orang Mukmin hendaklah saling menjamin sesama sendiri terhadap (gangguan) orang lain.
- 16 Bahawa orang-orang Yahudi yang menyertai kita hendaklah mendapatkan pertolongan dan pimpinan dengan tidak menzalimi dan tidak boleh ada pakatan tidak baik terhadap mereka.
- 17 Bahawa perdamaian orang-orang mukmin itu adalah satu dan sama, oleh itu tidak boleh dibuat perjanjian dengan mana-mana orang mukmin tanpa diturut serta oleh mukmin yang lain dalam sesuatu perang pada jalan Allah, melainkan dengan dasar persamaan dan keadilan di kalangan mereka.
- 18 Bahawa setiap serangan kita hendaklah dikira sebagai serangan terhadap semua, oleh itu hendaklah disilih gantikan tenaga menentangnya.

- 19 Bahawa orang mukmin hendaklah saling membela sesama mereka atas setiap darah yang tumpah pada jalan Allah.
- 20 Bahawa orang-orang mukmin lagi bertaqwa hendaklah teguh di atas sebaik-baik petunjuk dan seteguh-teguhnya.
- 20b Bahawa tidak boleh mana-mana orang musyrik melindungi harta orang-orang Quraisy dan tidak juga nyawa mereka dan tidak boleh menghalang orang mukmin (akan haknya).
- 21 Barangsiapa membunuh dengan sewenang-wenangnya akan seorang mukmin dengan tidak ada bukti yang cukup (alasan yang membolehkan pembunuhan itu berlaku) hendaklah dihukum bunuh balas kecuali dipersetujui oleh wali yang kena bunuh menerima ganti darah. Semua orang mukmin hendaklah bersatu suara mengutuk perbuatan itu, bahkan tidak harus bagi mereka menegakkan terhadapnya.
- 22 Bahawa tidak harus bagi mana-mana orang mukmin yang mengakui isi kandungan Piagam ini, dan percaya Allah dan Hari Kemudian, menolong mana-mana orang yang mencabul ataupun melindungi orang itu. Barangsiapa menolong orang itu maka keatasnya lakinat Allah dan kemurkaanNya pada hari Kiamat kelak, dan tidak akan diterima darinya sebarang tebusan dan tidak juga sebarang taubat.
- 23 Berbalah walau bagaimanapun kamu dalam sesuatu perkara hendaklah merujukkan perkara itu kepada Allah dan Nabi Muhammad.
- 24 Bahawa orang-orang Yahudi hendaklah turut serta membelanja sama-sama dengan orang-orang mukmin selama mana mereka itu berperang.

- 25 Bahawa kaum Yahudi dari Bani Auf adalah satu ummah bersama orang-orang mukmin, mereka bebas dengan agama mereka sendiri (Yahudi) dan orang Islam dengan agama mereka (Islam), begitu juga orang-orang yang sekutu mereka dan begitu juga diri mereka sendiri, melainkan sesiapa yang zalim dan berbuat dosa maka hal itu tidak akan menimpa melainkan dirinya dan keluarganya sendiri.
- 26 Yahudi Bani al-Najjar (diperlakukan) sama dengan Yahudi Bani Auf.
- 27 Yahudi Bani al-Harith (diperlakukan) sama dengan Yahudi Bani Auf.
- 28 Yahudi Bani al-Saidah (diperlakukan) sama dengan Yahudi Bani Auf.
- 29 Yahudi Bani Jusyaim (diperlakukan) sama dengan Yahudi Bani Auf.
- 30 Yahudi Bani al-Aus (diperlakukan) sama dengan Yahudi Bani Auf.
- 31 Yahudi Bani Tha'alabah (diperlakukan sama dengan Yahudi Bani Auf, kecuali orang-orang zalim dan orang yang berbuat dosa maka hal itu tidak akan menimpa melainkan diri dan keluarganya sendiri.
- 32 Bahawa suku Jafnah yang bertalian keturunan dengan Yahudi Tha'alabah (diperlakukan) sama dengan mereka itu (Bani Tha'alabah).
- 33 Bani Shutaibah (diperlakukan) sama dengan Yahudi Bani Auf, dan sikap yang baik hendaklah membendung segala kejahatan.

- 34 Bahawa orang-orang yang bersekutu dengan Yahudi Bani Tha'alabah (diperlakukan) sama dengan mereka itu.
- 35 Bahawa para pegawai kepada orang-orang Yahudi (diperlakukan) sama dengan orang-orang Yahudi itu sendiri.
- 36 Tiada seorang pun yang menyertai Piagam ini boleh menarik diri keluar dari pakatan mereka melainkan dengan persetujuan dari (Nabi) Muhammad.
- 36-b Tidak boleh disekat dari membuat kelukaan yang dilakukan oleh mana-mana orang ke atas dirinya, barang siapa membuat kejahanatan maka balasannya adalah dirinya dan keluarganya kecuali orang yang dizalimi dan bahawa Allah akan melindungi orang yang menghormati piagam ini.
- 37 Bahawa orang-orang Yahudi hendaklah menbiayai negara seperti mana orang-orang mukmin juga hendaklah membayar negara; dan hendaklah mereka sama-sama tolong-menolong menentang sesiapa juu yang memerangi orang-orang yang menganggotai Piagam ini; dan hendaklah mereka saling nasihat-menasihati, sama-sama membuat kebajikan terhadap perbuatan dosa.
- 37-b Mana-mana orang tidaklah boleh dianggap bersalah kerana kesalahan yang dilakukan oleh sekutunya; dan pertolongan hendaklah diberi kepada orang yang dizalimi.
- 38 Bahawa orang-orang Yahudi hendaklah memikul biayaan bersama-sama orang mukmin selama mana mereka berada dalam keadaan perang.

- 39 Bahawa Kota Yathrib adalah terpelihara sempadannya tidak boleh dicerobohi oleh mana-mana pihak yang menganggotai piagam ini.
- 40 Bahawa jiran tetangga hendaklah diperlaku sebagai diri sendiri, tidak boleh dilakukan terhadapnya sebarang bahaya dan dosa.
- 41 Tidak boleh dihampiri sebarang kehormatan (wanita) melainkan dengan izin keluarganya sendiri.
- 42 Bahawa apa juga kemungkaran (bunuhan) atau apa juga pertengkaran di antara sesama peserta piagam ini sekira-kira dikhuatir membaik bencana maka hendaklah dirujukkan kepada hukum Allah dan kepada penyelesaian oleh Muhammad pesuruh Allah, Allah menyaksikan kebaikan isi kandungan piagam ini dan merestuinya.
- 43 Bahawa tidaklah boleh diberi bantuan perlindungan kepada Quraisy (musuh), begitu juga tidak boleh diberi perlindungan kepada orang-orang yang membantunya.
- 44 Bahawa hendaklah bantu-membantu mempertahankan kota Yathrib daripada mana-mana pihak yang mencerobohnya.
- 45 Apabila mereka diajak untuk berdamai atau untuk masuk campur dalam satu-satu perdamaian maka hendaklah mereka bersedia berdamai atau masuk campur ke dalam perdamaian itu; dan bila mana mereka diajak berbuat demikian maka orang-orang mukmin hendaklah merestuinya kecuali terhadap orang-orang yang memerangi agama (Islam).
- 46 Bahawa orang-orang Yahudi Aus sendiri dan begitu juga orang-orang yang bersekutu dengan mereka hendaklah memikul kewajipan sama seperti mana pihak-pihak yang lain yang menganggotai ini demi

kebaikan mereka semata-mata (perdamaian) dari anggota-anggota piagam ini. Dan mereka hendaklah berbuat kebajikan dengan tidak melakukan dosa kerana barang siapa yang berbuat sesuatu maka dia lah yang menanggungnya sendiri. Dan Allah menyaksi akan kebenaran isi kandungan Piagam ini dan merestuiinya.

- 47 Bahawa piagam ini tidak boleh dipakai bagi melindungi orang-orang zalim dan yang bersalah; dan bahawa –mulai dari saat ini barang siapa berpergiaan dari kota Madinah atau menetap di dalamnya adalah terjamin keselamatannya kecuali orang-orang yang zalim atau bersalah. Dan bahawa Allah merestui setiap orang yang membuat kebajikan dan bertakwa dan bahawa Muhammad hendaklah diakui Pesuruh Allah.

Isi penting dalam Piagam Madinah adalah:

- 1) Nabi Muhammad diakui sebagai Ketua Negara bagi semua penduduk. Sebarang masalah hendaklah dirujuk kepada Baginda SAW untuk penyelesaian.
- 2) Semua penduduk Madinah bebas beragama dan bebas mengamalkan adat istiadat serta upacara masing-masing.
- 3) Semua penduduk Madinah hendaklah bekerjasama dalam masalah ekonomi.
- 4) Semua penduduk Madinah mestilah mempertahankan Kota Madinah daripada diserang oleh musuh.
- 5) Orang Yahudi hendaklah membayar perbelanjaan peperangan bersama-sama dengan orang Islam. Mereka tidak boleh berperang melainkan mendapat keizinan daripada Rasulullah SAW.

- 6) Semua penduduk Madinah tidak boleh bermusuhan ataupun dengki-mendengki sesama sendiri. Mereka hendaklah hidup sebagai satu bangsa iaitu bangsa Madinah.
- 7) Keselamatan orang Yahudi termasuklah nyawa dan harta benda terjamin selagi mereka taat terhadap syarat-syarat perjanjian di dalam perlumbagaan.

Bagi melancarkan lagi pentadbiran negara Islam, Baginda SAW telah melantik Abu Bakar RA dan Umar al-Khattab RA. sebagai pembantunya dalam urusan pemerintahan negara. Manakala, Huzaifah bin Yaman RA sebagai setiausaha sulitnya. Banyak lagi jawatan yang telah diwujudkan oleh Baginda SAW untuk melicinkan urusan dalam negara seperti jawatan taklim, pencatat ataupun jururekod, pemegang mohor, pemungut hasil dalam negeri, pegawai daerah, pengawas barang-barang dagangan, penguatkuasa undang-undang, pemungut cukai kepala dan pemungut zakat.

Kesemua ini disandang oleh para sahabat yang amanah dan adil berdasarkan kebolehan mereka. Bagi melancarkan urusan luar negara pula, Baginda SAW telah menghantar perutusan untuk menyebarkan Islam ke negara-negara seperti Parsi, Habsyah, Mesir Rom dan Bahrain. Oleh itu, segala peraturan dan dasar yang digarapkan oleh Rasulullah SAW dalam perlumbagaan ini mampu mewujudkan suasana keamanan dan kesejahteraan sekali gus dapat mewujudkan sebuah negara Islam yang unggul di mata dunia.

1.4.4 Prinsip-prinsip dalam Piagam Madinah

Terdapat beberapa prinsip hak asasi dan pentadbiran negara yang terdapat di dalam Piagam Madinah di antaranya ialah:

- 1) Prinsip ummah.
- 2) Prinsip perpaduan dan persaudaraan.
- 3) Prinsip persamaan hak dan kewajipan.
- 4) Prinsip kebebasan (kemerdekaan).
- 5) Prinsip perpaduan antara umat yang beragama.
- 6) Prinsip keselamatan, berbangsa, bernegara dan beragama.
- 7) Prinsip hidup berjiran.
- 8) Prinsip saling membantu terhadap perkara kebaikan dan ketakwaan.
- 9) Prinsip perdamaian sejagat.
- 10) Prinsip musyawarah.
- 11) Prinsip keadilan dan ihsan.
- 12) Prinsip kepimpinan dan ketauladan.
- 13) Prinsip iman dan taqwa.
- 14) Prinsip amal makruf nahi munkar.

Berdasarkan 14 prinsip yang terdapat di dalam Piagam Madinah menunjukkan betapa lengkapnya sistem pemerintahan Islam yang dilaksanakan oleh Rasulullah SAW di Madinah yang menyatukan antara penduduk

yang beragama Islam dan bukan beragama Islam agar hidup secara harmoni, bertoleransi, bekerjasama membangunkan ekonomi Madinah, saling hormat menghormati dan hidup berdamai dalam suasana masyarakat majmuk. Amalan yang baik ini kemudiannya diwarisi oleh generasi pemerintahan Islam berikutnya iaitu Khulafa ar-Rasyidin, Bani Umayyah, Bani Abbasiah dan Turki Uthmaniah yang mengambil masa lebih kurang 13 abad lamanya. Kepimpinan dan kebijaksanaan Baginda SAW dalam memerintah Negara Islam Madinah telah menjadi contoh teladan yang baik dan secara rasminya menonjolkan dakwah dan syiar Islam.

1.4.5 Kepentingan dan Kesan Piagam Madinah

Nabi SAW memperkenalkan Piagam Madinah bagi melicinkan perjalanan pentadbiran sebuah negara yang mempunyai rakyat pelbagai bangsa, agama, kepercayaan dan budaya. Piagam ini digubal setelah terbentuk negara Islam Madinah. Kepentingan piagam ini boleh dilihat dari sudut berikut:

- 1) Menjadi model perpaduan masyarakat majmuk atau pelbagai bangsa.
- 2) Pengisytiharan hak asasi manusia ditegakkan.
- 3) Penjelasan terhadap isu berhubung negara Islam, perundangan, siasah, hak asasi dan kebebasan, ekonomi dan kehidupan masyarakat majmuk.
- 4) Merupakan kerangka pembentukan negara Islam pertama pada tahun 622M yang didokong oleh warganegara Madinah yang terdiri daripada golongan Quraisy (Muhajirin) dan golongan Yathrib (Ansar iaitu Khazraj dan Yahudi) serta golongan yang mengikut dan berjuang bersama-sama mereka.

Kesan daripada penggubalan Piagam Madinah ini dapat dilihat dari beberapa sudut perkara berikut:

Bil	Perkara	Penjelasan
1	Tanggungjawab & hubungan erat	<ul style="list-style-type: none"> Masyarakat berbilang agama dan keturunan dianggap sebuah masyarakat yang mempunyai kewajipan dan tanggungjawab yang sama terhadap negara Islam Madinah. Setiap anggota sahifah mestilah menjalinkan hubungan yang erat tanpa mengira agama dan keturunan.
2	Hak beragama	<ul style="list-style-type: none"> Kaum Yahudi diberikan kebebasan mengamalkan ibadat mengikut agama mereka selama mereka mematuhi undang-undang Islam dan peraturan yang diterima umum. Orang Islam dan bukan Islam dapat hidup secara aman damai dan bebas menjalankan aktiviti masing-masing
3	Keadilan	<ul style="list-style-type: none"> Piagam Madinah menjalankan fungsi untuk menegakkan keadilan dan membanteras kezaliman.
4	Keselamatan dan jaminan	<ul style="list-style-type: none"> Memberi jaminan keselamatan terhadap orang bukan Islam yang menganggotai dan mematuhi peraturan piagam.

1.5 Pelaksanaan Syura

Definisi syura dengan pengertian yang berbeza. Antaranya ialah pada pandangan Ibnu Manzur, syura adalah penyaringan madu iaitu menyaring madu dari sarangnya. Dapat dirumuskan bahawa syura memerlukan unsur-unsur ke arah fikiran yang bernalas dalam menyelesaikan masalah yang dihadapi di dalam pemerintahan. Syura merupakan satu kaedah dan prinsip penting yang diajar dalam agama Islam dalam melahirkan masyarakat Islam yang membangun, maju, stabil dan adil.

Pelaksanaan syura di bawah pemerintahan Islam telah menjadi suatu kefarduan sebagaimana yang telah disebut secara jelas di dalam al-Quran dan Sunah serta telah disepakati oleh para ulama.

Manakala tuntutan pelaksanaan syura telah disebut dengan jelas di dalam al-Quran. Al-Quran merupakan kitab petunjuk di dalam keperluan masyarakat terhadap syura kerana ia sebagai mekanisme penting ke arah mewujudkan kepimpinan Islam yang adil. Kepentingan syura telah dijelaskan oleh Allah SWT dalam Surah al-Imran (3) ayat 159:

وَشَارِرُهُمْ فِي الْأَمْرِ إِذَا عَرَمْتَ فَتَوَكَّلْ عَلَى اللَّهِ إِنَّ اللَّهَ يُحِبُّ الْمُتَوَكِّلِينَ

١٥٩
يُحِبُّ الْمُتَوَكِّلِينَ

Maksudnya: *dan juga bermesyuaratlah dengan mereka dalam urusan (peperangan dan hal-hal keduniaan) itu. kemudian apabila engkau telah berazam (sesudah bermesyuarat, untuk membuat sesuatu) maka bertawakalah kepada Allah, sesungguhnya Allah Mengasihi orang-orang yang bertawakal kepadaNya. (159)*

Dengan itu, syura boleh dikaitkan dengan tiga dimensi iaitu:

- 1) Rasulullah SAW telah diperintahkan oleh Allah SWT melaksanakan syura di dalam pentadbiran hal ehwal Islam dan masyarakat Islam. Pelaksanaan perintah ini penting supaya ia menjadi contoh kepada para sahabat Baginda SAW dan generasi kemudian dalam urusan kepimpinan ummah.
- 2) Adalah menjadi sifat umat Islam menjalankan urusan mereka sama ada di dalam urusan keduniaan maupun agama berdasarkan prinsip syura. Pelaksanaan prinsip syura ini juga melambangkan kesatuan umat Islam di dalam semua tindakan.
- 3) Perlaksanaan syariat Islam memerlukan organisasi dan umat yang sentiasa melakukan mesyuarat sesama mereka. Pelaksanaan syura di dalam pemerintahan Islam telah dijalankan pada awal kemunculan negara Islam lagi iaitu di zaman pemerintahan Rasulullah SAW. Rasulullah SAW adalah orang yang paling banyak mengadakan mesyuarat dan sering berbincang dan berunding dengan para sahabatnya yang terdiri daripada kalangan cerdik pandai, berpengalaman, dan pakar dalam bidang siasah, pentadbiran, peperangan. Masalah yang memerlukan keputusan segera dalam penyelesaiannya dan perkara-perkara lain.

Dalam sistem pentadbiran negara di Madinah, Baginda SAW telah membentuk satu majlis Syura mesyuarat yang terdiri daripada 14 orang sahabat terpilih yang cerdik, mempunyai pelbagai kelebihan dan berjiwa besar dalam mengembangkan Islam. Dalam hierarki organisasi telah diletakkan pada kedudukan yang tinggi setaraf dengan Ketua Setiausaha Negara dan Pemegang Mohor Rasul. Manakala ahli syura terdiri daripada sahabat-sahabat.

Antara Ahli Majlis Syura yang terlibat ialah:

- 1) Hamzah RA.
- 2) Jaafar RA.
- 3) Abu Bakar RA.
- 4) Ali RA.
- 5) Ibn Masud RA.
- 6) Salman RA.
- 7) Ammar RA.
- 8) Huzaifah RA.
- 9) Abu Zar RA.
- 10) Miqdad RA.
- 11) Bilal RA.

Rasulullah SAW dan para sahabat menjadi contoh yang baik kepada umatnya dalam hal menghormati dan melaksanakan sistem syura ini. Mereka bermesyuarat dalam mengambil sesuatu keputusan terhadap sesuatu perkara. Terdapat beberapa contoh bagaimana Rasulullah SAW merealisasikan konsep syura bersama para sahabatnya:

- 12) Semasa berhadapan dengan peperangan Uhud, Baginda SAW bermesyuarat dengan umat Islam untuk menentukan strategi perang sama ada bertahan di Madinah ataupun keluar menyerang majoriti berpendapat lebih baik keluar. Baginda SAW dan beberapa para sahabat lain tidak bersetuju demikian, namun Baginda SAW tetap mengikut pendapat majoriti.
- 13) Semasa peristiwa peperangan Khandaq, Baginda SAW berdamai dengan pihak musuh iaitu kabilah Ghatfan. Baginda SAW bermesyuarat dengan Saad bin Muaz RA dan Saad bin Ubadah RA tentang kemungkinan memberikan satu pertiga penghasilan Madinah kepada kabilah itu supaya mereka mengambil sikap berkecuali dalam peperangan Khandaq. Cadangan Rasulullah SAW tidak dipersetujui oleh mereka, lalu Baginda SAW mengikut pendapat mereka yang tidak ingin berdamai dengan kabilah tersebut. Selain itu, syura

juga berlaku di dalam bidang ketenteraan misalnya, Baginda SAW meminta pendapat dalam kalangan pengikutnya bagi melicinkan lagi strategi peperangan.

- 14) Di dalam urusan memilih penempatan tentera Muslim dalam peperangan Badar yang berlaku pada tahun kedua Hijrah. Rasulullah SAW yang mengetua pasukan tentera Muslim memilih tempat tertentu. Baginda SAW kemudiannya ditanya oleh sahabat yang bernama Hubbab bin Munzir RA: "Adakah pemilihan tempat ini adalah suatu strategi dalam peperangan?" lalu Baginda SAW menjawab: "Ia hanyalah strategi dalam peperangan". Oleh itu, Hubbab bin Munzir RA mencadangkan supaya dipindahkan ke tempat lain yang lebih sesuai. Cadangan itu diterima kerana hujah yang diberikan memang bersetujuan.
- 15) Selain itu, keputusan mesyuarat mengikut pandangan Abu Bakar RA yang merupakan suara majoriti dalam peristiwa Hudaibiah, kedatangan Baginda SAW dan umat Islam ke Mekah adalah untuk mengerjakan umrah pada tahun tersebut dan tidak melakukan persediaan apa-apa untuk menghadapi peperangan supaya pihak Quraisy tidak bertindak memerangi umat Islam kerana tujuan kedatangan bukanlah untuk berperang tetapi sekadar mengerjakan umrah. Setelah Baginda SAW Rasulullah SAW wafat, orang Islam telah berkumpul di Thaqifah Bani Saidah. Orang Ansar mengeluarkan pendapat mereka tentang perlantikan khalifah. Orang Muhajirin juga berbuat demikian. Mereka sama-sama bermesyuarat dan akhirnya bersetuju melantik Abu Bakar RA memegang tampuk pemerintahan selepas kewafatan Rasulullah SAW.
- 16) Perlaksanaan syura juga berlaku dalam kepimpinan negara apabila Baginda SAW menghimpunkan wakil bagi setiap kelompok masyarakat yang wujud di Madinah untuk mengadakan rundingan dengan mereka. Rundingan ini berkisar mengenai cadangan membentuk

masyarakat yang selamat di Madinah, mempertingkatkan sistem pertahanan serta mewujudkan kerjasama dalam mentadbir Kota Madinah. Dalam hal ini sebenarnya Baginda SAW boleh bertindak sendiri dengan menetapkan peraturan yang perlu dipatuhi. Namun, apa yang berlaku adalah Baginda SAW tetap inginkan pandangan majoriti yang disuarakan oleh wakil setiap kaum masyarakat. Dengan persetujuan majoriti, Baginda Rasulullah SAW merangka perjanjian-perjanjian yang terkandung dalam Piagam Madinah.

1.6 Penyebaran Dakwah

Kepimpinan yang ditonjolkan oleh Rasulullah SAW di dalam pemerintahannya dapat dilihat di dalam aspek penyebaran dakwah terhadap masyarakatnya terutama penduduk Madinah. Pada peringkat awal, Rasulullah SAW menyebarkan dakwah Islam pada kaum kerabat dan sahabat Baginda SAW yang terdekat. Tetapi, cara ini berubah apabila Baginda SAW mempunyai kedudukan yang kukuh di Kota Madinah, khususnya selepas perjanjian Hudaibiah. Ini terbukti apabila Baginda SAW mula menghubungi pemerintah di sesebuah negara untuk mengajak mereka kepada Islam.

Penyebaran dakwah melalui penghantaran surat dan utusan kepada pemerintah atau pembesar sesebuah negara tersebut ke arah. Ini adalah strategi yang berkesan kerana apabila pemerintah menerima Islam, maka mudahlah bagi rakyatnya untuk turut menerima agama Islam.

Antara pemerintah yang diseru kepada Islam menerusi surat dan utusan daripada Nabi SAW ialah:

- 1) Najasyi iaitu kerajaan pemerintah kepada Habsyah.
- 2) Kisra di Parsi, Hercules di Rom.
- 3) Jayfar bin Julanda kerajaan pemerintah Oman.
- 4) Muqawqis iaitu pembesar Mesir.
- 5) Harith bin Abu Shamir iaitu penguasa Rom di Damsyiq.
- 6) Hawdhah bin Ali Hanafi iaitu pemerintah Yamamah.

- 7) Munzir bin Sawa iaitu pemerintah Bahrain.
- 8) Syurahbil bin Amr iaitu penguasa Rom di Busyra.

Baginda SAW juga menghantar utusan kepada setiap pemerintah iaitu Baginda SAW mengutus Amar bin Umayyah RA kepada Najasyi, Dihyah bin Khalifah RA kepada Hercules dan seterusnya.

Setiap utusan yang dihantar oleh Baginda SAW membawa surat untuk diberikan kepada pemerintah yang sudah ditentukan. Ini adalah strategi yang amat baik kerana apabila pemerintah ataupun pembesar ini menerima Islam, maka mudahlah bagi rakyatnya untuk menerima sama ajaran Islam. Sesungguhnya penyebaran dakwah yang dilakukan oleh Rasulullah SAW ini melancarkan lagi gerakan Islam.

1.7 Kesimpulan

Dengan tertegaknya negara Madinah sebagai sebuah Daulah Islamiah yang pertama, Baginda SAW berjaya membentuk perpaduan antara kaum Muhajirin dan Ansar serta mewujudkan persefahaman antara umat Islam dan golongan Yahudi serta Kristian di Madinah melalui pembentukan Piagam Madinah. Pemerkasaan institusi masjid sebagai pusat pentadbiran dan pendidikan untuk penyebaran ilmu pengetahuan menjadikan gerakan dakwah Islamiah tersebar secara meluas. Melalui kuasa pemerintahan politik juga Baginda SAW dapat membentuk pemerintahan yang kukuh dengan dasar dan peraturan yang menjamin setiap umat Islam dan bukan Islam di bawah pemerintahan Islam mendapat hak perlindungan dan keamanan yang sewajarnya. Dengan kewujudan negara Islam pertama yang berpandukan al-Quran dan Sunah, maka ajaran Islam mula di martabatkan dan dipandang mulia oleh golongan bukan Islam.

BAHAGIAN 2

KISAH PARA SAHABAT

2. KISAH PARA SAHABAT

2.1 Pendahuluan

Sememangnya telah menjadi lumrah dan fitrah dalam perjuangan menegakkan agama Allah ini, para pejuang pasti berhadapan dengan pelbagai ujian dan rintangan. Sejarah telah membuktikan bahawa semua pejuang Islam yang benar-benar ikhlas dan berada dalam jalan yang benar tidak mungkin terlepas daripada ujian. Para Nabi, para Rasul Allah, sahabat-sahabat mereka, para ulama pewaris Nabi dan sekalian dai. Secara umumnya, pasti mereka akan ditimpa ujian. Perkara ini sudah menjadi suatu kemestian atau prasyarat untuk melihat sejauh mana keyakinan, ketahanan dan istiqamah mereka dalam Islam. Antara kisah yang sangat popular di dalam sejarah Islam ialah Bilal bin Rabah RA, Sumayyah binti Khabbat RA dan Ammar bin Yasir RA.

2.1.1 Kisah Hidup Bilal Bin Rabah RA

Bilal bin Rabah RA adalah seorang tokoh sahabat Rasulullah SAW yang sangat penting dalam menegakkan syiar Islam dan sentiasa bersama Rasulullah SAW. Beliau merupakan salah seorang sahabat Rasulullah SAW yang paling rapat. Bilal bin Rabah RA pada asalnya adalah seorang hamba kepada sahabat karib Abu Jahal yang bernama Umaiyyah bin Khalaf.

Pernah suatu ketika beliau telah didera di padang pasir dalam keadaan ditelentangkan dengan badan yang ditelanjangkan. Di padang pasir dan di bawah terik panas matahari yang membakar itu beliau telah dipukul

oleh beberapa orang tukang pukul dari golongan kaum kafir Quraisy. Tujuan mereka melakukan sedemikian ialah agar Bilal RA kembali kepada agama asalnya dan menyebut nama berhalia *al-Latta* dan *al-Uzza*.

Oleh sebab keimanan Bilal RA begitu menebal, mereka tidak berjaya mengubah akidahnya. Sebaliknya semakin hebat dia diseksa semakin dia mengingati Allah SWT. Semasa dia diseksa dia tidak berhenti-henti menyebut kalimah: "Ahad! Ahad!" yang bermaksud Allah yang satu, Allah yang satu.

Namun demikian, walaupun dia diseksa dengan sebegini kejam, tetapi sedikit pun tidak mengurangkan keimanan dan keyakinan Bilal RA, malah semakin bertambah terhadap agama yang telah dianutinya itu. Keadaan ini menyebabkan Umaiyyah kehairanan kerana belum pernah dia melihat seorang manusia yang begitu sabar menanggung pelbagai azab demi mempertahankan kepercayaannya sebagaimana Bilal RA.

Setelah melihatkan segala tindakannya terhadap Bilal RA tidak mendatangkan kesan maka Umaiyyah pun pergi berjumpa dengan Abu Jahal. Setibanya dia di rumah Abu Jahal maka Umaiyyah pun mencadangkan kepada Abu Jahal agar Bilal RA dibunuhi. Namun cadangan itu ditolak oleh Abu Jahal bimbang orang ramai akan menentangnya secara diam. Maka dicadangkan oleh Abu Jahal agar Bilal RA diseksa sehingga dia kembali kepada agama asal.

Abu Jahal mencadangkan agar Bilal RA dijemur di bawah panas terik matahari dan dipakai dengan pakaian besi di padang pasir luar kota Mekah. Abu Jahal dengan penuh yakin bahawa Bilal RA tidak akan mampu menahan kepanasan besi dan cahaya matahari yang membakar itu dan akan kembali kepada agama asal.

Setelah segala rancangan mereka siap diatur maka mereka pun menangkap Bilal RA dan dipakaikannya dengan sehelai baju besi. Kemudian mereka pun membawa Bilal RA ke padang pasir dengan kakinya dirantai. Setibanya di padang pasir itu mereka pun meninggalkan Bilal RA keseorangan diri di antara batu-batu padang pasir itu. Pada hari yang amat panas sekali sehingga tidak ada sesiapa pun yang sanggup berdiri lama di bawah sinaran matahari dan pada malam harinya pula keadaannya amat sejuk sehingga terasa ke tulang hitam. Azab yang diterima oleh Bilal RA tidak terpergi sakitnya. Bagaimanapun beliau tidak mengeluh atau gentar menghadapi segala percubaan yang diterimanya. Hatinya bulat, beliau hanya berdoa kepada Allah SWT agar Allah SWT menguatkan imannya di samping memohon bantuan agar Allah SWT melepaskan beliau dari azab yang tidak tertanggung itu.

Keesokan harinya Abu Jahal dan Umayyah datang menemui Bilal RA. Dalam hati mereka berdua menyangkakan tentulah Bilal RA akan bersujud kepada mereka meminta ampun dan berjanji akan mengubah pegangannya. Apabila mereka mendekati Bilal RA dan bertanyakan keadaan dirinya, Bilal RA tetap dengan menyebut kalimah Ahad,Ahad. Abu Jahal semakin marah lalu dia dan juga para pengikutnya meletakkan seketul batu besar di atas dada Bilal bin Rabah RA.

Setelah batu itu diletakkan di atas dadanya, Bilal RA merasa terlalu sukar untuk bernafas, tetapi dalam hatinya masih menyeru "Ahad! Ahad!" Abu Jahal, Umayyah dan para pengikutnya mengugut Bilal RA mengatakan bahawa beliau akan mati tidak lama lagi. Mereka semua bersorak melihat keadaan Bilal RA semakin sukar untuk bernafas dan semakin perlahan pula suaranya menyebut "Ahad! Ahad!." Akan tetapi gerak bibirnya masih belum berhenti dari menyebut perkataan itu.

Kisah penderitaan Bilal RA menghadapi seksa daripada pihak kafir Quraisy akhirnya telah sampai ke pengetahuan Rasulullah SAW dan Sayidina Abu Bakar as-Siddiq RA. Setelah mendapat berita itu, tanpa membuang masa Sayidina Abu Bakar RA pun terus menuju ke tempat Bilal RA diseksa itu. Di bawah kepanasan cahaya matahari Sayidina Abu Bakar RA meredah padang pasir yang luas itu.

Apabila Abu Bakar RA sampai, dilihat ramai yang sedang mengerumuni Bilal RA yang masih hidup dan tidak berhenti menyebut "Ahad! Ahad!". Bagi menyelamatkan Bilal RA, Abu Bakar RA telah membelinya daripada Umaiyyah. Sayidina Abu Bakar RA terus memapah Bilal RA untuk dibawa pulang bertemu Rasulullah SAW. Tidak lama kemudian Sayidina Abu Bakar RA memerdekaan Bilal RA.

Pada zaman Rasulullah SAW, ketika tiba waktu solat Nabi Muhammad SAW menjadi imam dan Bilal RA menjadi muazin. Bilal RA memang terkenal dengan suaranya yang merdu. Selepas Rasulullah SAW wafat, Bilal RA meninggalkan Kota Madinah. Bilal RA terkenal dengan sifat kejururannya, kesolehannya dan rendah hati. Pada 20H, Bilal RA telah meninggal dunia dalam usia 60 tahun. Beliau dimakamkan di kota Damsyik berdekatan daerah Babus Saghir.

2.1.2 Kisah Hidup Ammar Bin Yasir RA

Ammar ibn Yasir RA merupakan anak kepada seorang pengembara Arab yang bernama Yasir dan Sumaiyyah. Nama ibunya terkenal kerana ibunya merupakan orang pertama yang syahid dalam Islam. Ammar merupakan salah seorang sahabat yang hidup dari zaman Rasulullah SAW sehingga ke zaman pemerintahan Khulafa ar-Rasyidin yang keempat iaitu Sayidina Ali bin Abi Talib RA.

Bani Mahzum mengetahui Yasir dan ahli keluarganya telah memeluk Islam, lalu ditangkap dan dibawa ke padang pasir di saat terik panasnya mentari lalu ditanggalkan pakaian mereka dan kemudian dipakaikan baju besi kepada mereka. Mereka tidak diberikan air untuk menghilangkan dahaga sehingga pengsan. Kulit mereka juga terkoyak kerana melekat pada baju besi yang dipakaikan. Saban hari mereka diseksa sedemikian rupa sehingga mereka pengsan. Namun tidak sesekali pun kata-kata kufur keluar daripada mulut Yasir dan keluarganya. Mereka sekeluarga dipaksa untuk keluar daripada Islam dan kembali kepada penyembahan berhala.

Di saat terik cahaya matahari di padang pasir di lapangan terbuka di kawasan Kota Mekah, satu keluarga itu tengah menerima seksaan. Ketika Rasulullah SAW melalui di hadapan keluarga itu, tiba-tiba terdengar rintihan Yasir RA dalam keadaan terbelenggu kedua tangan dan kakinya. Rasulullah SAW segera menengadah ke langit seraya berseru: "Wahai keluarga Yasir, bersabarlah. Bergembiralah kamu. Sesungguhnya syurga telah dipersiapkan sebagai tempat kembali keluargamu."

Mendengar seruan Nabi SAW tersebut, keluarga Yasir RA menjadi tenteram jiwanya dan kian tabah dalam menghadapi ujian. Di saat itu juga datangnya Abu Jahal kepada keluarga itu untuk memilih antara mati syahid atau diseksa dengan meninggalkan ajaran Muhammad SAW dan kembali menganut ajaran nenek moyang. Bagaimanapun, semua seksaan itu tidak dapat menekan jiwa Ammar RA untuk kembali kepada kekufuran. Bermula dengan seksaan dibakar dengan besi panas sehingga disalib di atas padang pasir yang panas dengan ditindih batu laksana bara merah, bahkan sampai ditenggelamkan ke dalam air hingga sesak nafasnya dan mengelupas kulitnya yang penuh dengan luka.

Pada suatu hari, ketika Ammar RA tidak sedarkan diri kerana diseksamen dengan begitu berat, orang-orang kafir Quraisy meminta agar Ammar RA menyebut kalimah untuk menyembah tuhan mereka. Ammar RA mengikuti perintah mereka tanpa menyedari apa yang keluar daripada bibirnya. Setelah seksaan itu dihentikan, tiba-tiba beliau mengingati semula apa yang telah diucapkan. Ketika itu, Ammar bin Yasir RA berasa hilanglah akal dan terbayanglah di matanya betapa besar kesalahan yang telah dilakukannya. Baginya, kata-kata itu adalah dosa besar yang tidak dapat diampuni lagi.

Ketika Rasulullah SAW menemui Ammar RA didapatinya dia sedang menangis, maka Rasulullah SAW pun menyapu tangisan Ammar bin Yasir RA dengan tangan Baginda SAW seraya berkata, "Orang-orang kafir itu telah menyeksamu dan menenggelamkanmu ke dalam air sampai kamu mengucapkan begini dan begitu?" "Benar, wahai Rasulullah." ujar Ammar RA. Rasulullah SAW tersenyum berkata: "Jika mereka memaksamu lagi, tidak apa, ucapkanlah seperti apa yang kamu katakan tadi!" Lalu Rasulullah SAW membacakan kepadanya ayat al-Quran dalam Surah an-Nahl (16) ayat 106:

مَنْ كَفَرَ بِاللَّهِ مِنْ بَعْدِ إِيمَانِهِ إِلَّا مَنْ أُكْرِهَ
وَقَلْبُهُ وَمُطْمِئِنٌ بِالإِيمَانِ وَلَكِنْ مَنْ شَرَحَ
بِالْكُفُرِ صَدِرَ فَعْلَيْهِمْ غَضْبٌ مِّنَ اللَّهِ وَلَهُمْ

عَذَابٌ عَظِيمٌ

Maksudnya: Sesiapa yang kufur kepada Allah sesudah ia beriman (maka baginya kemurkaan dan azab dari Allah), kecuali

orang yang dipaksa (melakukan kufur) sedang hatinya tenang tenteram dengan iman; akan tetapi sesiapa yang terbuka hatinya menerima kufur maka atas mereka tertimpa kemurkaan dari Allah, dan mereka pula beroleh azab yang besar. (106)

Setelah mendengar janji Allah SWT itu, maka Ammar RA kembali tenang. Dia tidak lagi merasai kesakitan. Malah, jiwanya pun semakin tenang. Sesungguhnya Ammar bin Yasir RA calon penghuni syurga. Beliau telah menghadapi cubaan dan seksaan itu dengan ketabahan yang luar biasa. Ammar RA terkorban syahid dalam Perang Siffin di mana beliau berperang bagi pihak Sayidina Ali bin Abi Talib RA. Ketika itu umur beliau sekitar 88 tahun. Kematiannya telah dijangkakan oleh Nabi Muhammad SAW dalam Musnad Imam Ahmad bin Hanbal (1411) dan riwayat Imam al-Bukhari (447):

كُنَّا نَحْمِلُ لَبِنَةً وَعَمَارٌ لِبِنَتَيْنِ، فَرَآهُ النَّبِيُّ
صَلَّى اللَّهُ عَلَيْهِ وَسَلَّمَ فَبَنَفَضَ التُّرَابَ عَنْهُ، وَيَقُولُ:
وَبَيْحَ عَمَارٍ، تَقْتُلُهُ الْفِتْنَةُ الْبَاغِيَّةُ، يَدْعُوهُمْ إِلَى الْجَنَّةِ،
وَيَدْعُونَهُ إِلَى النَّارِ قَالَ: يَقُولُ عَمَارٌ: أَعُوذُ بِاللَّهِ
مِنَ الْفِتْنَةِ

Bermaksud: "Dulu kami pernah membawa satu bata, satu bata (dalam pembangunan masjid), sedangkan 'Ammar membawa dua bata, dua bata, maka Nabi SAW melihatnya lalu mengibaskan debu yang menempel darinya, Nabi SAW bersabda: duhai 'Ammar, kamu akan dibunuh oleh golongan penderhana (pemberontak), dia menyeru

mereka kepada syurga, sedangkan mereka menyerunya kepada neraka". 'Ammar RA pun berkata: aku berlindung kepada Allah dari fitnah-fitnah".

2.1.3 Kisah Hidup Sumayyah Binti Khabbat RA

Sumayyah RA merupakan isteri kepada Yasir RA. Yasir RA dinikahkan oleh Huzaifah dengan Sumayyah RA kemudian mendapat seorang anak yang diberi nama Ammar RA setelah dimerdekan. Sumayyah RA, suaminya Yasir RA dan anaknya Ammar RA adalah golongan yang awal memeluk Islam dan menjadi teladan umat. Mereka sekeluarga memiliki kehebatan dan teladan yang cukup besar bagi perjalanan dakwah Islamiah.

Sumayyah RA menjadi lambang ketakwaan, kekuatan dan keberanian seorang wanita Muslimah dalam menegakkan agama Allah SWT. Sumayyah RA termasuk 7 orang yang pertama menzahirkan keislamannya di Mekah. Mereka adalah Rasulullah SAW, Abu Bakar RA, Bilal RA, Khabbab RA, Shuhail RA, Ammar RA dan Sumayyah RA.

Dengan keimanan yang kuat dan keberanian dirinya sanggup menentang Abu Jahal yang terkenal dengan sikap bengis dan kejam. Sumayyah RA bersama suami dan anaknya Ammar RA dijemur di padang pasir yang sangat panas. Kaki dan tangan mereka diikat sehingga tidak mampu bergerak dan melawan. Mereka diseksa dengan kejam agar mengikuti keinginan Abu Jahal dan kembali kepada agama asal. Namun mereka tidak terdengar sepatah katapun dari mulut Yasir RA atau puteranya, Ammar RA selain daripada rintihan yang penuh kesakitan. Justeru itu mereka meneruskan penyeksaan terhadap keluarga yang beriman ini agar menyatakan murtad dari agama Islam.

Rasulullah SAW dan Abu Bakar RA dihalangi oleh kaumnya sedangkan sumayyah RA, anaknya Ammar RA dan suaminya Yasir RA dipakaikan baju besi dan dipanaskan pada sinar matahari yang terik. Sumayyah RA tidak merintih kesakitan tetapi menentang dengan terus terang serta menyatakan bahawa beliau tetap berpegang teguh kepada keimanannya, walaupun harus ditebus dengan harga yang mahal kerana mereka telah mendengar sabda Rasulullah SAW ketika Baginda SAW melewati tempat mereka diseksa yang bermaksud; “Bersabarlah wahai keluarga Yasir RA kerana tempat yang dijanjikan untuk kamu adalah syurga.”

Segala seksaan terasa ringan kerana semuanya akan berakhir dengan kenikmatan syurga. Biar apapun seksaan yang menimpa Sumayyah RA namun ia tetap dengan pendirian dan keimaninan yang kukuh dalam jiwanya. Penyeksaan yang dilakukan hanya menambah ketakwaan Sumayyah RA dan menambah keberaniannya. Abu Jahal yang sombong dan bengis berasa terhina kerana dicabar oleh seorang wanita yang lemah.

Akhirnya Sumayyah RA dibunuh dengan penyeksaan yang menyedihkan. Riwayat Sumayyah RA dicatat dalam lembaran sejarah dengan tinta emas kerana beliau wanita yang pertama mati syahid dalam Islam sebagai motivasi jihad terhadap generasi yang berikutnya. Namanya abadi hingga kini untuk dikenang sebagai pejuang yang sanggup dan berani melawan kekejaman dan kekerasan. Ibnu Hajar berkata dalam kitabnya al-Isobah; “Sumayyah binti Khabbat bekas hamba sahaya Huzaifah bin al-Mughirah bin Makhzum. Beliau adalah ibu Ammar bin Yasir RA orang yang masuk Islam pada hari ke-7. Sumayyah RA diseksa Abu Jahal dan ditusuk tombak pada kemaluannya sehingga meninggal dunia. Beliau adalah wanita yang pertama mati syahid dalam Islam. Ammar RA hidup hingga menyaksikan terbunuhnya orang yang membunuh

ibunya. Dalam hadis riwayat Ibnu Hajar (4/335), daripada Mujahid RA dia berkata:

أَوْلُ شَهِيدٍ فِي الْإِسْلَامِ سَمِيعَةُ وَالدُّهُّ عَمَّارُ بْنُ يَاسِرٍ
وَكَانَتْ عَجُورًا كَبِيرًا ضَعِيفَةً وَمَا قُتِلَ أَبُو جَهَلٍ يَوْمَ
بَدْرٍ قَالَ النَّبِيُّ صَلَّى اللَّهُ عَلَيْهِ وَسَلَّمَ لِعَمَّارٍ قُتْلَ
اللَّهُ قَاتَلَ أَمْكَ

Bermaksud: Wanita yang pertama mati syahid dalam Islam ialah Sumayyah RA, iaitu ibu Ammar bin Yasir, (Sumayyah RA) seorang wanita yang uzur (tua) yang lemah. Dan ketika mana Abu Jahal terbunuh dalam perperangan Badar, Rasulullah SAW berkata kepada Ammar; “Allah telah membunuh orang yang membunuh ibumu”.

Sumayyah adalah seorang wanita Islam pertama yang mati syahid dalam Islam. Pengajaran yang dapat diambil iktibar daripada kesemua sahabat yang mempertahankan akidah Islam ini dapat dijadikan panduan dan teladan kepada orang yang memeluk Islam. Cabaran , ujian yang lebih berat dan mencabar telah dilalui oleh para sahabat dalam mempertahankan kesucian agama Islam dan perkara yang sama berlaku kepada saudara-saudari yang memilih Islam sebagai Agama. Antara rintangan dan cabaran yang dihadapi adalah ditentang oleh keluarga, dibuang keluarga, hilang pekerjaan, diugut bunuh dan mungkin pelbagai lagi. Perkara yang sama berlaku kepada Bilal bin Rabah RA. Ammar bin Yasir RA dan Sumayyah bin Khabbat RA malah ancaman yang dilalui oleh sahabat yang disebutkan ini jauh lebih mencabar dan menguji

keimanan mereka terhadap Islam. Mereka berjaya mengekalkan akidah mereka dalam agama Islam dan percubaan pihak kafir Quraisy ingin memurtadkan mereka ternyata gagal. Semoga kisah ini menguatkan lagi akidah semua umat Islam.

2.2 Kisah Sepuluh Sahabat Dijamin Syurga

Sahabat Nabi SAW adalah merupakan orang yang pernah melihat Nabi SAW dan beriman dengan Baginda SAW dan risalah yang dibawanya. Mereka merupakan generasi terbaik yang mendapat didikan terus daripada Nabi SAW. Bahkan di dalam al-Quran Allah SWT mengiktiraf kedudukan dengan gelaran 'redha ke atas mereka'. Firman Allah SWT dalam Surah at-Taubah (9) ayat 100:

وَالسَّيِّقُونَ الْأَوَّلُونَ مِنَ الْمُهَاجِرِينَ وَالْأَنْصَارَ وَالذِّينَ
أَتَبْعَوْهُم بِإِحْسَنٍ رَّضِيَ اللَّهُ عَنْهُمْ وَرَضُوا عَنْهُ وَأَعْدَّ لَهُمْ
جَنَّتٍ تَجْرِي تَحْتَهَا الْأَنْهَرُ خَالِدِينَ فِيهَا أَبَدًا ذَلِكَ الْفَوْزُ

الْعَظِيمُ

Maksudnya: *Dan orang-orang yang terdahulu - yang mula-mula (berhijrah dan memberi bantuan) dari orang-orang "Muhajirin" dan "Ansar", dan orang-orang yang menurut (jejak langkah) mereka dengan kebaikan (iman dan taat), Allah reda akan mereka dan mereka pula reda akan Dia, serta ia menyediakan untuk mereka Syurga-syurga yang mengalir di bawahnya beberapa sungai, mereka kekal di dalamnya selama-lamanya; itulah kemenangan yang besar. (100)*

Nabi SAW seringkali menyebut kelebihan-kelebihan para Sahabat, sebagaimana dalam hadis riwayat Imam al-Bukhari

(3651), daripada Abdullah Bin Mas'ud bahawa Nabi SAW bersabda:

حَيْرُ النَّاسِ قَرْنِي ثُمَّ الَّذِينَ يَلْوَهُمْ ثُمَّ الَّذِينَ يَلْوَهُمْ

Bermaksud: “Sebaik-baik manusia adalah manusia yang berada di kurun aku (para sahabat), kemudian orang yang menuruti mereka kemudian orang yang menuruti mereka...”

Terdapat hadis berkenaan sepuluh orang para sahabat yang dijamin syurga. Sebagaimana dalam hadis riwayat Imam an-Nasaie (8193):

أَخْبَرَنَا مُحَمَّدُ بْنُ الْمَنْفِي قَالَ أَنَا يَكْبِي بْنُ سَعِيدٍ قَالَ أَنَا
صَدَقَةُ بْنُ الْمَنْفِي قَالَ حَدَّثَنِي جَدِي رِبَاحُ بْنُ الْحَارِثِ أَنَّ
سَعِيدَ بْنَ زَيْدٍ قَالَ أَشْهَدُ عَلَى رَسُولِ اللَّهِ صَلَّى اللَّهُ عَلَيْهِ
وَسَلَّمَ إِمَّا سَمِعْتُ أَذْنَائِي وَوَعَاهُ قَلْبِي وَإِنِّي لَمْ أَكُنْ لَأَرْوَى
عَلَيْهِ كَذِبًا يَسْأَلُنِي عَنْهُ إِذَا لَقَيْتَهُ أَنَّهُ قَالَ أَبُو بَكْرٍ فِي الْجَنَّةِ
وَعُمْرٌ فِي الْجَنَّةِ وَعَلَيٍ فِي الْجَنَّةِ وَعُمَّانٌ فِي الْجَنَّةِ وَطَلَحَةٌ
وَالْزُّبَيرٌ فِي الْجَنَّةِ وَعَبْدُ الرَّحْمَنِ بْنُ عَوْفٍ فِي الْجَنَّةِ وَسَعْدُ بْنُ
مَالِكٍ فِي الْجَنَّةِ وَتَاسِعُ الْمُؤْمِنِينَ لَوْ شِئْتُ أَنْ أُسَمِّيهِ لَسَمِيتَهُ
فَرْجُ أَهْلِ الْمَسْجِدِ يَنَادِيهِ يَا صَاحِبَ رَسُولِ اللَّهِ صَلَّى
اللَّهُ عَلَيْهِ وَسَلَّمَ مِنَ النَّاسِ قَالَ نَاصِدُهُنَّ بِاللَّهِ الْعَظِيمِ أَنَا
تَاسِعُ الْمُؤْمِنِينَ وَرَسُولُ اللَّهِ صَلَّى اللَّهُ عَلَيْهِ وَسَلَّمَ الْعَاشرُ أَبُو
عَبِيْدَةَ بْنَ الْجَرَاحِ رَضِيَ اللَّهُ تَعَالَى عَنْهُ

Bermaksud: “ Muhammad Bin Al-Muthanna mengkhabarkan kepada kami. Beliau berkata : Yahya Bin Sa’id mengkhabarkan kepada kami. Beliau berkata: Sadaqah Bin Al-Muthanna mengkhabarkan kepada kami. Beliau berkata : Datuk aku, Rabah Bin Al-Harith menceritakan bahawa Sa’id Bin Zaid berkata : Aku bersaksi atas nama Rasulullah SAW yang mana aku dengar dengan kedua telingaku dan aku peliharanya dengan hatiku. Aku tidak akan meriwayatkan benda yang bohong. Nabi SAW bersabda : Abu Bakar di syurga, Umar di syurga, Ali di syurga, Uthman di syurga, Talhah di syurga, Zubair di syurga, Abdurrahman Bin ‘Auf di syurga dan Sa’ad Bin Malik di syurga. Dan orang yang kesembilan jika kalian mahu akan aku namakan. Lalu kesemua orang yang berada di masjid memintanya menamakan orang yang kesembilan. Mereka berkata : wahai sahabat Rasulullah, siapakah orang yang kesembilan?. Sa’id berkata : Demi Allah, akulah orang yang kesembilan dan orang yang kesepuluh adalah Abu Ubaidah Bin Al-Jarrah.”

Sepuluh sahabat yang dijamin syurga berdasarkan hadis tersebut:

- 1) Abu Bakar al-Siddiq RA.
- 2) Umar Bin al-Khattab RA.
- 3) Uthman al-Affan RA.
- 4) Ali bin Abi Talib RA.
- 5) Talhah Bin Ubaidullah RA.
- 6) Zubair Bin Al-Awwam RA.
- 7) Sa’ad Bin Abi Waqqas RA.
- 8) Abdurrahman Bin ‘Auf RA.
- 9) Sa’id Bin Zaid RA.
- 10) Abu Ubaidah Bin Al-Jarrah RA.

Namun, dalam bab ini hanya akan menjelaskan enam orang sahabat sahaja, kerana empat orang sahabat berbaki akan dijelaskan dalam bahagian kepimpinan *Khulafa ar-Rasyidin*.

2.2.1 Kisah Thalhah Bin Ubaidullah RA

Beliau adalah Thalhah bin Ubaidullah bin Utsman bin Amru bin Ka'ab bin Sa'ad bin Taim bin Murrah bin Ka'ab bin Lu'ai bin Ghalib bin Fihir bin Malik bin Nadhr bin Kinanah Al-Quraisy At-Ta'imi Al-Makki Al-Madani. Ibunya bernama al-Sha'bah binti Abdullah bin Abbad bin Malik, saudara perempuan al-'Ala' binti al-Hadrami. Berdasarkan salasilah keluarga Thalhah bin Ubaidillah RA, nasabnya (keturunan) bertemu dengan Rasulullah SAW pada Murrah. Beliau telah lahir pada tahun ke-28 sebelum hijrah di Mekah, berketurunan Quraisy.

Keislaman Thalhah bin Ubaidullah RA telah mengejutkan seluruh ahli keluarganya. Keluarga dan suku kaumnya berusaha mengeluarkannya semula dari Islam. Thalhah RA dipujuk rayu, namun kerana pendirian Thalhah RA sangat teguh mereka akhirnya bertindak kasar.

Seksaan demi seksaan telah dilakukan untuk mendera tubuhnya. Sekelompok pemuda telah memukul dan ada seorang wanita terus mencaci maki Thalhah RA. Wanita tersebut adalah ibunya, Sha'bah binti Hadramy. Walaupun disakiti dan dimalukan oleh orang yang sangat dicintai dan dihormatinya. Namun, Allah SWT dan Rasulullah SAW lebih dicintainya berbanding ibu dan ahli keluarganya yang lain.

Setelah keislamannya diketahui oleh orang Quraisy, Nufail bin Khuwailid RA, salah seorang pembesar yang terkenal dengan sebutan 'Singa Quraisy' mencari dirinya. Mereka bertemu Thalhah RA sedang berjalan dengan Abu Bakar RA dan kedua-duanya ditangkap dan diseksa. Thalhah dan Abu Bakar telah diikat dan

diancam. Tetapi mereka tidak berani bertindak terlalu keras dan kejam kerana khawatir dengan pembalasan dari kabilah Abu Bakar RA dan Thalhah RA.

Setelah pelbagai ancaman dilakukan namun tidak juga berhasil, akhirnya mereka melepaskannya kembali. Berdasarkan peristiwa ini, Abu Bakar RA dan Thalhah RA disebut sebagai ‘al-Qarinain’ yang bermaksud dua setangkai. Thalhah bin Ubaidullah RA termasuk dalam kalangan ‘as-sabiqunal awwalin’ (golongan yang terawal memeluk Islam), Thalhah juga adalah salah satu daripada 10 orang sahabat yang mendapat berita gembira iaitu golongan masuk ke syurga.

Semasa hidupnya, Rasulullah SAW memberikan pelbagai gelaran kepadanya kerana keistimewaan yang dimiliki Thalhah RA, antaranya ialah Thalhah al-Khair (Thalhah yang baik), Thalhah al-Fayyadh (Thalhah yang murah hati), dan Thalhah al-Jud (Thalhah yang dermawan). Thalha RA merupakan seorang saudagar yang mempunyai kemahiran dalam perniagaan. Kepakarannya dalam bidang perniagaan sehingga dapat mengalahkan pedagang-pedagang lain yang lebih berpengalaman.

Namun, hal itu tidak membuatnya sompong, justeru ia merasa sedih dan bimbang dengan harta yang dimilikinya. Ketika itu, Thalhah RA menerima harta dari Hadramaut, sebuah lembah di Yaman, senilai 700 ribu dirham. Kemudian isterinya, Su'da binti Auf, menyarankan untuk diberikan harta tersebut kepada fakir dan miskin. Beliau pun memberikan hartanya sehingga tidak berbaki sedikit pun.

Thalhah RA juga membayai pernikahan anak-anak muda dalam keluarganya dan mencukupkan keperluan perbelanjaan keluarga yang tidak mampu. Lantaran itu, Rasulullah SAW memberinya gelaran Thalhah al-Fayyadh.

Thalhah bin Ubaidullah RA merupakan salah seorang sahabat Nabi SAW yang selalu menyertai perperangan bersama baginda SAW kecuali dalam Perang Badar kerana pada ketika itu beliau telah ditugaskan untuk bersama Sa'id bin Zaid RA menuju Syam. Ketika Thalhah RA turut serta dalam perperangan Uhud dan menjadi pelindung atau benteng kepada Rasulullah SAW. Beliau berjuang paling hadapan dengan seluruh tenaga untuk menghalang musuh.

Kemudian, Rasulullah SAW memerintahkan Abu Bakar as-Siddiq RA dan Abu Ubaidah bin al-Jarrah RA untuk membantu Thalhah RA yang sedang berjuang seorang diri melawan pasukan musuh. Ketika ditemukan, keadaan Thalhah RA sudah berada dalam keadaan pengsan dan tubuhnya berlumuran darah, bahkan pergelangan tangannya putus sebelah. Keadaan tersebut membuatkan Abu Bakar RA dan Abu Ubaidah RA menyangka Thalhah RA sudah gugur syahid. Namun, sebenarnya Thalhah RA belum gugur syahid dan hanya pengsan sahaja. Keadaan tersebut yang membuatkan beliau mendapat gelaran syahid yang masih hidup daripada Rasulullah SAW.

Pada saat itu Rasulullah SAW sedang membaca ayat 23 dari Surah al-Ahzaab sebagai informasi Thalhah bin Ubaidullah RA adalah salah seorang yang dimaksudkan dalam firman Allah SWT tersebut. Firman Allah SWT dalam Surah al-Ahzaab (33) ayat 23:

مِنَ الْمُؤْمِنِينَ رِجَالٌ صَدَقُوا مَا عَاهَدُوا اللَّهُ عَلَيْهِ
فِيمُهُمْ مَنْ قَضَى نَحْبَهُ وَمِنْهُمْ مَنْ يَنْتَظِرُ وَمَا
بَدَأُوا تَبْدِيلًا

Maksudnya: *Di antara orang-orang yang beriman itu, ada yang bersikap benar menunaikan apa yang telah dijanjikannya kepada Allah (untuk berjuang membela Islam); maka di antara mereka ada yang telah selesai menjalankan janjinya itu (lalu gugur syahid), dan di antaranya ada yang menunggugiliran; dan mereka pula tidak mengubah (apa yang mereka janjikan itu) sedikitpun. (23)*

Thalhah RA adalah salah seorang daripada sepuluh sahabat Nabi SAW yang dijanjikan menjadi penghuni syurga. Pengorbanan luar biasa dari Thalhah bin Ubaidullah RA dalam membela Rasulullah SAW dan agama Islam membuatkannya mendapat jaminan untuk masuk syurga ketika masih hidup.

2.2.2 Kisah Zubair Bin Al-'Awwam RA

Beliau adalah Saidina Zubair ialah Abu Abdullah Zubair ibn al-Awwam ibn Khuwaylid ibn Asad ibn Abdul Uzza ibn Qusay RA. Lahir pada 594M bersamaan tahun ke-28 Hijrah di Mekah. Ayahnya bernama Awwam ibn Khuwailid RA, abang kepada isteri Baginda Nabi Muhammad SAW Khadijah binti Khuwailid RA, manakala ibunya pula bernama Safiyah binti Abdul Mutalib RA, Abang kepada panglima perang yang digelar "Singa Allah" iaitu Saidina Hamzah bin Abdul Mutalib RA. Saidina Zubair RA berkahwin dengan Asma binti Abu Bakar RA, dan merupakan menantu kepada Saidina Abu Bakar al-Siddiq RA dan dikurniakan tiga orang anak lelaki iaitu Abduulah bin Zubair, Urwah bin Zubair dan Ursu bin Zubair. Merupakan sahabat Nabi SAW dan sepupu Baginda SAW. Beliau digelar sebagai Pengawal Setia Rasullullah SAW.

Saidina Zubair bin Awwam RA termasuk ke dalam 7 orang pertama yang memeluk Islam saat usianya

berumur 15 tahun. Beliau dikenali sebagai seorang yang sangat berani, ini merupakan hasil didikan daripada ibunya sendiri yang merupakan wanita perang yang hebat dan berani yang telah menyertai banyak peperangan dalam Islam seperti peperangan Uhud, Khandaq dan Khaibar.

Namun berita pemeluk Islam Saidina Zubair RA tidak disenangi oleh kaum Quraisy Mekah. Bapa saudaranya sendiri Nufail bin Khuwailid telah menyeksa beliau dengan teruk kerana memeluk agama Islam. Nufail pernah meletakkan membakar jerami kering di atas badan Saidina Zubair RA. Beliau disekska dengan kepanasan api dan kepulan asap memasuki mata, hidung dan telinganya sehingga nafasnya sesak dan disuruh untuk meninggalkan Islam supaya mereka lepaskan seksaan tersebut. Namun Saidina Zubair RA menyatakan beliau tidak akan kembali pada kekafiran selama-lamanya, dan seksaan tersebut tidak membuat beliau berganjak dari keimanannya.

Suatu ketika beliau mendapat berita bahawa Nabi Muhammad SAW telah ditangkap dan ada riwayat menyatakan telah dibunuh. Mendengarkan berita itu, beliau pada ketika itu yang masih muda terus menghunus pedang dan meluru masuk ke tempat Nabi SAW. Namun setelah sampai ke tempat Nabi SAW ternyata berita tersebut adalah palsu. Tetapi Baginda SAW tetap mendoakan kebaikan kepada Zubair dan pedangnya kerana menghargai semangat beliau. Menurut ulama sirah, pedang Zubair bin Awwam itu adalah pedang pertama yang dihunus dalam Islam, dan beliau merupakan orang pertama kali yang menghunus pedang.

Demikianlah kecintaan Saidina Zubair RA kepada Rasulullah SAW. Membuktikan bahawa inilah sifat para sahabat yang disebutkan oleh Abu Sufyan; “Aku belum pernah melihat orang yang lebih mencintai seseorang

yang lain melebihi kecintaan sahabat Muhammad kepada Muhammad”

Ketika peristiwa hijrah ke Madinah, beliau antara individu yang berani berhijrah secara terang-terangan selain Saidina Umar RA dan Saidina Hamzah RA. Menunjukkan keberanian Zubair ini sejarah menunjukkan hampir semua peperangan yang berlaku ketika zaman Nabi SAW disertai oleh Saidina Zubair RA.

Dalam perang Uhud pula, ketika umat Islam dalam keadaan kucar kacir, datang seorang tentera musuh ke tengah pasukan umat Islam dan membunuh seorang demi seorang tentera Islam. Beliau begitu kuat dan tangkas. Melihat keadaan itu Rasulullah SAW bersabda: “Orang itu untukmu wahai Zubair”.

Sebaik sahaja Baginda SAW mengakhiri kata-katanya, Saidina Zubair RA terus berlari ke arah lelaki tersebut, laksana singa memburu mangsanya. Beliau memanjang ke satu tempat yang agak tinggi, lalu melompat ke atas lelaki tersebut yang berada di atas kudanya. Beliau menghumban lelaki itu hingga keduanya jatuh ke tanah. Mereka bergelut di atas tanah, hingga akhirnya Saidina Zubair RA berjaya berada di atas lelaki tersebut lalu terus membunuhnya.

Dalam perang Khandaq juga beliau berperanan besar. Ketika Rasulullah SAW bertanya para sahabat, siapa yang berani pergi ke kawasan musuh dan merisik maklumat, Zubair RA menjawab “Aku!”. Rasulullah bertanya lagi dan Zubair RA masih bersungguh menawarkan diri. Kali ketiga Rasulullah SAW bersabda sebagaimana dalam hadis riwayat Imam al-Bukhari (2847):

فَقَالَ النَّبِيُّ صَلَّى اللَّهُ عَلَيْهِ وَسَلَّمَ: إِنَّ لِكُلِّ نَبِيٍّ
حَوَارِيًّا وَإِنَّ حَوَارِيَ الزُّبَيرِ بْنِ الْعَوَّامِ

Bermaksud: Maka Nabi SAW bersabda:
“Setiap Nabi punya hawari (penjaga setia)
mereka dan hawariy aku (penjaga setia)
adalah Zubair bin al-Awwam!”.

Selain seorang tokoh pahlawan, Saidina Zubair RA adalah seorang peniaga dan hartawan. Beliau syahid dengan meninggalkan banyak harta. Setelah dibahagian kepada tiga bahagian, hartanya berbaki 1,200,000 Dinar yang dibahagikan kepada waris-warisnya.

Beginilah kisah sahabat Nabi Muhammad SAW yang merupakan sahabat, sepupu, teman dan penjaga yang sangat setia serta menyayangi Baginda SAW dan sanggup menentang musuh demi mempertahankan agama Islam serta melindungi Nabi SAW.

2.2.3 Kisah Sa'ad Bin Abi Waqqas RA

Beliau adalah Sa'ad ibn Malik ibn Uhaid ibn Abdul Manaf al-Zuhri dan dilahirkan pada 595 M di Mekkah. Dikenali sebagai Sa'ad bin Abi Waqqas, salah seorang sahabat yang terawal memasuki Islam pada 610-611 M. Sa'ad bin Abi Waqqas RA merupakan sepupu Aminah binti Wahab merangkap bapa saudara baginda SAW dari suku kaum Bani Zuhrah, berasal dari kota Mekah. Beliau mempunyai tubuh yang agak rendah tetapi tegap. Rambutnya hitam dan lebat. Beliau memeluk agama Islam ketika berumur 17 tahun.

Pekerjaan beliau semasa di kota Mekah adalah pembuat busur dan anak panah. Maka beliau juga cekap dalam kemahiran memanah. Sa'ad juga pernah dipukul dengan teruk oleh para pemuda Mekah disebabkan pengisytiharannya memasuki Islam. Keislaman beliau tidak menggembirakan ibunya. Bahkan ibunya menjadi begitu marah kepada Sa'ad RA lalu bersumpah mengugut tidak mahu makan dan tidak mahu minum sehingga mati supaya Sa'ad RA rasa bersalah dan menyesal seumur hidupnya. Melihat keadaan ibunya itu, beliau amat bersedih namun ibunya tetap dengan sumpahnya sehingga lemah tubuh badan dan kurus. Sa'ad RA pula tidak jemu merayu dan memujuk ibunya serta menyediakan makanan dan minuman untuk dimakan namun ibunya tetap dengan pendiriannya.

Akhirnya, Sa'ad RA berkata kepada ibunya: "Wahai ibu, sungguh aku kasih kepadamu, dan aku juga kasih pada Allah dan Rasul. Ketahuilah, sekalipun Tuhan memberikan kamu 1000 nyawa dan nyawa itu pergi satu demi satu, aku tetap tidak akan berganjak dari agamaku." Setelah melihat ketegasan Sa'ad RA, ibunya akur dan mengalah. Akhirnya dia menjamah juga makanan dan minuman yang disediakan.

Ketika itu turunlah ayat Allah SWT, sebagaimana dalam Surah Luqman (31) ayat 15:

وَإِنْ جَاهَدَاكَ عَلَىٰ أَنْ تُشْرِكَ بِي مَا لَيْسَ لَكَ بِهِ
عِلْمٌ فَلَا تُطِعْهُمَا وَصَاحِبُهُمَا فِي الدُّنْيَا مَعْرُوفٌ
وَاتَّبِعْ سَيِّلَ مَنْ أَنْابَ إِلَيَّ ثُمَّ إِلَيَّ مَرْجِعُكُمْ
فَأُنْبِئُكُمْ بِمَا كُنْتُمْ تَعْمَلُونَ ﴿١٥﴾

Bermaksud: Dan jika mereka berdua mendesakmu supaya engkau mempersekuatkan denganKu sesuatu yang engkau - dengan fikiran sihatmu - tidak mengetahui sungguh adanya maka janganlah engkau taat kepada mereka; dan bergaulah dengan mereka di dunia dengan cara yang baik. Dan turutlah jalan orang-orang yang rujuk kembali kepadaKu (dengan tauhid dan amal-amal yang soleh). Kemudian kepada Akulah tempat kembali kamu semuanya, maka Aku akan menerangkan kepada kamu segala yang kamu telah kerjakan. (15)

Jasa dan sumbangan Sa'ad bin Abi Waqqas RA adalah amat besar dalam melindungi Islam. Apabila memeluk Islam, beliau menggunakan bakat dan kemahiran dalam memanah untuk mempertahankan Islam.

Dalam perang Uhud, ketika Rasulullah diserang oleh tentera musyrikin, beliau salah seorang yang melindungi baginda SAW dengan melepaskan anak-anak panah terhadap musuh-musuh yang cuba mara. Semua panahan beliau tepat mengenai sasaran.

Beliau juga terkenal kerana peranannya dalam penaklukan Empayar Parsi pada 636 dan pemergiannya ke China pada 616 dan 651. Beliau merupakan sahabat yang berjasa besar dalam mengetuai tentera Islam untuk melumpuhkan seluruh kekuatan angkatan perang Parsi. Sa'ad bin Abi Waqqas RA berjaya menewaskan tentera Parsi dalam peperangan yang dikenali sebagai Perang al-Qadisiyyah, Beliau digelar Pahlawan Qadisiyyah.

Pada pemerintahan Khalifah Umar al-Khattab RA, Sa'ad bin Abi Waqqas RA merupakan antara individu yang membangunkan kota Kufah di Iraq dan beliau kemudiannya dilantik sebagai gabenor di Kufah oleh khalifah berikutnya iaitu Saidina Uthman bin Affan RA. Sa'ad RA pernah dilantik untuk mengetuai rombongan umat Islam ke tanah besar China untuk menyebarkan agama Islam di sana sekaligus menyebabkan Sa'ad dikenali sebagai perintis kepada pemulaan tamadun Islam di China. Beliau meninggal dunia pada 674M.

2.2.4 Kisah Abdul Rahman Bin 'Auf RA

Nama penuh Abdurrahman Bin 'Auf ialah Abdul Rahman bin Auf bin Abdul Harith bin Zahran bin Kilab bin Murrah bin Kaab bin Luay al-Qurays al-Zuhri. Ibunya bernama Syifa' bin Auf daripada suku Zahrah bin Kilab yang terkenal dengan kabilah yang mempunyai sifat yang mulia. Beliau adalah antara yang terawal memeluk Islam dan salah seorang daripada 10 orang yang dijamin syurga oleh Nabi SAW. Beliau juga adalah antara 8 orang sahabat Rasulullah SAW yang memeluk Islam di tangan Sayidina Abu Bakar.

Abdul Rahman RA mempelajari agama daripada Nabi SAW dan sentiasa berada dalam majlis ilmu Nabi SAW. Beliau antara sahabat Nabi SAW yang mempunyai pemikiran yang tajam, cerdik dan cepat memahami sesuatu hukum yang diajar oleh Baginda SAW. Beliau akan terus beramal dengan apa yang diajari oleh

Baginda SAW dan akan mengajar serta menyebarkan kepada masyarakat. Abdul Rahman bin Auf RA juga diberi kebenaran oleh Nabi SAW untuk mengeluarkan fatwa dalam perkara-perkara agama.

Beliau pernah digelarkan sebagai “orang yang dipercayai di bumi dan orang yang dipercayai di langit”. Ini dinyatakan oleh Sayidina Ali bin Abi Talib RA bahawa: Aku pernah mendengar Nabi SAW bersabda, maksudnya: “Engkaulah orang yang dipercayai di bumi dan orang yang dipercayai di langit”. Amanah dan benar adalah suatu sifat yang baik daripada pelbagai jenis sifat baik yang lain. Apabila Rasulullah SAW memberi pengakuan kepada Abdul Rahman bin Auf RA dengan sifat tersebut yang jarang dimiliki oleh manusia lain, bererti beliau telah diperaku sifatnya oleh Baginda SAW yang kekal sepanjang zaman. Ia merupakan penghargaan yang paling tinggi diberikan kepada beliau.

Sejak kecil lagi beliau tidak melakukan perbuatan buruk yang dilakukan oleh masyarakat jahiliyyah pada zamannya seperti berzina, menyembah berhala, berjudi, minum arak, berpoya-poya dan sebagainya.

Abdul Rahman bin Auf RA Seorang Sahabat yang Dermawan. Abdul Rahman bin Auf RA terkenal dengan akhlak yang mulia, berbudi pekerti, dermawan, bersifat penyayang, suka menolong orang susah dan bertoleransi. Abdul Rahman bin Auf sangat takut kepada Allah SWT di atas anugerah harta kekayaan yang melimpah ruah. Beliau pernah menemui Ummu Salamah RA dan berkata: “Wahai Ibu Kaum Muslim, saya bimbang kerana saya mempunyai harta yang banyak. Ia akan membinasakan saya. Ini kerana sayalah antara orang Quraisy yang banyak harta. Lalu Ummu Salamah RA menjawab: “Wahai anakku, perbanyakkan sedekah”.

Abdul Rahman RA pernah meratapi di atas kematian para sahabat yang lain. Antaranya kematian Mus'ab bin

Umair RA yang mati terbunuh yang lebih baik daripada dirinya, di saat kematian Mus'ab RA tidak mempunyai kain untuk dikafankan. Apabila ditutupi kepadanya, maka kedua-dua kakinya kelihatan, jika ditutup kedua kakinya ternampak pula kepalanya. Begitu juga beliau meratapi kematian Hamzah bin Abdul Muattalib RA meninggal dalam keadaan miskin. Lalu beliau berkata: "Allah SWT memberiku kekayaan yang lebih daripada orang lain, oleh itu aku sangat takut kepada Allah..."

Pernah sahabat bertanya kepadanya tentang rahsia kekayaan. Lalu beliau menjawab: "Aku tidak pernah menjual barang yang cacat dan tidak mengharapkan keuntungan yang banyak, tetapi memadai dengan keuntungan yang sedikit, pasti Allah SWT akan memberkatinya.

Ibrahim bin Saad pernah berkata: "Ketika Abdul Rahman bin Auf RA menjual harta bahagaiannya daripada ghanimah perang Bani an-Nadir, dia telah mendapat 40 ribu dinar dan beliau telah menyerahkan semunya kepada isteri Nabi SAW".

Semasa hayat Baginda Nabi SAW, Abdul Rahman bin Auf RA pernah menyedekahkan separuh daripada hartanya iaitu 40 ribu dinar. Beliau juga pernah menyedekahkan 500 ekor unta untuk kegunaan dalam peperangan fi sabilillah. Semua harta tersebut adalah hasil daripada perniagaannya. Beliau pernah memberikan 400 dinar kepada setiap para sahabat yang menghadiri perang Badar

Selain itu, Abdul Rahman bin Auf RA juga banyak membebaskan hamba dengan pelbagai cara. Beliau mengeluarkan wang yang banyak. Antaranya beliau pernah memerdekaan seramai 30 ribu orang hamba. Ada riwayat yang menjelaskan beliau pernah memerdekaan hamba dalam satu hari 30 orang hamba. Menurut riwayat Abdullah bin Abbas, ketika Abdul

Rahman bin Auf RA sakit, beliau telah berwasiat untuk sepertiga hartanya untuk disedekahkan.

Abdul Rahman Bin Auf RA wafat pada 32 Hijrah semasa usia 72 tahun, Abdul Rahman bin Auf RA telah meninggal dunia. Jenazah beliau disembahyangkan oleh Sayidina Uthman dan dimaqamkan diperkuburan Baqi' sebagaimana wasiat beliau.

2.2.5 Kisah Sa'id Bin Zaid RA

Beliau ialah Said bin Zaid bin Amru bin Naufal bin Abdul Uzza bin Rabah bin Qarthah. Nasabnya bertemu dengan Rasulullah SAW pada datuknya iaitu Kaab bin Luai bin Ghalib. Ibunya Fatimah bin Ba'jah daripada suku Khuza'ah. Said bin Zaid RA telah berkahwin dengan Fatimah bin al-Khattab RA, adik kepada Umar bin al-Kattab, antara wanita yang terkenal dalam kalangan kaum Qurasyi. Beliau juga antara muslimah terawal memeluk Islam. Mereka berdualah menjadi punca keislaman Sayidina Umar al-Khattab RA.

Ayahnya Zaid bin Amru RA adalah antara orang yang berpegang teguh kepada agama Nabi Ibrahim AS. Ayahnya juga adalah antara orang yang mendapat kemuliaan kerana sempat bertemu dengan Rasulullah SAW dan dapat bersama dengan Baginda SAW, walaupun meninggal dunia sebelum Baginda SAW menjadi Rasul.

Justeru, Said bin Zaid RA dari sejak muda hidup dan dibesarkan dalam kalangan keluarga yang kuat beribadah kepada agama tauhid yang suci. Beliau seorang pemuda yang suci, berakhlak mulia dan berbudi pekerti yang tinggi.

Said bin Zaid RA adalah antara 10 sahabat yang dijamin syurga. Kata Said: "Kami bersama Rasulullah SAW di gua Hira pada suatu hari. Lalu Rasulullah SAW

bersabda: Wahai Hira'! Tiadalah di atasmu ini melainkan mereka dari golongan Nabi, Siddiq dan Syahid (golongan ahli syurga.)" Sahabat bertanya Said: "Siapakah yang ada ketika itu?" "Rasulullah SAW, Abu Bakar, Umar, Uthman, Ali, Talhah, Zubair, Saad, Abdurrahman". Jelas Said. Sahabat bertanya lagi: "Dan yang kesepuluh?" "Aku.." Jawab Said.

Said bin Zaid RA adalah antara sahabat yang sangat rajin berusaha mendalami dan mempelajari ilmu agama yang diamalkan oleh ayahnya. Beliau sentiasa menanti dan menunggu ketibaan Nabi SAW yang diceritakan oleh ayahnya. Oleh itu, apabila datangnya ajaran Nabi Muhammad SAW, beliau terus menerima tanpa ragu-ragu.

Rasulullah SAW amat menyayangi Said bin Zaid RA. Beliau antara sahabat yang terawal memeluk Islam dan Baginda SAW meletakkan beliau di tempat kedudukan yang tinggi dalam Islam. Beliau bersama Rasulullah SAW berhijrah ke Madinah. Beliau antara sahabat yang bekerja keras membangunkan kota Madinah. Seluruh masa, tenaga dan hartanya digunakan untuk membangunkan negara Islam Madinah. Malah beliau sentiasa berada dalam majlis ilmu Nabi SAW. Beliau mendengar hadis-hadis daripada Nabi SAW dan meriwayatkan pula kepada orang ramai. Dikatakan Said bin Zaid RA telah meriwayatkan 48 hadis yang sebahagian besarnya diriwayatkan oleh Imam Bukhari dan Muslim.

Said bin Zaid RA seorang yang sangat zuhud. Beliau pernah ditawarkan jawatan gabenor oleh Abu Ubaidah, namun beliau menolak jawatan tersebut kerana sifat zuhud beliau. Beliau tidak pernah bermegah dengan kehidupan dunia dan kedudukannya. Perwatakannya sering menjadi teladan kepada pembesar-pembesar pada zamannya. Said bin Zaid RA tidak pernah menuntut sebarang jawatan. Beliau tidak mengejar

pangkat dan kedudukan serta habuan dunia. Beliau menjauhkan diri daripada segala urusan yang berkaitan pemerintahan dan kuasa.

Antara kelebihan Said bin Zaid RA adalah doanya sentiasa mustajab. Ini kerana beliau seorang yang sangat menjaga makanan dan minuman daripada perkara-perkara yang haram dan syubhat. Beliau tidak akan makan dan minum, kecuali setelah meyakini halal, bersih dan suci.

Kebaikan Said bin Zaid RA sangat terkenal di kalangan umat Islam pada zamannya, sehingga ada di kalangan isteri-isteri Nabi SAW mewasiatkan agar mendoakan untuk diri mereka apabila meninggal dunia. Ini adalah kerana kedudukan dan darjah Said bin Zaid RA yang tinggi di sisi Allah SWT.

Said bin Zaid RA telah menyertai banyak peperangan bersama Rasulullah SAW. Antaranya seperti perang Uhud, Khandak, Khaibar, Pembukaan Kota Mekkah dan Hunain dan banyak lagi. Beliau mengutamakan jihad berbanding dengan yang lain. Seluruh kehidupan dan umurnya dihabiskan untuk berkhiidmat kepada masyarakat, berkorban segala jiwa dan raga untuk Islam demi Allah dan RasulNya. Segala hartanya diinfaqkan untuk agama demi mencari kehidupan akhirat yang kekal abadi.

Pada tahun 51 Hijrah, hari Jumaat Said bin Zaid RA telah meninggal dunia dan jenazahnya diusung untuk dimaqamkan di Madinah. Dua orang sahabat Rasulullah SAW iaitu Saad bin Abu Waqas RA dan Abdullah Ibn Umar RA telah menyempurnakan jenazahnya.

2.2.6 Kisah Abu Ubaidah Bin Al-Jarrah RA

Beliau adalah 'Amir bin Abdullah bin Al-Jarrah bin Hilal bin Uhaib bin Dhabbag bin Al Harith Al-Fihry Al-Quraisy

atau lebih dikenali sebagai Abu Ubaidah Al-Jarrah merupakan seorang sahabat Rasulullah SAW yang lahir di kalangan keluarga pedagang Quraisy yang sangat dihormati dan disegani di kota Mekkah. Beliau termasuk orang yang awal memeluk agama, selepas Abu Bakar As-Siddiq RA. Pengislaman Abu Ubaidah RA telah disaksikan oleh Abdul Rahman bin 'Auf RA, Uthman bin Maz'un RA dan al-Arqam bin Abi al-Arqam RA yang sama-sama mengucapkan syahadah di hadapan Rasulullah. Ummul Mukminin Saidatina Aisyah RA menukilkan bahawa di samping Saidina Abu Bakar RA, Umar RA, antara para sahabat yang dicintai oleh Rasulullah SAW adalah Abu Ubaidah Al-Jarrah RA. Kehebatan peribadi Saidina Abu Ubaidah Al-Jarrah RA yang berperwatakan tinggi, kurus, bermuka ceria, berakhhlak mulia, selalu merendah diri dan pemalu. Sebagaimana dalam hadis riwayat Imam al-Bukhari (4382), Nabi SAW bersabda:

لِكُلِّ أُمَّةٍ أَمِينٌ، وَأَمِينٌ هَذِهِ الْأُمَّةُ أَبُو عُبَيْدَةَ بْنُ
الْجَرَاحِ

Bermaksud: “Sesungguhnya setiap umat mempunyai orang kepercayaan, dan kepercayaan umat ini adalah Abu Ubaidah bin al-Jarrah.”

Sebagaimana sahabat Rasulullah SAW yang lain, Saidina Abu Ubaidah RA turut menerima seksaan dan pelbagai ancaman dari kaum musyrikin Quraisy. Ketika hayatnya, Abu Ubaidah RA berpeluang untuk mengikuti semua peperangan bersama Rasulullah SAW. Kepahlawanan beliau di medan perang amat menggerunkan musuh, sehingga masing-masing mengelak daripada bertembung dengan Saidina Abu Ubaidah RA. Keutuhan iman beliau pernah diuji hebat dalam perang Badar di mana Saidina Abu Ubaidah RA

terpaksa berhadapan dengan keluarga termasuk ayah kandungnya sendiri.

Dalam peperangan Uhud, tatkala pasukan Islam berantakan apabila diserang tentera berkuda kafir Quraisy dari arah belakang, keadaan Nabi SAW juga turut terancam. Susuk tubuh baginda dicari oleh setiap kafir Quraisy yang mahu membunuhnya. Tanpa mengendahkan keselamatan diri, Saidina Abu Ubaidah RA berlari untuk memberikan perlindungan kepada Nabi Muhammad SAW yang amat dicintainya bersama-sama sahabat yang lain tanpa berasa takut walau sedikit pun. Mereka membentuk benteng manusia, menadah tubuh sendiri bagi menahan serangan musuh terhadap baginda Nabi SAW.

Akibat serangan bertali arus yang dahsyat, gigi geraham Rasulullah SAW patah manakala kulit dahinya terkoyak serta bibirnya luka. Keadaan Baginda SAW yang dikasih itu sangat meruntun setiap jiwa yang melihatnya. Apabila didapati pipi Rasulullah SAW cedera dengan tertusuknya rantai besi penutup kepala Baginda SAW, Abu Bakar RA cuba mencabutnya dengan menggunakan tangan. Namun Abu Ubaidah RA meminta agar urusan itu dilakukan olehnya kerana bimbang jika dicabutnya mata rantai itu dengan tangan, ianya akan menyakitkan Rasulullah SAW. Oleh demikian, beliau berusaha mencabutnya menggunakan gigi kacipnya dengan cara menggigitnya sehingga mata rantai itu tercabut. Perihal ini menjadi sebahagian giginya rosak dan rongak.

Saidina Abu Ubaidah RA merupakan sahabat Rasulullah SAW yang bersifat zuhud. Ketika kekuasaan Islam telah meluas setelah perang di Yarmuk, ketika mana tentera muslimin hampir membebaskan Baitul Maqdis daripada cengkaman Rom, khalifah Umar al-Khattab RA telah membuat kunjungan dan singgah ke khemah Abu Ubaidah RA. Namun, tidak terlihat sesuatupun di

dalamnya yang berharga kecuali pedang dan perisai. Sedangkan sekiranya Saidina Abu Ubaidah RA mahu, tentunya beliau boleh hidup mewah daripada hasil harta rampasan daripada kemenangan perang-perang yang beliau sertai selama ini.

Pada suatu ketika, tatkala Saidina Abu Ubaidah RA memimpin tentera Islam sebagai panglima di negeri Syam, wabak penyakit taun telah melanda di sana sehingga mengakibatkan lebih 20,000 nyawa terkorban. Atas kegusaran dan kebimbangan terhadap keselamatan diri Abu Ubaidah RA, Khalifah Umar al-Khattab RA segera mengirim surat untuk memanggil Abu Ubaidah RA kembali ke Madinah. Namun, Abu Ubaidah RA telah membalias surat Saidina Umar RA dengan memohon agar ditarik semula arahan tersebut dan menyatakan pendiriannya untuk kekal bersama tenteranya yang lain di Syam bagi meneruskan misi jihad.

Akhirnya, Abu Ubaidah RA diserang penyakit taun dan meninggal dunia pada tahun ke-18 hijrah ketika berumur 58 tahun di wilayah Syam. Jenazahnya dikebumikan di kawasan yang pernah dibebaskannya daripada kekuasaan Rom dan Parsi. Sebelum kematian, Saidina Abu Ubaidah RA sempat berwasiat kepada barisan tenteranya untuk istiqamah dalam melakukan ibadat dan kebaikan.

Beliau juga berpesan agar saling nasihat menasihati, tidak menipu, dan jangan terpesona dengan harta dunia yang bersifat sementara kerana sesungguhnya Allah SWT telah menetapkan kematian untuk setiap manusia. Orang yang paling beruntung adalah orang yang paling taat kepada Allah SWT dan paling banyak bekalnya untuk akhirat.

BAHAGIAN 3

PEPERANGAN DALAM ISLAM

3. PEPERANGAN DALAM ISLAM

Peperangan adalah suatu yang tidak asing lagi dari lembaran sirah perjuangan Nabi SAW. Sejarah peperangan Nabi SAW dalam usaha mempertahankan agama, meninggikan syiar dan mengalahkan musuh yang menzalimi umat Islam perlu dikenang serta dijadikan iktibar.

Pengajaran dari peristiwa peperangan sangat penting kerana dunia Islam sehingga hari ini tidak pernah sunyi daripada intipan, perancangan jahat dan serangan sama ada secara psikologi serta fizikal untuk meruntuhkan kedaulatan dan keutuhan Islam.

Peperangan melibatkan Nabi SAW bermula selepas hijrah ke Madinah sebanyak 84 siri peperangan menentang kaum musyrikin.

Peperangan di dalam Islam adalah jihad. Ia merupakan jihad dengan pengertian khusus yang diistilahkan sebagai *Qital Fi Sabilillah* iaitu berperang pada jalan Allah SWT. Dari segi syarak, *Qital Fi Sabilillah* bermaksud: “Menggunakan semaksima segala kekuatan, kuasa dan upaya yang ada serta menanggung kepayahan, kesukaran untuk memerangi musuh dan menangkis serangannya”

Ibnu Qayyim al-Jauziyah meletakkan jihad itu terbahagi kepada empat peringkat iaitu peringkat hawa nafsu, syaitan, jihad terhadap orang bukan Islam dan munafik dan jihad kepada para penzalim, pelaku bid'ah dan kemungkaran.

Peperangan melibatkan Nabi SAW tidak dikaitkan sebagai kekejaman atau keeganasan, sebaliknya Baginda diwahyukan oleh Allah SWT untuk menyelamatkan umat Islam daripada ancaman

musyrikin Quraisy. Firman Allah SWT dalam Surah al-Hajj (22) ayat 39-40:

أُذنَ لِلَّذِينَ يُقْتَلُونَ بِأَنَّهُمْ ظُلْمُواٰ وَإِنَّ اللَّهَ عَلَى نَصْرِهِمْ لَقَدِيرٌ
ۚ أَلَّاَنِ أَخْرِجُوا مِن دِيَرِهِم بِعِيرٍ حَقٍ إِلَّا أَن يَقُولُوا رَبُّنَا
اللَّهُ وَلَوْلَا دَفْعَ اللَّهِ النَّاسَ بِعَصْبِهِمْ لَهُدِمَتْ صَوَامِعُ
وَبَيْعٌ وَصَلَوَاتٌ وَمَسَاجِدُ يُذْكُرُ فِيهَا أَسْمُ اللَّهِ كَثِيرًا
وَلَيَنْصُرَنَّ اللَّهُ مَن يَنْصُرُهُ وَإِنَّ اللَّهَ لَقَوْيٌ عَزِيزٌ
ۚ

Maksudnya: Diizinkan berperang bagi orang-orang (Islam) yang diperangi (oleh golongan penceroboh), kerana sesungguhnya mereka telah dianiaya; dan sesungguhnya Allah Amat Berkusa untuk menolong mereka (mencapai kemenangan). (39) Iaitu mereka yang diusir dari kampung halamannya dengan tidak berdasarkan sebarang alasan yang benar, (mereka diusir) semata-mata kerana mereka berkata: "Tuhan kami ialah Allah". Dan kalaularah Allah tidak mendorong setengah manusia menentang pencerobohan setengahnya yang lain, nescaya runtuhalah tempat-tempat pertapaan serta gereja-gereja (kaum Nasrani), dan tempat-tempat sembahyang (kaum Yahudi), dan juga masjid-masjid (orang Islam) yang sentiasa disebut nama Allah banyak-banyak padanya dan sesungguhnya Allah akan menolong sesiapa yang menolong ugamaNya (ugama Islam); sesungguhnya Allah Maha Kuat, lagi Maha Kuasa; - (40)

Nabi SAW berperang kerana iman dan sejarah menjadi saksi tidak ada satu kaum mahupun daerah yang hancur dimusnahkan oleh tentera Muslimin pada zaman Nabi SAW. Perlu difahami bahawa tidak ada suatu perperangan yang dimulakan oleh umat Islam

terlebih dahulu, sebaliknya peperangan yang berlaku adalah bertujuan untuk mempertahankan hak dan menangkis serangan daripada pihak musuh.

Strategi Nabi SAW dalam peperangan lebih kepada tujuan dakwah iaitu menawan dan mengislamkan kaum Musyrikin, bukan dengan niat lain seperti melakukan penjajahan, kezaliman dan sebagainya.

3.1 Perang Badar

Serangan yang dilakukan oleh Abdullah Ibn Jahshin terhadap angkatan perdagangan kaum Quraisy pada bulan Rejab yang diharamkan berperang merupakan satu tampanan dan cabaran hebat buat mereka. Kaum Quraisy berasakan kematian al-Hadhrami seharusnya dibela dan memusnahkan semua pihak yang bersangkutan dengan pembunuhan itu. Rasulullah SAW sememangnya menyedari pihak Quraisy pasti akan menuntut bela. Maka Baginda SAW telah membuat persediaan yang lebih awal.

Pada bulan Ramadan tahun 2 Hijrah, Rasulullah SAW bersama 313 orang tentera telah keluar dari Madinah untuk menyekat angkatan perdagangan kaum Quraisy yang pulang dari negeri Syam (Syria) dalam usaha mereka hendak melemahkan persiapan tentera Quraisy Mekah untuk menyerang Madinah.

Abu Sufian yang mengetuai angkatan perdagangan tersebut telah menyedari tindakan Rasulullah SAW itu lalu beliau telah menghantar utusannya yang bernama Dhamdham bin Amru al-Ghfari meminta bantuan dari Mekah.

Di Mekah pula, 3 hari sebelum Dhamdham sampai, Atiqah Binti Abdul Mutalib telah bermimpi sesuatu yang sungguh menakutkan. Atiqah telah bermimpi melihat seorang lelaki datang ke Kota Mekah menaiki unta. Kemudian berhenti di kawasan lapang di tengah Kota Mekah lalu berteriak dengan suara yang amat kuat: “*Wahai kaum Quraisy kamu akan berangkat ke tempat kematian, dalam masa 3 hari lagi.*”

Atiqah melihat manusia berkumpul berhampiran lelaki musafir tersebut kemudian dia masuk ke dalam masjid diikuti dengan orang ramai dan berdiri didepan Kaabah dan dilaungkan lagi perkataan yang sama. Lelaki itu kemudian berdiri dihadapan Abu Qais dan diulangi ucapannya buat kali ketiga. Lelaki musafir itu kemudian mengambil batu besar dan melemparkannya. Batu itu jatuh bergolek. Ketika batu itu tiba dibawah gunung, ia pecah berkeping-keping. Tidak sebuah rumah pun yang ada di Mekah terlepas dari dimasuki pecahan batu besar tersebut.

Mimpi Atiqah itu walaupun diminta supaya dirahsiakan, telah tersebar luas di Kota Mekah hingga sampai ke pengetahuan Abu Jahal. Tetapi Abu Jahal dengan sikap bongkok dan sombongnya tidak mempedulikan mimpi itu malah memperlekehkannya.

Al-Abbas bin Abdul Muthalib, orang pertama yang mengetahui tentang mimpi Atiqah telah mendengar saudaranya diejek oleh Abu Jahal. Beliau ingin mempertahankan saudaranya lalu keluar untuk mencari Abu Jahal. Ketika beliau terjumpa Abu Jahal, Dhamdham, iaitu utusan daripada Abu Sufian telah sampai ke Mekah dengan membawa berita Abu Sufian meminta bantuan. Ketika itu juga Mekah menjadi kecoh dengan berita ini. Ramai pembesar Quraisy berasa marah dengan tindakan Nabi Muhammad SAW. Lalu mereka mengumpulkan orang untuk keluar membantu Abu Sufian. Tidak ada seorang lelaki pun yang ketinggalan dalam perperangan ini. Ada diantara mereka yang tidak dapat turut serta akan mengutus orang suruhan mereka.

Sebelum berlaku perperangan di Badar, Nabi Muhammad SAW telah mengutuskan Talhah Bin Ubaidullah RA dan Said bin Zaid RA untuk mengumpul maklumat tentang kabilah Abu Sufian. Mereka mengumpulkan maklumat yang perlu dan kembali ke Madinah untuk menyampaikan hasil risikan mereka kepada Rasulullah SAW. Baginda SAW bergerak bersama para pengikutnya. Baginda SAW sekali lagi mengutus Ali bin

Abu Talib RA, Zubir bin al-Awwam RA dan Saad Bin Abi Waqqas RA bersama beberapa orang lain untuk ke Badar bagi mengumpulkan maklumat terbaru tentang orang kafir Quraisy sebelum Nabi SAW bergerak ke Badar.

Mereka memperoleh maklumat daripada dua orang budak lelaki yang mendedahkan tempat persinggahan orang kafir Quraisy. Apabila Rasulullah SAW bertanya berapa ekor binatang yang disembelih untuk makanan mereka setiap hari, kanak-kanak itu menjawab 9 atau 10 ekor. Dengan kebijaksanaan Rasulullah SAW, Baginda SAW dapat mengagak jumlah tentera musuh ada lebih kurang 900 hingga 1000 orang tentera.

Dengan maklumat tersebut, timbul kekhawatiran dan kerisauan pada Rasulullah SAW jika terdapat tentera Muslimin yang akan menarik diri daripada perperangan tersebut. Pada mulanya tujuan Nabi Muhammad SAW berangkat dari Madinah adalah untuk mengejar seperangkatan unta yang memuatkan barang dagangan kaum Quraisy diketuai oleh Abu Sufian. Walaubagaimanapun, rombongan tersebut dapat menuju ke Mekah.

Pasukan tentera kafir Quraisy begitu besar berlipat kali ganda dan alatan perang Quraisy lebih lengkap berbanding tentera muslimin.

Dengan kebijaksanaan sebagai seorang Nabi SAW dan pesuruh Allah SWT, maka Nabi Muhammad SAW mengadakan *musyawarah* (perbincangan) bersama pahlawan-pahlawan tenteranya meminta pendapat mereka. Pada mulanya, mereka berkata bahawa mereka keluar hanya untuk merampas harta dagangan Quraisy dan bukan untuk berperang. Ketika itu Rasulullah SAW amat berasa susah hati dan berubah wajahnya. Sebagaimana dalam hadis riwayat Imam al-Bukhari (4333) dan riwayat Imam Ahmad (12041) dan (12977):

فَقَامَ أَبُو بَكْرٍ -رَضِيَ اللَّهُ عَنْهُ- مُوافِقًاً وَمُؤْيَدًا ذَلِكَ، وَقَامَ
 بَعْدَهُ عَمَرُ بْنُ الْحَطَابِ وَالْمَقْدَادُ بْنُ عَمْرُو -رَضِيَ اللَّهُ
 عَنْهُمَا- مُؤْكِدِينَ عَلَى الْمَوْافِقَةِ، حَتَّى قَالَ الْمَقْدَادُ بْنُ عَمْرُو
 كَلَامًا رَائِعًا: "يَا رَسُولَ اللَّهِ، امْضِ لِمَا أَرَاكَ اللَّهُ فَنَحْنُ
 مَعَكَ، وَاللَّهُ لَا تَقُولُ لَكَ كَمَا قَاتَتْ بَنُو إِسْرَائِيلَ لِمُوسَى:
 اذْهَبْ أَنْتَ وَرَبُّكَ فَقَاتِلَا إِنَّا هَا هُنَا قَاعِدُونَ، وَلَكِنْ
 اذْهَبْ أَنْتَ وَرَبُّكَ فَقَاتِلَا إِنَّا مَعْكُمَا مُقَاتِلُونَ، فَوَالَّذِي
 بَعْثَكَ بِالْحُقْقِ لَوْ سِرْتَ بِنَا إِلَى بَرْكَ الْغَمَادِ جَاهَدْنَا مَعَكَ
 مِنْ دُونِهِ حَتَّى تَبْلُغُهُ".¹

Bermaksud: Apabila Abu Bakar RA melihat keadaan ini, lalu beliau berkata: “Ya Rasulullah, lebih baik kita bertempur dengan musuh!”. Diikuti pula dengan Umar RA. Kemudian seorang sahabat Miqdad Bin al-Aswad lalu berdiri dan berkata: “Ya Rasulullah, teruskanlah dengan apa yang Allah telah perintahkan pada Tuan! Nescaya kami akan turut serta. Demi Allah, kita tidak akan berkata kepada Tuan seperti perkataan kaum Bani Israil kepada Nabi Musa pada zaman dahulu. “Pergilah engkau bersama Tuhanmu, maka berperanglah engkau berdua. Kami sesungguhnya akan duduk termenung saja.”. Akan tetapi kami berkata kepada Tuan sekarang “Pergilah Tuan bersama Tuhan Tuan! Dan berperanglah Tuan bersama Tuhan Tuan. Kami sesungguhnya bersama Tuan dan Tuhan Tuan. Kami akan ikut serta berperang. Demi Allah, jika lau Tuan berjalan

dengan kami sampai ke desa Barkul Ghamad, nescaya kami berjuang bersama Tuan daripada yang lainnya”.

Ketika itu Rasulullah SAW juga ingin kepastian daripada kaum Ansar. Melihat keadaan itu, Saad Bin Muaz RA lalu berdiri dan berkata dengan kata-kata yang memberi keyakinan kepada Rasulullah SAW sama seperti kaum Muhajirin. Diikuti pula oleh suara-suara pahlawan yang lain.

Setelah mendengar kata-kata daripada sahabat dan tenteranya yang sungguh meyakinkan, bercahayalah muka Nabi Muhammad SAW dan terpancar kegirangannya. Pada saat itu juga Allah menurunkan wahyunya yang tercatat dalam Surah al-Anfal (8) ayat 5-7 yang bermaksud:

كَمَا أَخْرَجَكُمْ رَبُّكُم مِنْ بَيْتِكُمْ بِالْحُقْقِ وَإِنَّ فَرِيقَةً مِنَ
الْمُؤْمِنِينَ لَكَرِهُونَ ﴿٥﴾ يُجَدِّلُونَكُمْ فِي الْحُقْقِ بَعْدَ مَا
تَبَيَّنَ كَانَّمَا يُسَاقُونَ إِلَى الْمَوْتِ وَهُمْ وَهُمْ يَنْظُرُونَ ﴿٦﴾
وَإِذْ يَعِدُكُمُ اللَّهُ إِحْدَى الظَّاهِفَاتِينَ أَنَّهَا لَكُمْ وَتَوَدُونَ
أَنَّ غَيْرَ ذَاتِ الشُّوَكَةِ تَكُونُ لَكُمْ وَيُرِيدُ اللَّهُ أَنْ يُحْكِمَ
الْحُقْقَ بِكَلِمَتِهِ وَيَقْطَعَ دَابِرَ الْكُفَّارِينَ ﴿٧﴾

Maksudnya: Sebagaimana (*harta rampasan perang ditentukan pembahagiannya dengan kebenaran, maka*) Tuhanmu (*wahai Muhammad*) mengeluarkanmu dari rumahmu (*untuk pergi berperang*) dengan kebenaran juga, sedang sebahagian dari orang-orang yang beriman itu (*sebenarnya*) tidak suka (*turut berjuang*). (5)

Mereka membantahmu tentang kebenaran (berjihad) setelah nyata (kepada mereka kemenangan yang engkau janjikan), seolah-olah mereka dihalau kepada kematian, sedang mereka melihat (sebab-sebabnya). (6) Dan (ingatlah) ketika Allah menjanjikan kepada kamu salah satu dari dua angkatan, menjadi untuk kamu (menghadapinya), sedang kamu suka kiranya (angkatan perniagaan) bukan angkatan (perang) yang mempunyai kekuatan itu yang dijadikan untuk kamu (menghadapinya). Padahal Allah menghendaki untuk menetapkan yang benar (ugama Islam) dengan Kalimah-kalimahNya, dan untuk membinasakan kaum yang kafir seluruhnya; (7)

Setelah itu, Nabi Muhammad SAW lalu bersabda pada seluruh tenteranya, sebagaimana riwayat Imam Ibn Katsir dalam ‘Kitab Bidayah wan Nihayah’ (3/261):

سِيرُوا وَأْبْشِرُوا، فَإِنَّ اللَّهَ قَدْ وَعَدَنِي إِحْدَى الطَّائِفَتَيْنِ، وَاللَّهُ أَكْبَرُ إِنْظُرْ إِلَى مَصَارِعِ الْقَوْمِ

Bermaksud: “Berjalanlah kamu dan bergiranglah kerana sesungguhnya Allah telah memberi janji kepadaku salah satu daripada dua golongan. Demi Allah, sungguh aku seakan-akan sekarang ini melihat tempat kebinasaan kaum Quraisy,”

Mendengar perintah Rasulullah SAW yang sedemikian, kaum muslimin memulakan perjalanan dan berangkatlah ke tempat yang dituju oleh Nabi Muhammad SAW dengan semangat yang berkobar-kobar. Mereka taat dan patuh kepada perintah Nabi Muhammad SAW dan melupakan segala sesuatu yang menjadi kepentingan diri mereka sendiri.

Di pihak tentera kafir Quraisy pula, keadaan menjadi kucar kacir sehingga ada beberapa kaum yang berjalan berpatah balik ke Mekah.

Mengikut adat kebiasaan bangsa Arab, sebelum berperang akan ada perlawanan di antara wakil kedua-dua pihak beradu kekuatan dengan pihak musuh. Di pihak kaum Quraisy, tiga pahlawan yang keluar adalah Utbah bin Rabiah, Syaibah bin Rabiah dan Walid bin Utbah. Manakala daripada tentera Islam ialah Auf bin al-Harith RA, Muadz bin al-Harith RA dan Abdullah bin Rawahah RA. Mereka bertiga adalah dari kaum Ansar. Tetapi kerana kesombongan kaum kafir Quraisy yang merasakan bangsanya lebih baik, mereka tidak mahu menerima kaum Ansar, malah meminta Rasulullah SAW mengeluarkan tiga orang pahlawan dari kaum Quraisy sendiri. Maka Rasulullah SAW mengeluarkan Hamzah bin Abdul Mutalib RA, Ali bin Abi Talib RA dan Ubadah bin al-Harith RA. Mereka berenam beradu tenaga sehingga akhirnya tentera kafir Quraisy jatuh ketiga-tiganya dan tentera Islam hanya Ubaidah bin al-Harith RA yang syahid. Ini adalah petanda bahwa kaum kafir Quraisy akan tewas.

Setelah itu pertempuran terus berlaku. Tentera Islam yang seramai 313 orang berlawan mati-matian untuk menewaskan tentera kafir Quraisy. Rasulullah SAW sentiasa mengamati gerak-geri tentera Islam. Dalam waktu yang singkat, berpuluhan-puluhan tentera musyrikin menghembuskan nafasnya, melayang jiwanya meninggalkan badannya bergelimpangan di atas tanah bermandikan darah. Tentera Islam senantiasa menyebut “Ahad! Ahad! (Allah yang Maha Esa! Allah yang Maha Esa!)”.

Rasulullah SAW pula tidak henti-henti memanjatkan doa pada Allah SWT memohon agar kemenangan berpihak kepada tentera Islam. Sebagaimana dalam hadis riwayat Imam al-Bukhari (3995):

أَنَّ النَّبِيَّ -صَلَّى اللَّهُ عَلَيْهِ وَسَلَّمَ- قَالَ يَوْمَ بَدْرٍ: هَذَا جَبْرِيلٌ، آخُذْ بِرَأْسِ فَرَسِهِ، عَلَيْهِ أَذَادُ الْحَرْبِ".

Bermaksud: "Sesungguhnya Nabi SAW bersabda pada hari perang Badar. Ini Malaikat Jibril, memegang kepala kuda yang dituntun dengan alat perang padanya".

Rasulullah SAW memberi semangat kepada tenteranya dengan sabdanya yang membawa maksud dan jaminan bahawa tentera Islam yang turut serta dalam perang Badar dijamin masuk syurga. Mendengar ini, tentera Islam semakin berkobar-kobar semangatnya. Ramai pembesar kafir Quraisy terkorban dan akhirnya, mereka berpecah dan mlarikan diri. 70 orang kaum kafir Quraisy terbunuh dan 70 yang lain ditawan. Manakala tentera Islam pula hanya 14 yang syahid (6 dari Muajirin dan 8 dari Ansar). Tentera Islam mendapat kemenangan disebabkan keteguhan dan ketabahan hati mereka. Mayat-mayat tentera musyrikin dilempar dan dikuburkan didalam sebuah perigi/sumur di Badar.

Kemenangan ini disambut dengan riang gembira oleh kaum muslimin yang tidak turut serta berperang. Mereka terdiri daripada kaum perempuan, kanak-kanak dan beberapa orang lelaki yang diberi tugas mengawal Madinah dalam masa pemergian tentera Islam ke Badar.

Di Madinah pula, Rasulullah SAW memikirkan bagaimana cara yang patut dilakukan ke atas tawanan perang. Rasulullah SAW juga berpesan pada orang ramai supaya bersikap baik dan belas kasihan kepada tawanan tersebut. Terdapat daripada kalangan kaum muslimin yang memberikan satu-satunya roti yang mereka miliki kepada tawanan sehingga mereka berasa segan dengan kebaikan yang ditunjukkan.

Rasulullah SAW kemudian berbincang dengan orang Islam tentang nasib tawanan Badar. Ada yang menyatakan dibunuh

sahaja kerana mereka telah ingkar dengan Allah SWT dan mengusir kaum Muhajirin dari Mekah. Ada pula yang lebih lembut hatinya dan disuruh melepaskan sahaja dengan harapan mudah-mudahan mereka akan insaf dan tertarik dengan Islam. Setelah berbincang, mereka akhirnya mengambil keputusan untuk melepaskan tawanan dengan bayaran tertentu. Harga tebusan yang paling tinggi adalah empat ribu dirham dan yang paling rendah seribu dirham mengikut kemampuan masing-masing. Bagi yang miskin tetapi ada pengetahuan membaca dan menulis dikehendaki supaya mengajar sepuluh orang kanak-kanak Islam. Mereka semua dibebaskan apabila tebusan telah dibayar atau kanak-kanak itu telah pandai.

Allah SWT memberi ganjaran setimpal dengan usaha yang dilakukan oleh umat Islam pada Ketika itu, ganjaran yang dimaksudkan adalah kemenangan dan kegembiraan kaum muslimin. Semangat dan kerjasama dalam pasukan untuk berperang akhirnya membawa kejayaan kepada mereka. Begitu juga kepada kita pada hari ini perlu bekerjasama dan memberi sokongan antara satu dengan yang lain bagi memperkuatkan kedudukan Islam di Malaysia khususnya dan di dunia amnya. Dengan membina kekuatan sesama Islam sahaja dapat memperkuatkan kedudukan Islam di persada dunia. Sebagaimana di dalam Surah al-Anfal (8) ayat 11:

إِذْ يُعَشِّيْكُمُ الْتَّعَاسَ أَمْنَةً مِنْهُ وَيَنْزِلُ عَلَيْكُم مِنَ السَّمَاءِ مَاءً لِيُظَهِّرُكُم بِهِ وَيُذْهِبَ عَنْكُمْ رِجَزَ الْشَّيْطَانِ وَلِيُرِبِّطَ عَلَى قُلُوبِكُمْ وَيُثْبِتَ بِهِ أَلْأَقْدَامَ ۝

Maksudnya: (*Ingatlah*) ketika kamu diliputi perasaan mengantuk sebagai satu (*pemberian*) aman dari Allah (untuk menghapuskan kecemasan kamu). Dan (*ingatlah ketika*) ia menurunkan kepada kamu hujan dari langit untuk

mensucikan kamu dengannya dan menghapuskan dari kamu gangguan Syaitan, dan juga untuk menguatkan hati kamu dan menetapkan dengannya tapak pendirian (kamu di medan perjuangan). (11)

3.2 Perang Uhud

Peperangan ini meletus kerana terdapat sebahagian daripada pembesar kafir Quraisy yang tidak terbunuh di dalam peperangan Badar telah bermesyuarat sesama mereka untuk melancarkan serangan menuntut bela ke atas kematian pejuang-pejuang mereka di dalam peperangan Badar. Mesyuarat akhirnya bersetuju agar unta dagangan Abu Sufian dengan segala harta modal mereka itu dijadikan tabung pembiayaan bagi menyediakan tentera yang hebat untuk menyerang Rasulullah SAW. Seluruh kaum kafir Quraisy bersatu untuk tujuan ini, serta digunakan sebilangan besar daripada kalangan wanita kafir sebagai pemberi semangat untuk menahan golongan lelaki dari melarikan diri di medan perang. Kesemua mereka seramai 3,000 orang.

Rasulullah SAW bersama dengan 1,000 orang para sahabat keluar dari Kota Madinah pada hari Sabtu, 7 Syawal. Apabila sampai ke suatu tempat di antara Madinah dan Bukit Uhud, Abdullah bin Ubay bin Salul (ketua munafik) bersama-sama dengan puaknya menarik diri daripada berperang dengan bersama bilangan satu pertiga tentera. Kemudian Abdullah bin Haram RA pun mengekori mereka sambil merayu supaya tidak meninggalkan Rasulullah SAW tetapi rayuannya tidak dihiraukan.

Sebahagian daripada sahabat-sahabat Rasulullah SAW telah mencadangkan kepada Rasulullah SAW supaya mereka meminta bantuan dari kaum Yahudi berdasarkan kepada perjanjian mereka untuk menolong. Dalam Kitab *al-Matalib al-'Aliyah* (4319), al-Hafiz Ibn Hajar al-'Asqalani menyandarkan riwayat kepada Ishaq bin Rahawayh dan berpendapat

sanadnya Hasan. Al-Busiri menyebut: Riwayat Ishak dengan sanad yang hasan:

أَبِي حُمَيْدٍ السَّاعِدِيِّ رَضِيَ اللَّهُ عَنْهُ ، قَالَ : خَرَجَ رَسُولُ اللَّهِ صَلَّى اللَّهُ عَلَيْهِ وَسَلَّمَ يَوْمًا أُخْدِي ، حَتَّى إِذَا حَلَّفَ شَيْئَةً الْوَدَاعَ ، نَظَرَ وَزَاءَةً ، فَإِذَا كَتَبَيْتَهُ حَشْنَاءً ، قَالَ صَلَّى اللَّهُ عَلَيْهِ وَسَلَّمَ : ”مَنْ هَذَا؟“ قَالَ : هَذَا عَبْدُ اللَّهِ بْنُ أَبِي بْنِ سَلْوَانَ فِي مَوَالِيهِ مِنَ الْيَهُودِ مِنْ بَنِي قَيْنَقَاعَ ، وَهُمْ رَهْطٌ عَبْدِ اللَّهِ بْنِ سَلَامٍ ، فَقَالَ : ”أَوْقَدَ أَسْلَمُوا؟“ قَالَ : إِنَّهُمْ عَلَى دِينِهِمْ ، قَالَ : ”فَلْعَلَّهُمْ : فَلَيَرْجِعُونَ ، فَإِنَّا لَا نَسْتَعِنُ بِالْمُشْرِكِينَ عَلَى الْمُشْرِكِينَ

Bermaksud: Dari Abu Humayd as-Sa'idiyy RA berkata: Rasulullah SAW keluar menuju ke Uhud sehingga melepassi kawasan Thaniyyat al-Wada', Nabi SAW menoleh ke belakang dan melihat pasukan tentera bersama senjata. Nabi SAW bertanya: "Siapa ini?". Seorang menjawab: Dia Abdullah bin Ubay bersama sekutunya Yahudi Bani Qaynuqa'. Mereka adalah dari saudara-mara Abdullah bin Salam. Baginda SAW bertanya: "Apakah mereka telah memeluk Islam?" "Mereka masih dalam agama asal mereka." Nabi bersabda SAW: "Katakan kepada mereka: Pulanglah saja. Kami tidak akan mendapatkan bantuan orang musyrikin untuk mengalahkan orang musyrikin."

Rasulullah SAW menyusun barisan tentera bersama sahabat-sahabatnya yang berjumlah kira-kira 700 orang di suatu tempat di celah Bukit Uhud. Barisan tentera Islam diletakkan

membelakangi bukit, menghadapi Kota Madinah ditempatkan 50 orang pemanah di atas bukit di belakang tentera Islam, dan dilantik Abdullah bin Jubayr RA sebagai ketua pasukan pemanah dan dipesankan kepada mereka, sebagaimana dalam hadis riwayat Imam al-Bukhari dalam kitab al-Maghazi bab peperangan Uhud (4043), Imam Ahmad (4/293-294), Imam Abu Daud (2662), Imam al-Baihaqiy dalam kitab Dalail an-Nubuwwah (3/229-230). Hadis yang sepertinya diriwayatkan daripada Ibnu Abbas RA dalam riwayat Imam Ahmad (1/287-288), Imam al-Hakim (2/296-297) dan disepakati oleh Imam az-Zahabi]

عَنْ الْبَرَاءِ رَضِيَ اللَّهُ عَنْهُ قَالَ: لَقِينَا الْمُشْرِكِينَ يَوْمَئِذٍ
 وَأَجْلَسَ النَّبِيًّا صَلَّى اللَّهُ عَلَيْهِ وَسَلَّمَ جَيْشًا مِنْ الرُّمَادِ وَأَمْرَ
 عَيْنِهِمْ عَبْدَ اللَّهِ، وَقَالَ: لَا تَبْرُحُوا إِنْ رَأَيْتُمُونَا ظَهَرْنَا عَلَيْهِمْ
 فَلَا تَبْرُحُوا وَإِنْ رَأَيْتُمُوهُمْ ظَهَرُوا عَلَيْنَا فَلَا تُعْيِنُونَا، فَلَمَّا
 لَقِينَا ، هَرَبُوا حَتَّى رَأَيْتُ النِّسَاءَ يَسْتَدْدُنَ فِي الْجَبَلِ رَفَعْنَ
 عَنْ سُوقِهِنَ فَدْ بَدَتْ خَلَالِهِنَ فَأَخْدُوا يَقُولُونَ: الْعَنِيمَةَ
 الْعَنِيمَةَ، فَقَالَ عَبْدُ اللَّهِ : عَهْدَ إِلَيَّ النَّبِيُّ صَلَّى اللَّهُ عَلَيْهِ
 وَسَلَّمَ أَنْ لَا تَبْرُحُوا فَأَبْنُوا، فَلَمَّا أَبْنُوا صُرِفَ وُجُوهُهُمْ

Bermaksud: Diriwayatkan daripada al-Bara' RA berkata: Kami bertemu pasukan Musyrikin pada hari itu (Uhud), lalu Nabi SAW menempatkan pasukan pemanah di bawah pimpinan Abdullah. Baginda SAW berpesan: "Tetaplah kalian di sini, sekalipun kalian melihat kami menang atas mereka, janganlah kalian meninggalkan tempat ini, dan jika kalian melihat kami kalah, janganlah

kalian bergerak untuk menolong kami.” Ketika perang mulai berkecamuk, maka pasukan musuh melarikan diri sehingga aku melihat para wanita berlarian ke gunung hingga tersingkap betis mereka dan kelihatan gelang kaki mereka. Kaum Muslimin (pasukan pemanah) berebut mengambil (ghanimah) sambil berkata: Ghanimah! (harta rampasan perang), ghanimah! Abdullah akhirnya berteriak: Nabi SAW telah berpesan kepadaku, janganlah kalian meninggalkan tempat kalian! Namun mereka tidak peduli, ketika mereka tidak memperdulikan wasiat Nabi SAW mereka menjadi kucar kacir.

Dalam Riwayat Abu Daud (2662) pula dinyatakan daripada al-Bara’:

جَعَلَ رَسُولُ اللَّهِ صَلَّى اللَّهُ عَلَيْهِ وَسَلَّمَ عَلَى الرُّمَاءِ يَوْمَ
أُحُدٍ وَكَانُوا حَمْسِينَ رَجُلًا عَبْدَ اللَّهِ بْنَ جُبَيْرٍ وَقَالَ: إِنْ
رَأَيْتُمُونَا تَخْطِفُنَا الطَّيْرُ فَلَا تَبْرُحُوا مِنْ مَكَانِكُمْ هَذَا حَتَّى
أُرْسِلَ لَكُمْ وَإِنْ رَأَيْتُمُونَا هَرَمْنَا الْقَوْمَ وَأَوْطَنَاهُمْ فَلَا تَبْرُحُوا
حَتَّى أُرْسِلَ إِلَيْكُمْ

Bermaksud: Rasulullah SAW meletakkan pasukan pemanah dalam perperangan Uhud di bawah pimpinan Abdullah bin Jubayr seramai 50 orang. Baginda SAW bersabda kepada mereka: Sekiranya kamu melihat kami disambar burung (tewas), jangan kamu bergerak dari tempat kamu sehingga dihantar utusan kepada kalian. Dan sekiranya kamu melihat kami berjaya mengatasi musuh serta menewaskan mereka, jangan kamu

bergerak sehingga dihantar utusan kepada mereka.

Selepas itu, Baginda SAW menyerahkan bendera kepada Musab bin Umair RA. Sementara Khalid bin al-Walid mengetuai sayap kanan tentera musyrikin dan Akramah bin Abu Jahal di sayap kiri.

Pertempuran makin hebat. Tentera Islam menunjukkan kemaraan mereka yang mengagumkan. Pahlawan-pahlawan ulung di hadapan tentera Islam terdiri daripada Abu Dujanah RA, Hamzah bin Abdul Mutalib RA dan Musab bin Umair RA.

Musab bin Umair RA terbunuh di hadapan Rasulullah SAW lalu bendera disambar oleh Ali bin Abi Talib RA. Tidak berapa lama Allah SWT mengurniakan pertolonganNya kepada tentera Islam di mana kaum musyrikin lari menyelamatkan diri. Masing-masing tidak menghiraukan sesuatu pun meskipun perempuan-perempuan mereka menjerit dan menyumpah mereka. Tentera Islam menjelaki mereka dari belakang dan menawan apa sahaja. Sementara pemanah-pemanah di atas bukit, mulai leka dengan kemenangan dan saling memberikan pendapat sesama mereka. Sebahagian daripada mereka berpendapat supaya turun dari tempat pertahanan mereka kerana menyangkakan peperangan sudah selesai.

Mereka pun mula turun mengumpulkan harta-harta rampasan yang berselerak. Hanya tinggal Abdullah bin Jabir RA bersama sebilangan kecil tentera pemanah yang mentaati pesanan Rasulullah SAW. Kemudian Khalid bin al-Walid mendapati Bukit Uhud kosong daripada pertahanan tentera muslimin. Lalu, beliau dan tenteranya diikuti oleh Akramah berpatah balik dari belakang bukit dengan kuda mereka.

Mereka menyerang pemanah-pemanah Islam yang masih tinggal beberapa orang dan berjaya membunuh ketuanya. Seterusnya mereka membuat serangan terus ke seluruh tentera Islam dari belakang. Ini menyebabkan kedudukan tentera Islam tidak teratur lagi.

Ramai tentera Islam yang gugur syahid. Pada awalnya kemenangan milik orang Islam, ini kerana kawasan Bukit Uhud yang tinggi telah memudahkan penyusunan strategi perang yang dilakukan oleh Nabi SAW. Baginda SAW menempatkan 50 orang pemanah di atas bukit sebagai penyerang utama. Mereka diperintahkan supaya tidak meninggalkan kedudukan mereka. Tetapi disebabkan tentera kafir lari meninggalkan banyak harta serta senjata mereka menyebabkan pasukan pemanah orang Islam telah turun dan meninggalkan posisi mereka di bukit Uhud kerana mereka menyangka perang telah berakhir dan mereka mengumpul senjata serta harta yang ditinggalkan.

Kesannya tentera kafir menyusun strategi dan menyerang kembali dari belakang tanpa pengetahuan pasukan pemanah Islam yang telah menyangka peperangan sudah berakhir. Tentera kafir merampas kembali harta dan senjata yang ditinggalkan. Disebabkan hal ini pasukan Islam kalah.

Rasulullah SAW telah dilontar dengan batu sehingga tercampak ke dalam satu lubang dan patah gigi depan Baginda SAW dan muka Baginda SAW berdarah. Fatimah RA telah membasuh luka Baginda SAW manakala Sayidina Ali RA pula mengalirkan air ke atas muka Baginda SAW setelah mendapat darah tidak berhenti mengalir. Fatimah RA pun mengambil sekeping pelepas tumbuhan lalu menumbuknya sehingga menjadi debu dan ditampalnya pada luka Baginda SAW, barulah darah berhenti mengalir.

Kekalahan Perang Uhud ini menjadi pengajaran penting bagi kaum muslimin agar sentiasa tunduk dan patuh kepada arahan pemimpin.

3.3 Perang Khandaq

Pertempuran ini dikenali sebagai "Perang/Pertempuran Ahzab" (Arab: ﴿غَزْوَةُ الْأَحْزَاب﴾). Ia menggunakan perkataan "gabungan" (Arab: ﴿الْأَحْزَاب﴾) dalam Surah al-Ahzab bagi menggambarkan gabungan orang musyrik dan Yahudi menentang Islam.

Nama pertempuran juga mengambil sempena perkataan khandaq (Arab: ﴿الْخَنْدَق﴾) yang bermaksud "parit" merujuk kepada parit yang digali oleh orang Islam semasa bersiap sedia untuk bertempur. Perkataan khandaq pula ialah perkataan Arab yang terbit daripada perkataan Parsi khandak (bermaksud "apa yang telah digali"). Salman al-Farisi RA menasihatkan Nabi Muhammad SAW agar menggali parit dalam pertempuran ini.

Perang Khandaq juga dikenali sebagai Perang Ahzab. Pada 31 Mac 627M peristiwa pengepungan Madinah selama lebih kurang empat minggu oleh suku-suku dalam kalangan orang Arab dan Yahudi yang bergabung. Kekuatan pihak gabungan musuh dianggarkan seramai 10,000 orang, diiringi oleh 600 ekor kuda dan sebilangan ekor unta, manakala tentera Madinah pula terdiri daripada 3,000 orang.

Pihak yang mempertahankan Madinah di bawah pimpinan Nabi Muhammad SAW, menggali parit bersama-sama di Madinah berjaya membuatkan pasukan berkuda gabungan musuh menjadi buntu. Pihak gabungan musuh merancang untuk membuat beberapa serangan secara serentak dan berjaya meyakinkan sekutu mereka, Bani Quraizah, sebuah suku kaum Yahudi, untuk menyerang Kota Madinah dari arah selatan. Walau bagaimanapun, diplomasi Nabi Muhammad SAW berjaya menjelaskan rundingan antara pihak gabungan musuh dengan Bani Quraizah, lalu mematahkan pakatan yang menentang Baginda SAW.

Susunan pertahanan tentera Madinah yang teratur, kejatuhan semangat pihak gabungan musuh dan keadaan cuaca yang buruk akhirnya menyebabkan kepungan berakhir dalam keadaan kelam-kabut. Pengepungan ini merupakan sebuah

"pertarungan kepintaran" yang menyaksikan musuh dikalahkan oleh pihak Muslim secara taktikal dan hanya menanggung kerugian yang kecil. Usaha-usaha untuk mengalahkan Muslim gagal dan Islam semakin berpengaruh di rantau itu. Susulan daripada itu, tentera Muslim mengepung perkampungan Bani Quraizah, yang menyebabkan mereka menyerah diri tanpa syarat. Kekalahan dalam peperangan ini menyebabkan pihak kafir Quraisy kehilangan kuasa dalam perdagangan serta darjat mereka.



Gambar 2: Masjid Salman Al-Farisi, Tapak Pertempuran Ahzab, Madinah

Selepas berhijrah dari Mekah, orang Islam bertempur dengan kafir Quraisy Mekah di Badar al-kubra dalam tahun 624 M. Pada bulan April 626 M, Nabi Muhammad SAW mengetuai pasukan seramai 1500 orang dan sepuluh ekor kuda untuk berperang dengan kafir Quraisy buat kali kedua di Badar. Tiada pertempuran berlaku pada kali ini, tetapi suku-suku kaum Arab yang tinggal di kawasan pesisiran pantai tertarik dengan kekuatan tentera Islam. Nabi Muhammad SAW juga berjaya untuk menggagalkan perikatan yang menentang perkembangan Islam di tanah Arab.

Sebagaimana yang berlaku semasa peperangan Badar dan peperangan Uhud, tentera Islam sekali lagi menggunakan kaedah-kaedah yang luar biasa untuk menentang pihak musuh. Pihak Muslim mengepung perigi air dan menyekat pihak musuh daripada mendapatkan air di peperangan Badar. Manakala dalam peperang Uhud, orang Islam mengguna bukit-bukau di sekitar Uhud dengan cara strategik. Dalam peperangan Ahzab ini mereka menggali parit bagi memastikan pasukan berkuda musuh tidak berkesan.

3.4 Tentera Gabungan

Pada awal tahun 627 M, Yahudi Bani an-Nadir bertemu dengan Arab kafir Quraisy Mekah. Ketua an-Nadir, Huyay bin Akhtab, bersama-sama pemimpin-pemimpin lain dari Khaibar, pergi ke Mekah untuk membuat perjanjian dengan Safwan.

Sebahagian besar tentera gabungan dikumpulkan oleh musyrikin Mekah dengan diketuai oleh Abu Sufian. Tentera gabungan membawa 4,000 anggota infantri (tentera berjalan kaki), 300 tentera berkuda, dan antara 1,000 ke 1,500 orang penunggang unta.

Bani an-Nadir pula mula menghasut nomad di bahagian timur Semenanjung Arab (Nejd). Pihak Bani an-Nadir juga berjaya membawa Bani Ghatfan bersama-sama menyertai mereka, dengan menyogok Bani Ghatfan separuh hasil tanaman yang mereka miliki. Kumpulan ini, yang kedua terbesar, menambahkan kekuatan Gabungan seramai lebih kurang 2,000 orang tentera dan 300 ekor kuda, diketuai oleh Uyaynah bin Hasan Fazari. Bani Assad yang diketuai oleh Tuleha Asadi juga bersetuju untuk menyertai pihak Bani an-Nadir dan tentera gabungan. Bani al-Nadir juga mendapat 700 orang daripada Bani Sulaim.

Suku-suku lain termasuk Bani Murrah, dengan kekuatan 400 orang di bawah pimpinan Hars bin Auf Murri, dan Bani Shujah, dengan 700 orang yang dipimpin Sufian bin Abdul Shams. Jumlah keseluruhan tentera Gabungan, dianggarkan seramai

lebih kurang 10,000 orang infantri dan 600 orang tentera berkuda.

Pada akhir bulan Mac 627 M tentera yang diketuai Abu Sufian ini bergerak mara ke Madinah. Bertepatan dengan perancangan yang dibuat, tentera-tentera yang terkumpul bergerak mara ke arah Madinah orang Mekah dari arah selatan (di kawasan pesisiran pantai) sementara yang lain dari arah timur. Pada masa yang sama pula, penunggang kuda daripada Bani Khuzaah yang telah memeterai perjanjian dengan Nabi Muhammad SAW, berangkat ke Madinah untuk memberi amaran kepada orang Islam tentang gerakan tentera Kafir ke arah mereka.

3.4.1 Pertahanan Muslim

Penunggang kuda daripada Bani Khuzaah sampai di Madinah dalam masa empat hari, dan memberi amaran kepada Nabi Muhammad SAW bahawa tentera gabungan kafir dijangka sampai di Madinah dalam masa seminggu. Rasulullah SAW mengumpulkan orang Madinah bagi membincangkan strategi terbaik bagi menangkis serangan musuh yang bakal menyerang.

Tindakan untuk bertemu dan bertempur di tanah lapang yang membawa kepada kemenangan di Badar, dan menunggu pihak musuh di dalam bandar (pengajaran daripada Uhud) antara yang dibincangkan. Akhirnya, orang Islam yang lebih kecil bilangan berbanding dengan musuh mereka memilih strategi peperangan pertahanan dengan menggali parit dalam yang dapat menjadi rintangan kepada musuh di kawasan utara Madinah.


Strategi ini, yang mungkin diubah suai daripada strategi tentera Empayar Sasan (Parsi), dicadangkan oleh Salman al-Farisi RA. Setiap Muslim di Madinah, termasuk Nabi Muhammad SAW, mula menggali parit besar yang selesai digali dalam tempoh enam hari. Parit

digali pada bahagian utara Madinah memandangkan wilayah lain di Madinah dikelilingi gunung berbatu dan kawasan berpokok, yang sukar direntasi segerombolan tentera besar khususnya pasukan berkuda. Dari segi strategi, ini bermakna serangan musuh dalam bilangan yang besar hanya dapat dilakukan dari satu arah sahaja, iaitu dari arah utara.

Seiring dengan kerja menggali parit, Madinah juga berdepan dengan kemungkinan kekurangan makanan. Orang Madinah menuai tanaman mereka lebih awal agar memastikan tentera gabungan bergantung pada bekalan makanan mereka sendiri. Sementara itu, kaum wanita dan kanak-kanak ditempatkan di pusat bandar Madinah.

Nabi Muhammad SAW menubuhkan markas Baginda SAW di sebuah bukit kecil yang digelar Sala dan tentera Islam diatur di sana. Kedudukan ini memberi pihak Muslim kelebihan sekiranya tentera Musyrik berjaya menyeberangi parit. Kekuatan keseluruhan tentera Islam yang mempertahankan Madinah daripada serangan musuh terdiri daripada 3,000 orang, dan melibatkan semua penduduk Madinah yang berumur 15 tahun ke atas, melainkan orang Yahudi Bani Quraizah. Walau bagaimanapun, Bani Quraizah ada membekalkan orang Islam dengan alat menggali parit.

3.4.2 Pengepungan Madinah



Gambar 3: Peta Diagram Perang Khandaq (Perang Ahzab), tahun 627 Masihi. Parit digali di kawasan utara dan barat laut Madinah.

Pengepungan Madinah bermula pada 31 Mac 627 M dan berlanjutan selama 27 hari. Memandangkan perperangan pengepungan jarang berlaku di negeri Arab, pihak gabungan yang tiba di Madinah mendapati mereka tidak bersedia untuk menangani parit yang digali Muslim. Tentera gabungan cuba menyerang dengan penunggang kuda dengan harapan mencari laluan, tetapi pihak Muslim diatur dalam kedudukan kukuh dan dapat mematahkan setiap percubaan. Kedua-dua bala tentera berkumpul pada dua belah parit yang bertentangan dan masing-masing menghabiskan masa dua atau tiga minggu menghamburkan penghinaan dalam bentuk syair terhadap lawan, diiringi dengan anak panah yang dilepaskan dari jarak jauh.

Pihak kafir Quraisy mula berasa bosan dengan kebuntuan dan sekumpulan yang diketuai Amru bin Abdul Wad dan Ikrimah bin Abu Jahal cuba menggempur parit. Mereka berjaya merentasi parit dan mara ke kawasan paya berdekatan bukit Sala. Amru mencabar tentera Muslim untuk bertarung dengannya. Sayidina Ali bin Abi Talib RA menerima cabaran tersebut dan selepas pergelutan pendek, Amru dibunuh Sayidina Ali RA diiringi tidak lama kemudian dengan teriakan "Allahu Akbar" – Allah Maha Besar. Pasukan kecil gabungan berundur dalam keadaan kelam kabut berikutan pembunuhan Amru. Pihak gabungan kehilangan tiga orang pejuang, mereka gagal mencapai apa-apa matlamat.

Pasukan gabungan cuba beberapa kali untuk melintasi parit pada waktu malam tetapi gagal. Walaupun pihak gabungan mampu mengatur anggota mereka di sepanjang parit, mereka agak keberatan untuk bertempur secara berhadapan dengan orang Islam kerana pejuang Muslim lebih cekap dalam pertempuran. Tentera Islam berada dalam kedudukan kukuh di belakang tebing parit yang dibina daripada tanah dan bersedia untuk melontarkan batu dan anak panah sekiranya sesiapa cuba menyeberangi parit tersebut.

Pihak gabungan cuba menyerang secara serentak. Dalam satu percubaan khususnya, mereka memujuk Bani Quraizah agar menyerang dari selatan. Bani Quraizah tinggal di dalam perkarangan Madinah dan penempatan mereka terletak di arah selatan Madinah. Huyay bin Akhtab, ketua Yahudi Bani an-Nadir dari Khaibar, pulang ke Madinah untuk mendapatkan sokongan daripada Bani Quraizah.

Setakat ini Bani Quraizah telah mencuba untuk berkecuali dalam perang antara Muslim di Madinah dengan tentera gabungan Arab musyrik dan beberapa

puak Yahudi lain, dan keberatan untuk menyertai pihak gabungan disebabkan perjanjian dengan Nabi Muhammad SAW di dalam Piagam Madinah yang telah termeterai. Malah, ketua Bani Quraizah enggan berjumpa dengan Huyay bin Akhtab buat kali pertama.

Namun, Huyay bin Akhtab akhirnya berjaya bertemu Bani Quraizah dan meyakinkan mereka bahawa orang Islam sudah tentu dapat ditewaskan. Bani Quraizah dapat melihat rombongan tentera gabungan yang besar, yang bergerak di merata tempat dengan ramai anggota tentera berjalan kaki dan yang berkuda, dan akhirnya Bani Quraizah bertukar fikiran dan menyertai gabungan.

Berita yang kononnya Bani Quraizah telah belot mula tersebar dan Sayidina Umar al-Khattab RA dengan cepat memaklumkan kepada Nabi Muhammad SAW. Telahan berkaitan pembelotan Bani Quraizah diperkuat lagi dengan pergerakan tentera gabungan ke arah penempatan dan kubu kuat Bani Quraizah. Timbul perasaan risau pada Nabi Muhammad SAW tentang pergerakan mereka, Nabi Muhammad SAW menyedari bahawa Bani Quraizah menimbulkan keadaan yang amat berbahaya kepada orang Islam. Nabi Muhammad SAW tidak membuat persiapan rapi terhadap pertahanan di perbatasan Madinah (di arah selatan) dengan kaum tersebut kerana berpegang pada perjanjian antara Baginda SAW dan Bani Quraizah. Tambahan pula Bani Quraizah memiliki kelengkapan senjata seperti 1,500 bilah pedang, 2,000 batang lembing, 300 buah baju besi dan 500 buah perisai.

Nabi Muhammad SAW menghantar tiga orang sahabat untuk meninjau perkembangan terkini Bani Quraizah. Baginda SAW menasihati mereka agar memberikan pendapat mereka secara terbuka sekiranya Bani Quraizah masih taat, kerana ini boleh mengekalkan semangat pejuang Islam. Namun, Baginda SAW juga menasihati mereka agar tidak menyebarkan berita

tentang pembelotan Bani Quraizah kerana ini boleh menimbulkan perasaan cemas dan kelam kabut dalam kalangan Muslim.

Para Sahabat mendapati sesungguhnya Bani Quraizah telah melanggar perjanjian dan cuba meyakinkan mereka agar berpegang kepada perjanjian yang dibuat dengan Nabi Muhammad SAW dengan memperingatkan mereka tentang nasib Bani al-Nadir dan Bani Qainuqak. Namun mereka gagal meyakinkan Bani Quraizah. Hasil tinjauan para sahabat disampaikan kepada Nabi Muhammad SAW bahawa Bani Quraizah telah belot dan membunuh orang Islam apabila mendapat kesempatan. Ini kerana kaum Adal dan Qarah pernah berkelakuan serupa.

Nabi Muhammad SAW cuba menyembunyikan maklumat yang Baginda SAW terima. Namun, khabar angin tentang serangan besar-besaran terhadap Madinah dari arah penempatan Quraizah mula tersebar secara meluas. Khabar angin ini menjejaskan orang Islam serta melemahkan semangat mereka.

Penduduk Muslim Madinah mendapati keadaan mereka bertambah buruk selang hari. Bekalan makanan menyusut dan malam bertambah sejuk. Mereka kekurangan tidur dan ini juga menjejaskan mereka. Keadaan menjadi genting dan dilaporkan buat kali pertamanya solat berjemaah hanya dilakukan pada malam hari.

3.4.3 Gerak Balas Muslim

Nabi Muhammad menghantar 100 orang Islam ke pusat bandar Madinah bagi pertahanannya sebaik sahaja Baginda SAW mendengar khabar angin tentang pembelotan Bani Quraizah. Kemudian Baginda SAW menghantar 300 orang askar berkuda (askar berkuda tidak diperlukan di parit) juga bagi mempertahankan

Madinah. Suara kuat para tentera Islam semasa menunaikan solat berjamaah di malam hari memberikan gambaran seolah-olah mereka ramai dan kuat.

Krisis ini menunjukkan Nabi Muhammad SAW bahawa ramai anggota tentera Baginda SAW sudah hampir hilang semangat. Baginda SAW menghubungi Ghatafan (suku Badwi) dan cuba memujuk mereka menyertai tentera Islam dengan menawarkan mereka sepertiga hasil tanaman buah kurma Madinah sekiranya mereka berundur. Walaupun Ghatafan pada mulanya meminta dibayar setengah hasil kurma, akhirnya selepas berunding dengan Nabi Muhammad, mereka bersetuju dengan syarat-syarat yang dirundingkan.

Walau bagaimanapun, Nabi Muhammad telah bermesyuarat terdahulu dengan ketua-ketua Madinah sebelum membuat perjanjian. Pembesar-pembesar Madinah membantah dan tidak bersetuju akan syarat-syarat perjanjian, dengan alasan Madinah tidak pernah jatuh ke tahap itu, justeru rundingan dengan Ghatafan dihentikan, walaupun Ghatafan tidak berundur, mereka telah mengundang kecurigaan sekutu lain kerana mereka telah mengadakan rundingan dengan pihak Islam. Ekoran itu, pertelagahan dalaman Gabungan bertambah runcing.

Mengikut sejarawan Ibn Ishaq, pada ketika itu Nabi Muhammad SAW didatangi Nuaim bin Masud, seorang kenamaan Arab yang dihormati ahli gabungan, yang telah memeluk Islam secara rahsia. Pada lawatan itu Nabi Muhammad SAW meminta Nuaim membantu mengakhirkan pengepungan dengan menanam rasa curiga dalam kalangan pihak ahli gabungan.

Nuaim bin Masud kemudiannya membuat satu strategi yang berkesan. Strategi pertama adalah pergi ke Bani Quraizah dan memberi amaran kepada mereka tentang niat ahli gabungan yang lain. Kata beliau, sekiranya

pengepungan itu gagal, pihak ahli gabungan tidak akan ragu-ragu meninggalkan orang Yahudi kepada memberi bantuan kepada Nabi Muhammad SAW. Justeru, Bani Quraizah harus meminta daripada ahli gabungan memberi beberapa orang tahanan bagi memastikan kerjasama berterusan. Nasihat Nuaim ini menimbulkan kerisauan dalam kalangan Bani Quraizah yang sememangnya sudah mula berasa curiga.

Strategi seterusnya adalah Nuaim bin Masud pergi bertemu Abu Sufian, ketua gabungan dan memberitahunya bahawa kaum Bani Quraizah sudah berpaling tадah dan menyertai Nabi Muhammad SAW. Beliau menyatakan bahawa kaum Yahudi itu berniat meminta tahanan daripada pihak gabungan, kononnya sebagai balasan kerjasama yang diberikan mereka, tetapi sebenarnya Bani Quraizah mahu menyerahkan tahanan kepada Nabi Muhammad SAW. Sedangkan, pihak gabungan tidak sepatutnya memberikan walau seorang pun tahanan kepada Bani Quraizah. Demikian Nuaim mengulangi ceritanya kepada kaum-kaum gabungan yang lain.

3.4.4 Keruntuhan Gabungan

Strategi Nuaim bin Masud berkesan. Setelah berunding, ketua-ketua gabungan menyuruh Ikrimah pergi ke Bani Quraizah sebagai isyarat serangan bersatu terhadap Madinah. Sebaliknya, Bani Quraizah berkeras meminta orang tebusan sebagai jaminan yang pihak Gabungan tidak akan meninggalkan Bani Quraizah sekiranya pengepungan gagal. Pihak Gabungan pula berfikiran bahawa Bani Quraizah akan menyerahkan tahanan tersebut kepada Nabi Muhammad SAW dan seterusnya enggan memberi orang tebusan. Perutusan dihantar pergi balik antara kedua belah pihak, namun tidak ada yang mahu berganjak.

Abu Sufian memanggil Huyay bin Akhtab dan memaklumkannya tentang sambutan Bani Quraizah. Huyay tersentak dan Abu Sufian menuduhnya sebagai "pengkhianat". Risau akan keselamatannya, Huyay melarikan diri ke kubu kuat Bani Quraizah di selatan Madinah.

Puak Badwi, kaum Ghatafan, dan puak-puak gabungan yang lain pula terjejas dengan rundingan yang diadakan Bani Quraizah dengan Nabi Muhammad SAW. Mereka menyertai ekspedisi gabungan hanya dengan harapan mendapat hasil rampasan dan bukan kerana membenci Islam. Mereka putus harapan kerana pengepungan memakan masa yang lama (mereka tidak biasa dengan kaedah peperangan berbentuk pengepungan) dan oleh sebab itu berasa kurang minat meneruskan pengepungan. Kedua-dua kelompok pihak gabungan ini pada kesudahannya mula menuding jari dan saling mencurigai pihak yang lagi satu.

Pada masa yang sama bekalan pihak gabungan juga menyusut. Kuda dan unta mati akibat kebuluran dan kecederaan. Cuaca pula amat sejuk dan hujan turun beberapa hari. Angin kencang bertiup dan memadamkan unggun api, sekaligus menghilangkan punca haba anggota Gabungan. Sebaliknya, petempatan Muslim terlindung daripada angin. Khemah-khemah tentera Gabungan ranap ditiup angin, unggun api padam, hujan dan pasir memercik muka mereka; mereka menjadi takut tentang keadaan mereka. Kesemua ini mereka anggap sebagai petanda sesuatu yang buruk yang bakal melanda mereka. Kesatuan mereka sudah berkecaci. Akhirnya mereka mula berundur pada waktu malam dan pada keesokan harinya medan perang menjadi kosong.

Berikutan pengunduran tentera Gabungan, orang Islam mengepung penempatan Bani Quraizah yang terletak di selatan Madinah. Mereka melakukan demikian kerana

pembelotan Bani Quraizah. Bani Quraizah menyerah kalah selepas pengepungan selama 25 hari dan kubu kuat serta harta mereka dirampas oleh orang Muslim. Semasa dibawa untuk pengadilan, Bani Quraizah memohon agar diadili oleh Bani Aus, sekutu lama mereka. Nabi Muhammad SAW melantik ketua Aus, Saad bin Muaz, sebagai hakim. Saad, yang tercedera semasa pertempuran, menghakimi Bani Quraizah mengikut lunas-lunas agama yang mereka anuti, yakni mengikut undang-undang Taurat. Hasil daripada itu, hukuman yang dijatuhkan terhadap Bani Quraizah ialah hukuman bunuh bagi orang lelaki sementara kaum wanita dan kanak-kanak Bani Quraizah diambil sebagai hamba abdi. Nabi Muhammad SAW mempersetujui keputusan ini dan hukuman dijalankan pada keesokan harinya.

Orang lelaki antara 400 ke 900 orang kesemuanya diikat dan diletakkan di bawah jagaan Muhammad bin Maslamah, sementara wanita dan kanak-kanak diletakkan di bawah jagaan Abdullah bin Salam, bekas rabai (guru yahudi) yang memeluk Islam.

Kesimpulan yang dapat difahami adalah perang Khandaq berlaku disebabkan kebencian dan permusuhan golongan Yahudi yang tidak senang dengan kebangkitan pengaruh dakwah Islam yang terletak di Madinah pada ketika itu. Golongan Yahudi ini daripada kelompok Bani Nadir yang tinggal di Khaibar telah menghasut kafir Mekah yang dipimpin oleh Abu Sufian supaya mengadakan usaha terancang dan berpaktat dengan pihak kafir yang lain untuk menyerang orang Islam di Madinah.

Peristiwa Perang Khandaq ini juga dikenali sebagai Perang Ahzab yang mana kekal dalam ingatan umat Islam. Sebagaimana yang dinyatakan dalam al-Quran yang dinamakan surah tersebut, Surah al-Ahzab. Dalam

Surah al-Ahzab (33) ini Allah SWT menceritakan peristiwa ini daripada ayat 9-23:

يَا أَيُّهَا الَّذِينَ ءَامَنُوا أَذْكُرُوا نِعْمَةَ اللَّهِ عَلَيْكُمْ إِذْ
جَاءَكُمْ جُنُودٌ فَأَرْسَلْنَا عَلَيْهِمْ رِيحًا وَجُنُودًا لَمْ
تَرُوهَا وَكَانَ اللَّهُ بِمَا تَعْمَلُونَ بَصِيرًا ٩ إِذْ جَاءَكُمْ
مِنْ قَوْقَكُمْ وَمِنْ أَسْفَلَ مِنْكُمْ وَإِذْ رَأَيْتَ الْأَبْصَرَ
وَبَلَغَتِ الْقُلُوبُ الْحَتَاجَرَ وَتَظْلَمُونَ بِاللَّهِ الظُّنُونَا ١٠
هُنَالِكَ أَبْتَلَى الْمُؤْمِنُونَ وَرُزِّلُوا زِلَّا شَدِيدًا ١١
وَإِذْ يَقُولُ الْمُنَافِقُونَ وَالَّذِينَ فِي قُلُوبِهِمْ مَرَضٌ مَا
وَعَدَنَا اللَّهُ وَرَسُولُهُ إِلَّا غُرُورًا ١٢ وَإِذْ قَالَتْ
طَائِفَةٌ مِنْهُمْ يَأْهُلُ يَرْبَابَ لَا مُقَامَ لَكُمْ فَأَرْجِعُوْا
وَيَسْتَشِدُنَ فَرِيقٌ مِنْهُمُ الَّتِي يَقُولُونَ إِنَّ بُيُوتَنَا عَوْرَةٌ
وَمَا هِيَ بِعَوْرَةٍ إِنْ يُرِيدُونَ إِلَّا فِرَارًا ١٣ وَلَوْ دُخِلْتُ
عَلَيْهِمْ مِنْ أَقْطَارِهَا ثُمَّ سُلِّلُوا الْفِتْنَةَ لَأَتَوْهَا وَمَا
تَلَبَّثُوا بِهَا إِلَّا يَسِيرًا ١٤ وَلَقَدْ كَانُوا عَاهَدُوا اللَّهَ مِنْ
قَبْلٍ لَا يُؤْلُونَ الْأَدْبَرَ وَكَانَ عَاهَدُ اللَّهِ مَسْئُولاً ١٥

قُل لَّن يَنْفَعُكُمُ الْفِرَارُ إِنْ فَرَرْتُمْ مِّنَ الْمَوْتِ أَوِ
 الْقَتْلِ وَإِذَا لَا تُمْتَهِنُ إِلَّا قَلِيلًا ﴿١٦﴾ قُلْ مَنْ ذَا
 الَّذِي يَعْصِمُكُمْ مِّنَ اللَّهِ إِنْ أَرَادَ بِكُمْ سُوءًا أَوْ أَرَادَ
 بِكُمْ رَحْمَةً وَلَا يَجِدُونَ لَهُمْ مِّن دُونِ اللَّهِ وَلِيَّا وَلَا
 يَصِيرَأُ ﴿١٧﴾ قَدْ يَعْلَمُ اللَّهُ الْمُعَوِّقِينَ مِنْكُمْ
 وَالْقَابِلِينَ لِإِخْرَاجِهِمْ هُلُمَ إِلَيْنَا وَلَا يَأْتُونَ إِلَيْنَا سِلْطَانًا إِلَّا
 قَلِيلًا ﴿١٨﴾ أَشَحَّهُ عَلَيْكُمْ فَإِذَا جَاءَ الْحُنُوفُ رَأَيْتُهُمْ
 يَنْظُرُونَ إِلَيْكَ تَدْوُرُ أَعْيُنُهُمْ كَالَّذِي يُغْشَى عَلَيْهِ
 مِنَ الْمَوْتِ فَإِذَا ذَهَبَ الْحُنُوفُ سَلَقُوكُمْ بِالسِّنَةِ حِدَادٍ
 أَشَحَّهُ عَلَى الْخَيْرِ أُولَئِكَ لَمْ يُؤْمِنُوا فَأَحْبَطَ اللَّهُ
 أَعْمَلَهُمْ وَكَانَ ذَلِكَ عَلَى اللَّهِ يَسِيرًا ﴿١٩﴾ يَحْسَبُونَ
 الْأَحْرَابَ لَمْ يَذْهَبُوا وَإِنْ يَأْتِ الْأَحْرَابُ يَوْمًا لَوْ
 أَنَّهُمْ بَادُونَ فِي الْأَعْرَابِ يَسْأَلُونَ عَنْ أَثْبَابِكُمْ وَلَوْ
 كَانُوا فِيهِمْ مَا قَتَلُوا إِلَّا قَلِيلًا ﴿٢٠﴾ لَقَدْ كَانَ
 لَكُمْ فِي رَسُولِ اللَّهِ أُسْوَةٌ حَسَنَةٌ لِمَنْ كَانَ يَرْجُو اللَّهَ
 وَالْيَوْمَ الْآخِرَ وَذَكَرَ اللَّهَ كَثِيرًا ﴿٢١﴾

وَلَمَّا رَأَهَا الْمُؤْمِنُونَ أَلْأَحْزَابَ قَالُوا هَذَا مَا وَعَدَنَا اللَّهُ
وَرَسُولُهُ وَصَدَقَ اللَّهُ وَرَسُولُهُ وَمَا زَادُهُمْ إِلَّا إِيمَانًا

وَسَلِيمًا ﴿٢٦﴾ مِنَ الْمُؤْمِنِينَ رِجَالٌ صَدَقُوا مَا عَاهَدُوا

اللَّهُ عَلَيْهِ فَيَنْهُمْ مَنْ قَضَى تَحْبُّهُ وَمِنْهُمْ مَنْ يَنْتَظِرُ

وَمَا بَدَّلُوا تَبْدِيلًا ﴿٢٧﴾

Maksudnya: Wahai orang-orang yang beriman, kenangkanlah nikmat Allah yang dilimpahkanNya kepada kamu. Semasa kamu didatangi tentera (*Al-Ahzaab*), lalu Kami hantarkan kepada mereka angin ribut (yang kencang) serta angkatan tentera (dari malaikat) yang kamu tidak dapat melihatnya. Dan (ingatlah) Allah sentiasa melihat apa yang kamu lakukan. (9) Masa itu ialah masa tentera musuh datang melanggar kamu dari sebelah hulu dan dari sebelah hilir (tempat pertahanan) kamu; dan masa itu ialah masa pemandangan mata kamu tidak berketentuan arah (kerana gempar dan bingung) serta hati pun resah gelisah (kerana cemas takut), dan kamu masing-masing pula menyangka terhadap Allah dengan berbagai-bagai sangkaan. (10) Pada saat itulah diuji orang-orang yang beriman, dan digoncangkan perasaan dan pendiriannya dengan goncangan yang amat dahsyat. (11) Dan lagi masa itu ialah masa orang-orang munafik dan orang-orang yang tidak sihat dan tidak kuat iman dalam hatinya berkata: "Allah dan RasulNya tidak menjanjikan kepada kita melainkan

perkara yang memperdayakan sahaja".

(12) *Dan juga masa itu ialah masa segolongan di antara mereka berkata: "Wahai penduduk Yathrib, tempat ini bukan tempat bagi kamu (untuk berjuang di sini), oleh itu baliklah". Dan sebahagian dari mereka pula meminta izin kepada Nabi (hendak balik) sambil berkata: "Sesungguhnya rumah-rumah kami memerlukan perlindungan", pada hal ia tidak memerlukan perlindungan. Mereka hanya bertujuan hendak melarikan diri (dari berjuang menegakkan Islam).* (13) *Dan kalaulah tempat-tempat kediaman mereka itu diserang oleh musuh dari segala penjurunya, kemudian mereka diajak berpaling tadah menentang Islam, sudah tentu mereka akan melakukannya, dan mereka tidak bertangguh lagi tentang itu melainkan sebentar sahaja.* (14) *Pada hal sesungguhnya mereka telahpun mengikat janji dengan Allah sebelum itu, iaitu mereka tidak akan berpaling undur (dari medan perang yang mereka hadiri). Dan (ingatlah) janji setia dengan Allah itu akan ditanya kelak (tentang penyempurnaan).* (15) *Katakanlah (wahai Muhammad): "Kalaulah kamu melarikan diri dari kematian atau dari pembunuhan maka perbuatan melarikan diri itu tidak sekali-kali mendatangkan faedah kepada kamu; dan kalaulah kamu pada hari ini terlepas sekalipun, maka kamu tidak juga akan menikmati kesenangan hidup melainkan sedikit masa sahaja".* (16) *Katakanlah: "Siapakah yang dapat melindungi kamu dari kemurkaan Allah jika la mahu menimpakan bala bencana kepada kamu, atau (siapakah yang dapat menahan kemurahan Allah) jika la hendak*

memberikan rahmat kepada kamu? " Dan (ingatkanlah) mereka (yang munafik) itu: bahawa mereka tidak akan beroleh sesiapapun - yang lain dari Allah - yang akan menjadi pelindung atau penolong mereka. (17) Sesungguhnya Allah mengetahui akan orang-orang (munafik) yang menghalangi di antara kamu, dan orang-orang yang berkata kepada saudara-saudaranya: "Marilah bersatu dengan kami", sedang mereka tidak turut berperang melainkan sebentar sahaja. (18) Mereka bersikap bakhil kedekut terhadap kamu (wahai orang-orang mukmin untuk memberikan sebarang pertolongan); dalam pada itu apabila datang (ancaman musuh yang menimbulkan) ketakutan, engkau melihat mereka memandang kepadamu (wahai Muhammad, meminta pertolonganmu) dengan keadaan mata mereka berputar seperti orang yang pengsan semasa hampir mati. Kemudian apabila hilang perasaan takut itu, mereka mencela kamu dengan lidah yang tajam, sambil mereka tamakan kebaikan (yang diberikan Allah kepada kamu). Mereka itu tidak beriman, lalu Allah gugurkan amal-amal mereka. Dan yang demikian itu adalah mudah bagi Allah melaksanakannya. (19) Mereka menyangka bahawa tentera "Al-Ahzaab" itu belum pergi; dan kalaularah tentera Al-Ahzaab datang semula, tentulah mereka suka kalau mereka tinggal jauh di desa-desa bersama-sama orang-orang Arab Badwi sambil bertanyakan berita mengenai kamu; dan kalaularah mereka ada bersama-sama kamu (pada ketika itu), mereka tidak akan turut berperang melainkan sebentar sahaja. (20) Demi

sesungguhnya, adalah bagi kamu pada diri Rasulullah itu contoh ikutan yang baik, iaitu bagi orang yang sentiasa mengharapkan (keredaan) Allah dan (balasan baik) hari akhirat, serta ia pula menyebut dan mengingati Allah banyak-banyak (dalam masa susah dan senang) (21) Dan pada masa orang-orang yang beriman melihat tentera Al-Ahmaab, berkatalah mereka:" Inilah yang telah dijanjikan Allah dan RasulNya kepada kami dan benarlah (apa yang telah dijanjikan) Allah dan RasulNya". Dan (angkatan tentera musuh yang mereka lihat) itu tidak memberi sebarang kesan kepada mereka selain daripada menambahkan iman dan penyerahan diri mereka bulat-bulat kepada Allah. (22) Di antara orang-orang yang beriman itu, ada yang bersikap benar menunaikan apa yang telah dijanjikannya kepada Allah (untuk berjuang membela Islam); maka di antara mereka ada yang telah selesai menjalankan janjinya itu (lalu gugur syahid), dan di antaranya ada yang menunggu giliran; dan mereka pula tidak mengubah (apa yang mereka janjikan itu) sedikitpun. (23)

BAHAGIAN 4

SEMANGAT JIHAD DALAM KEHIDUPAN

4. SEMANGAT JIHAD DALAM KEHIDUPAN

Jihad ialah berusaha bersungguh-sungguh untuk menghasilkan sesuatu yang diredhai oleh Allah SWT dari keimanan, amal soleh dan menolak sesuatu yang dimurkai oleh Allah SWT dari kekufturan, kefasikan dan kederhanaan.

4.1 Konsep Jihad dalam Islam

Firman Allah SWT dalam surah al-Ankabut (29) ayat 69:

وَالَّذِينَ جَاهَدُوا فِينَا لَتَهْدِيَنَّهُمْ سُبْلَنَا وَإِنَّ اللَّهَ لَمَعٌ

الْمُحْسِنِينَ

Maksudnya: *Dan orang-orang yang berusaha dengan bersungguh-sungguh kerana memenuhi kehendak ugama Kami, sesungguhnya Kami akan memimpin mereka ke jalan-jalan Kami (yang menjadikan mereka bergembira serta beroleh keredaan); dan sesungguhnya (pertolongan dan bantuan) Allah adalah berserta orang-orang yang berusaha membaiki amalannya.* (69)

Rasulullah SAW menamakan jihad sebagai kemuncak kepada binaan Islam (*sanam al-Islam*) kerana jihad melahirkan tenaga yang menggerakkan dakwah rohaniah. Roh atau semangat jihad ini akan muncul di hati sanubari manusia setelah mereka menyerah diri kepada Allah SWT untuk dididik dan diasuh dengan hikmahNya.

Dalam hadis riwayat Imam at-Tirmizi (2616), daripada Mu'az Bin Jabal RA berkata:

..ثُمَّ قَالَ : أَلَا أَخْبِرُكَ بِرَأْسِ الْأَمْرِ كُلِّهِ وَعُمُودِهِ ، وَذِرْوَةِ سَنَامِهِ ؟ قَلْتُ : بَلِي يَا رَسُولَ اللَّهِ ، قَالَ : رَأْسُ الْأَمْرِ إِلَّا إِسْلَامٌ ، وَعُمُودُهُ الصَّلَاةُ ، وَذِرْوَةُ سَنَامِهِ الْجِهَادُ ..

Bermaksud: ..Tidakkah kamu ingin aku khabarkan bahawa kepala (asas utama) bagi keseluruhan perkara serta tiang-tiangnya (perkara yang mendirikannya), dan kemuncak tertingginya? Aku berkata: Sudah pasti (mahu) wahai Rasulullah, Baginda SAW bersabda: Kepala (asas utama) itu ialah Islam, dan tiang-tiangnya adalah Solat, dan puncak tertingginya pula ialah jihad..

4.2 Empat Keutamaan Berjihad

Para ulamak menjelaskan terdapat empat keutamaan jihad. Antaranya ialah:

- 1) Berjihad supaya nafsu tunduk mencari petunjuk dan kebenaran agama yang benar.
- 2) Berjihad supaya nafsu tunduk untuk beramal.
- 3) Berjihad supaya nafsu tunduk untuk menyebarkan dakwah.
- 4) Berjihad supaya nafsu dapat bersabar menghadapi kesukaran menjalani dakwah kepada Allah SWT dan segala rintangan yang dilakukan oleh musuh.

4.2.1 Jihad di dalam Mencari Petunjuk dan Kebenaran Agama

Jihad jenis ini adalah titik tolak kepada usaha jihad yang dapat menjauhkan diri kita daripada kesesatan dan penyelewengan. Jalan dan *manhajnya* telah ditentukan di dalam al-Quran dan hadis nabi SAW Dengan ilmu pengetahuan dapat menyedarkan mereka tentang keagungan Allah SWT, kelemahan makhluknya, kekuasaan-Nya, dan kejahilan hambaNya. Ilmu pengetahuan yang memandu mereka kepada kebahagian dunia dan akhirat. Sebaliknya, orang yang tidak berilmu akan merosakkan dirinya dengan mengikuti jalan-jalan yang tidak diredhai oleh Allah SWT dan Rasul-Nya.

4.2.2 Berjihad ntuk Tunduk dan Beramal

Berjihad dengan mengamalkan dan bergantung kuat dengan apa yang dipelajari akan membawaikan sifat taqwa. Seseorang yang hanya mengenali jalan tanpa melaluinya tidak memberi sebarang faedah kepadanya. Seorang penyair telah berkata: "Seandainya ilmu ada kemuliaannya tanpa taqwa, maka jadilah iblis itu semulia-mulia makhluk". Inilah yang dilakukan oleh para sahabat, mereka tidak melangkaui sehingga mereka tahu dan beramal.

Mereka mengambil masa yang lama untuk menghafalnya. Contohnya Ibn Umar menghafal surah al-Baqarah selama 8 tahun. Begitu juga Nabi Muhammad SAW tidak akan memindahkan sesuatu ilmu, kecuali setelah difahami dan diamalkan oleh para sahabat. Sekiranya amal itu kurang daripada ilmunya, maka ilmu akan menjadi beban kepada orang yang berilmu.

Firman Allah SWT dalam Surah al-Kahfi (18) ayat 110:

فُلْ إِنَّمَا أَنَا بَشَرٌ مِثْلُكُمْ يُوَحَّى إِلَيَّ أَنَّمَا إِلَهُكُمْ
إِلَهُ وَاحِدٌ فَمَنْ كَانَ يَرْجُوا لِقَاءَ رَبِّهِ فَلْيَعْمَلْ
عَمَالًا صَالِحًا وَلَا يُشْرِكْ بِعِبَادَةِ رَبِّهِ أَحَدًا
۱۱۰

Maksudnya: Katakanlah (wahai Muhammad): "Sesungguhnya aku hanyalah seorang manusia seperti kamu, diwahyukan kepadaku bahawa Tuhan kamu hanyalah Tuhan Yang Satu; Oleh itu, sesiapa yang percaya dan berharap akan pertemuan dengan Tuhannya, hendaklah ia mengerjakan amal yang soleh dan janganlah ia memperseketukan sesiapapun dalam ibadatnya kepada Tuhanya". (110)

4.2.3 Berjihad Menyebarluaskan Dakwah

Berjihad menyebarluaskan dakwah antara sepenting-penting jihad khususnya apabila terdapat banyak keburukan dan kejahatan yang dilakukan oleh manusia dan dalam masa yang hukum-hukum Allah SWT diketepikan. Ketiadaan jihad ini telah menyebabkan musuh-musuh Islam mengambil peluang untuk menyebarluaskan dakyah sesat mereka. Inilah jihad yang ditinggalkan oleh umat Islam hari ini sehingga musuh-musuh Islam menguasai mereka dari setiap segi dan penjuru. Kewajipan berdakwah adalah tanggungjawab utama terhadap Allah SWT selepas mengucap dua kalimah syahadah. Ini bermakna ia adalah tuntutan dan syarat kesempurnaan iman seseorang.

Firman Allah SWT dalam Surah asy-Syura (42) ayat 15:

فَلِدِيلَكَ فَادْعُ وَاسْتَقِمْ كَمَا أُمِرْتَ وَلَا تَتَّبِعْ
أَهْوَاءَهُمْ وَقُلْ إِنَّمَا أَنْزَلَ اللَّهُ مِنْ كِتَابٍ
وَأُمِرْتُ لِأَعْدِلَ بَيْنَكُمْ اللَّهُ رَبُّنَا وَرَبُّكُمْ لَنَا
أَعْمَلْنَا وَلَكُمْ أَعْمَلْكُمْ لَا حُجَّةَ بَيْنَنَا
وَبَيْنَكُمُ اللَّهُ يَجْمِعُ بَيْنَنَا وَإِلَيْهِ الْمَصِيرُ ﴿١٥﴾

Maksudnya: Oleh kerana yang demikian itu, maka serulah (mereka - wahai Muhammad - kepada berugama dengan betul), serta tetap teguhlah engkau menjalankannya sebagaimana yang diperintahkan kepadamu, dan janganlah engkau menurut kehendak hawa nafsu mereka; sebaliknya katakanlah: "Aku beriman kepada segala Kitab yang diturunkan oleh Allah, dan aku diperintahkan supaya berlaku adil di antara kamu. Allah jualah Tuhan kami dan Tuhan kamu. Bagi kami amal kami dan bagi kamu amal kamu. Tidaklah patut ada sebarang pertengkaran antara kami dengan kamu (kerana kebenaran telah jelas nyata). Allah akan menghimpunkan kita bersama (pada hari kiamat), dan kepadaNyalah tempat kembali semuanya (untuk dihakimi dan diberi balasan)". (15)

4.2.4 Berjihad Menghadapi Kesukaran Dakwah dan Rintangan oleh Musuh

Berjihad pada jalan Allah SWT pasti akan berhadapan dengan pelbagai cabaran dan kesulitan. Ramai dalam kalangan umat Islam meninggalkan jihad ini disebabkan oleh kejahilan manusia demi menjaga kepentingan dunia. Justeru, orang yang beriman akan bersabar kerana Allah SWT menjanjikan di dalam Surah al-Hajj (22) ayat 38-40:

٤٠ إِنَّ اللَّهَ يُدَافِعُ عَنِ الَّذِينَ ءاْمَنُوا إِنَّ اللَّهَ لَا يُحِبُّ
كُلَّ خَوَانِ كَفُورٍ ﴿٣٨﴾ أَذْنَ لِلَّذِينَ يُقْتَلُونَ بِأَنَّهُم
ظَلِمُوا وَإِنَّ اللَّهَ عَلَى نَصْرِهِمْ لَقَدِيرٌ ﴿٣٩﴾ الَّذِينَ
أُخْرَجُوا مِن دِيَرِهِم بِغَيْرِ حَقٍ إِلَّا أَن يَقُولُوا رَبُّنَا
اللَّهُ وَلَا دَفْعُ اللَّهِ النَّاسَ بَعْضَهُم بِعَضٍ
لَهُدِمَتْ صَوَامِعُ وَبَيْعَ وَصَلَوَاتٌ وَمَسَاجِدُ يُذْكُرُ
فِيهَا أُسْمُ اللَّهِ كَثِيرًا وَلَيَنْصُرَنَّ اللَّهُ مَنْ يَنْصُرُهُ وَ
إِنَّ اللَّهَ لَقَوِيٌّ عَزِيزٌ ﴿٤٠﴾

Maksudnya: Sesungguhnya Allah membela orang-orang yang beriman; sesungguhnya Allah tidak suka kepada tiap-tiap seorang yang khianat, lagi tidak bersyukur. (38) Diizinkan berperang bagi orang-orang (Islam) yang diperangi (oleh golongan penceroboh), kerana sesungguhnya mereka telah dianiaya; dan

sesungguhnya Allah Amat Berkusa untuk menolong mereka (mencapai kemenangan). (39) laitu mereka yang diusir dari kampung halamannya dengan tidak berdasarkan sebarang alasan yang benar, (mereka diusir) semata-mata kerana mereka berkata: "Tuhan kami ialah Allah". Dan kalaularah Allah tidak mendorong setengah manusia menentang pencerobohan setengahnya yang lain, nescaya runtuhlah tempat-tempat pertapaan serta gereja-gereja (kaum Nasrani), dan tempat-tempat sembahyang (kaum Yahudi), dan juga masjid-masjid (orang Islam) yang sentiasa disebut nama Allah banyak-banyak padanya dan sesungguhnya Allah akan menolong sesiapa yang menolong ugamaNya (ugama Islam); sesungguhnya Allah Maha Kuat, lagi Maha Kuasa; - (40)

Inilah jalan kebenaran yang dilalui oleh para Rasul dan Nabi, dan para salihin, serta hakikat yang terpaksa yang dihadapi oleh para daie hari ini untuk menegakkan kalimah Allah SWT dalam melaksanakan Syariat-Nya.

4.3 Salah Faham Terhadap Jihad

Istilah jihad telah menjadi istilah yang menakutkan (*logophobia*) pada masa kini. Ini berikutan penggunaannya dalam konteks yang sempit oleh golongan ekstremisme agama. Konsep jihad yang murni dan luas telah dicemarkan dengan fahaman dan tindakan melampaui batas sehingga menyebabkan istilah jihad menjadi negatif terutama dalam kalangan masyarakat bukan Islam

Di dalam al-Quran, Allah SWT berfirman, di dalam Surah al-Baqarah (2) Ayat 190:

وَقَاتَلُوا فِي سَبِيلِ اللَّهِ الَّذِينَ يُقَاتِلُونَكُمْ وَلَا تَعْنَدُوا إِنَّ

اللَّهَ لَا يُحِبُّ الْمُعْتَدِينَ ﴿١٩٠﴾

Maksudnya: *Dan perangilah kerana (menegakkan dan mempertahankan) ugama Allah akan orang-orang yang memerangi kamu, dan janganlah kamu menceroboh (dengan memulakan perang); kerana sesungguhnya Allah tidak suka kepada orang-orang yang menceroboh.* (190)

Prinsip umum Islam adalah agama yang mementingkan keamanan daripada perang. Islam menganjurkan semua manusia terutamanya orang Islam supaya menjaga keamanan dan berbaik-baik dengan semua bangsa dan pengikut agama lain. Jihad yang utama dalam konteks hidup bermasyarakat ialah jihad menentang hawa nafsu, jihad menuntut ilmu dan memerangi kejahilan, jihad membentras kemiskinan, masalah sosial dan sebagainya.

Keamanan dan keharmonian yang membolehkan umat Islam berjihad membangunkan ummah dengan cara memerangi kemiskinan, kejahilan dan lain-lain. Kekuatan akidah dan ilmu pengetahuan haruslah dijadikan jihad utama pada hari ini agar umat Islam menjadi kuat dan dihormati. Selain itu, umat Islam juga perlu memberi tumpuan kepada kekuatan ekonomi dan teknologi yang menjadi kekuatan asas bagi mempertingkatkan kedudukan umat Islam di mata dunia.

Jihad terhadap orang bukan Islam pada hari ini adalah melalui pengasuhan akidah, pemikiran, dakwah dan akhlak. Rasulullah SAW bangkit memberi peringatan, menahan diri daripada kekerasan dan berdakwah dengan penuh hikmah, kasih

sayang, saling menghormati dan menyayangi antara satu sama lain. Di Madinah, nabi Muhammad SAW dimusuhi oleh golongan Musyrikin dan Yahudi tetapi Allah SWT menyuruh umat Islam bersabar dan memaafkan mereka sehingga orang Islam mempunyai kekuatan, tetapi tidak diwajibkan, malah diizinkan berperang jika mereka dianiaya orang-orang bukan Islam. Ini bermakna Islam tidak mengajar umatnya memulakan perperangan.

Allah SWT memerintahkan umat Islam mempertahankan diri dengan senjata daripada penganiayaan kaum musyrikin. Setelah kedudukan dakwah telah mantap, Allah SWT memerintahkan supaya memerangi golongan yang memerangi mereka. Di peringkat ini, mereka tidak lagi diberi pilihan sama ada berperang atau bersabar, tetapi mereka wajib mempertahankan diri namun hanya terhadap mereka yang menceroboh.

4.4 Peringkat-peringkat Jihad

Bagi menjelaskan lagi bahawa jihad bukan sekadar bermaksud perang, amat baik jika kita merujuk kepada perbahasan mengenai peringkat-peringkat jihad sebagaimana yang dibentangkan oleh Ibn al-Qayyim dalam Kitab Zad al-Ma'ad. Menurut Ibn al-Qayyim, secara amnya, jihad terbahagi kepada empat bahagian iaitu:

- 1) Jihad memperbaiki diri (melawan nafsu).
- 2) Jihad melawan godaan syaitan.
- 3) Jihad memerangi orang-orang kafir.
- 4) Jihad terhadap orang-orang munafik.

4.4.1 Jihad Melawan Nafsu

Jihad melawan nafsu adalah perkara yang perlu setiap umat Islam mengambil berat kerana ia jihad untuk mengawal diri dari dikuasai oleh hawa nafsu. Cara untuk berjihad melawan nafsu mempunyai empat peringkat iaitu:

- 1) Melakukan jihad terhadap diri supaya mempelajari petunjuk, dan agama yang sebenar. Tiada kebahagiaan dan kejayaan untuk diri sendiri tanpanya dan tiada kebahagiaan di dunia dan akhirat tanpanya. Apabila jiwa tidak dibekalkan dengan ilmu, maka malang dia di dunia dan akhirat.
- 2) Berjihad terhadap diri supaya mengamalkan ilmu yang diperoleh. Apabila seseorang itu tidak mengamalkannya, maka ilmu yang dipelajari hanya sekadar menjadi ilmu tanpa amal. Walaupun tidak membahayakannya, tetapi tiada manfaat yang dapat diambil.
- 3) Berjihad terhadap diri supaya berdakwah dan menyampaikan ilmu kepada orang-orang yang tidak mengetahuinya. Sekiranya tidak melakukannya, dia termasuk dalam golongan yang menyembunyikan apa yang Allah SWT turunkan daripada petunjuk dan penerangan. Ilmunya tidak memberikan manfaat dan tidak dapat menyelamatkannya daripada seksaan Allah SWT.
- 4) Berjihad dengan kesabaran ketika mengalami kesukaran dan seksaan daripada makhluk dalam berdakwah pada jalan Allah SWT dan menanggung semuanya dengan mengharapkan redha Allah SWT.

4.4.2 Jihad Melawan Syaitan

Jihad melawan syaitan mempunyai dua peringkat, iaitu:

- 1) Berjihad melawan syaitan dengan membuang segala kebimbangan dan keraguan (*shubuhat*) yang dilemparkan oleh syaitan kepada manusia bagi merosakkan iman. Ini termasuk menjawab segala bentuk keraguan yang ditimbul oleh pihak tertentu terhadap akidah dan syariat Islam seperti menuduh Islam sebagai agama *terorisme*, Nabi Muhammad seorang pedofilia kerana menikahi kanak-kanak, majoriti para sahabat telah murtad dan lain-lain.
- 2) Berjihad melawan syaitan yang mengarahkan manusia agar memenuhi nafsu syahwatnya dengan melakukan kemungkaran dan kemaksiatan. Ia seperti mencegah manusia melakukan zina, pergaulan bebas, orientasi seks songsang (LGBT), rasuah, penyelewengan kuasa, zalim, khianat dan lain-lain.

4.4.3 Jihad Melawan Bid'ah dan Penyelewengan Intelektual

- 1) Jihad melawan bid'ah bermaksud berjihad dalam menyekat ajaran-ajaran baharu dan menyeleweng dalam akidah dan syariah yang menyesatkan atas nama Islam. Ia dikenali sebagai ajaran sesat seperti Syiah, Qadiyani, Khawarij, Murji'ah, Muktazilah, Ayah Pin, Haji Kahar Rasul Melayu dan lain-lain. Bid'ah yang direkacipta atas nama agama jauh lebih bahaya berbanding maksiat kerana maksiat dapat dilihat dan disingkap urusannya. Manakala bid'ah bersembunyi di sebalik pakaian agama dan diperkenalkan sebagai perkara yang mampu mendekatkan diri kepada Allah SWT sedangkan ia perkara yang tertolak di sisi agama. Ia sering kali disebut oleh Nabi Muhammad SAW dalam beberapa hadis, antaranya:

Dalam hadis riwayat Imam al-Bukhari (2697) dan Imam Muslim (1718), daripada Aisyah RA bahawa nabi Muhammad SAW bersabda:

مَنْ أَخْدَثَ فِيْ أَمْرِنَا هَذَا مَا لَيْسَ فِيهِ، فَهُوَ رَدٌّ

Bermaksud: “*Barangsiaapa membuat suatu perkara baru dalam urusan kami ini (urusan agama) yang tiada ada asalnya, maka perkara tersebut tertolak.*”

- 2) Manakala penyelewengan intelektual pula merupakan bentuk-bentuk pemikiran yang disandarkan kepada Islam atas nama progresif dan kemodenan. Namun hakikatnya, ia telah melanggar prinsip-prinsip dan batasan-batasan syarak. Antaranya seperti menyeru kepada pentafsiran semula al-Quran, kebebasan murtad, kesaksamaan gender termasuk dalam isu faraid, menyamaratakan semua agama dan seumpamanya.

Jihad perlu dilancarkan dalam menangani kedua-dua golongan ini. Ia sama ada dengan menggunakan kuasa undang-undang, atau ceramah dan penulisan bagi menjelaskan dan menjawab dengan hujah segala kesesatan dan penyeleweng yang ditimbulkan.

4.4.4 Jihad Melawan Musuh yang Jelas

Jihad melawan orang kafir dan munafik yang jelas disebut dalam Surah al-Furqaan (25) ayat 51-52:

وَأَنُوْشِئُنَا لَبَعْثَنَا فِي كُلِّ قَرْيَةٍ نَّذِيرًا ﴿٥١﴾ فَلَا تُطِعِ

الْكُفَّارِينَ وَجَاهُهُم بِهِ جِهَادًا كَيْرًا ﴿٥٢﴾

Maksudnya: *Dan kalau Kami kehendaki, tentulah Kami utuskan dalam tiap-tiap negeri, seorang Rasul pemberi amaran. (51) Oleh itu, janganlah engkau (Wahai Muhammad) menurut kehendak orang-orang kafir, dan berjuanglah dengan hujah-hujah Al-Quran menghadapi mereka dengan perjuangan yang besar dan bersungguh-sungguh. (52)*

Jihad menentang orang kafir dan munafik ada empat peringkat iaitu jihad dengan hati, lidah, harta, dan jiwa. Jihad menentang orang kafir lebih dikhkususkan dengan tangan (kekuatan), manakala jihad menentang orang munafik lebih dikhkususkan dengan lidah (dakwah).

Adapun jihad untuk menentang orang kafir yang memerangi Islam, maka ia tertakluk kepada hukum hakam sebagaimana yang dibahaskan oleh para ulama dalam bab fiqah jihad. Namun begitu, jihad menentang musuh-musuh Allah SWT di luar tetap merupakan cabang daripada jihad seorang hamba melawan hawa nafsu demi mentaati Allah SWT.

BAHAGIAN 5

KEWAFATAN NABI MUHAMMAD SAW

5. KEWAFATAN NABI MUHAMMAD SAW

5.1 Peristiwa Haji Wada

Peristiwa ini telah diriwayatkan berlaku pada tahun ke 10 H bersempena dengan pembukaan Kota Mekah selepas 10 tahun mereka berhijrah ke Madinah. Umat Islam sangat gembira kerana dapat kembali ke tanah air kelahiran mereka, iaitu Mekah tanpa sebarang perperangan dan tentangan daripada kaum kafir Quraisy lagi.

Tanggal 25 Zulkaedah bersamaan dengan 22 Februari 632 M, iaitu pada hari Sabtu, Rasulullah SAW telah menaiki untanya dan memakai ihram untuk melaksanakan hajinya yang pertama. Haji Wada ini telah disertai seramai 10,000 muslimin. Antara para sahabat dan ahli keluarga Baginda SAW yang turut serta dalam haji ini ialah Abu Bakar as-Siddiq RA, Aisyah binti Abu Bakar RA, Asma binti Abu Bakar RA dan Muawiyah bin Abu Sufian RA. Isteri Abu Bakar RA turut serta dalam haji ini dan diceritakan isteri beliau telah melahirkan seorang putera yang diberi nama Muhammad bin Abu Bakar RA. Bayi tersebut merupakan antara yang paling muda yang telah mengerjakan haji.

Selesai mengerjakan haji, Rasulullah SAW telah berdiri di Wadi Uranah bagi menyampaikan khutbahnya yang terakhir. Para sahabat, ahli keluarga dan semua muslimin telah menjadi saksi peristiwa dan khutbah yang disampaikannya. Sayidina Abu Bakar RA menyedari bahawa haji tersebut merupakan haji terakhir Baginda SAW kerana isi khutbah yang disampaikannya sangat menyentuh hati dan perasaan semua umat Islam. Haji itu juga berlaku selepas sempurna wahyu dan ajaran yang disampaikan kepada umat Islam.

Allah SWT telah menurunkan wahyu terakhir kepada Rasulullah SAW. Sebagaimana dinyatakan dalam al-Quran, Surah al-Maidah (5) ayat 5:

الْيَوْمَ أُحِلَّ لَكُمُ الظَّبَابَتُ وَطَعَامُ الَّذِينَ أُوتُوا الْكِتَابَ
حِلٌّ لَكُمْ وَطَعَامُكُمْ حِلٌّ لَهُمُ وَالْمُحْسَنُ مِنَ
الْمُؤْمِنَاتِ وَالْمُحْسَنُ مِنَ الْمُؤْمِنَاتِ وَالْمُحْسَنُ
مِنَ الَّذِينَ أُوتُوا الْكِتَابَ مِنْ قَبْلِكُمْ مُخْصِسِينَ غَيْرُ
مُسَفِّحِينَ وَلَا مُنَّتَّخِدِي أَحْدَانٍ وَمَنْ يَكْفُرْ بِالْإِيمَانِ
فَقَدْ حَبَطَ عَمَلُهُ وَهُوَ فِي الْآخِرَةِ مِنَ الْخَسِيرِينَ

◎ ٥

Maksudnya: Pada masa ini dihalalkan bagi kamu (memakan makanan) yang lazat-lazat serta baik-baik. Dan makanan (sembelihan) orang-orang yang diberikan Kitab itu adalah halal bagi kamu, dan makanan (sembelihan) kamu adalah halal bagi mereka (tidak salah kamu memberi makan kepada mereka). Dan (dihalalkan kamu berkahwin) dengan perempuan-perempuan yang menjaga kehormatannya - di antara perempuan-perempuan yang beriman, dan juga perempuan-perempuan yang menjaga kehormatannya dari kalangan orang-orang yang diberikan Kitab dahulu daripada kamu apabila kamu beri mereka maskahwinnya, sedang kamu (dengan cara yang demikian), bernikah bukan berzina, dan bukan pula kamu mengambil mereka menjadi perempuan-perempuan simpanan. Dan sesiapa yang ingkar (akan syariat Islam) sesudah ia beriman, maka sesungguhnya gugurlah amalnya

(yang baik) dan adalah ia pada hari akhirat kelak dari orang-orang yang rugi. (5)

Khutbah Hujjatul Wada penting kerana di dalamnya terkandung mesej yang perlu difahami, diingati dan diikuti umat Islam walaupun selepas kewafatan Rasulullah SAW. Sebagaimana dalam hadis yang diriwayatkan daripada Kitab Sunan ad-Darimi (229), Rasulullah SAW bersabda:

أَيُّهَا النَّاسُ، اسْمَعُوا مِنِّي أَبْيَنْ لَكُمْ، فَإِنِّي لَا أَذْرِي، لَعَلَّنِي
لَا أَلْقَأُكُمْ بَعْدَ عَامِي هَذَا، فِي مَوْقِفٍ هَذَا

Bermaksud: “Wahai manusia dengarlah baik-baik apa yang hendak aku katakan! Aku tidak mengetahui apakah aku dapat bertemu lagi dengan kamu semua selepas tahun ini. Oleh itu dengarlah dengan teliti kata-kataku ini dan sampaikanlah ia kepada orang-orang yang tidak dapat hadir di sini pada hari ini.”

Jika diamati, hampir semua mesej disampaikan Baginda SAW dalam Khutbah Hujjatul Wada menyentuh hubungan sesama manusia. Antaranya berkenaan hak asasi manusia iaitu kesucian darah manusia yang tidak patut ditumpahkan ke muka bumi dengan sia-sia. Mesej kedua yang terkandung dalam khutbah juga menyebut mengenai penjagaan harta. Ia menekankan tentang kesucian harta milik seseorang sepatutnya tidak diganggu atau diambil individu lain tanpa persetujuan pemiliknya. Rasulullah SAW juga menyebut hak wanita dalam hubungan suami isteri dan masyarakat.

Seterusnya, Baginda SAW berpesan supaya berpegang kepada dua sumber utama Islam iaitu kitab al-Quran dan sunah kerana ia tidak akan menyesatkan dan tidak hilang sehingga kiamat. Akhirnya, Rasulullah SAW berpesan bahawa semua umat Islam itu bersaudara dan mesti saling mengingati dengan melakukan dakwah, di samping seruan penting agar

mengingatkan umat Islam supaya kekal di jalan lurus dan tidak terpengaruh dengan amalan hidup kekafirah.

5.2 Peristiwa Kewafatan Nabi Muhammad SAW

Kira-kira tiga bulan selepas kembali daripada menunaikan haji wada, Nabi Muhammad SAW menderita sakit yang cukup serius. Baginda SAW kali pertama mengadu kesakitannya semasa berada di rumah Ummul Mukminin, Maimunah RA. Nabi Muhammad SAW meminta kepada para isterinya untuk dirawat di rumah Aisyah RA. Aisyah RA mengusap badan Nabi Muhammad SAW sambil membaca surah al-Widzatain iaitu Surah al-Falaq dan Surah an-Nas. Dalam hadis riwayat Imam al-Bukhari (4433):

وَلَمَّا ارْتَقَعَ الضَّحْكَى دَعَا النَّبِيُّ صَلَّى اللَّهُ عَلَيْهِ وَسَلَّمَ فَاطِمَةَ
رَضِيَ اللَّهُ عَنْهَا فَسَارَهَا بِشَيْءٍ فَبَكَّتْ ثُمَّ دَعَاهَا فَسَارَهَا
بِشَيْءٍ فَصَحَّكَتْ قَالَتْ عَائِشَةَ رَضِيَ اللَّهُ عَنْهَا فَسَأَلَنَا عَنِ
ذَلِكَ أَيِّ فِيمَا بَعْدَ فَقَالَتْ: سَارَنِي النَّبِيُّ صَلَّى اللَّهُ عَلَيْهِ
وَسَلَّمَ أَنَّهُ يُقْبَضُ فِي وَجْهِهِ الَّذِي تُؤْفَى فِيهِ فَبَكَيْتُ، ثُمَّ سَارَنِي
فَأَخْبَرَنِي أَيِّ أَوَّلُ أَهْلِهِ يَتَبَعَّهُ فَصَحَّكْتُ....

Bermaksud: "Di saat kewafatan Nabi Muhammad SAW, pada waktu Dhuha Baginda SAW SAW memanggil Fatimah RA lalu membisikkan sesuatu kepadanya, lalu Fatimah RA pun menangis. Kemudian Baginda SAW memanggilnya sekali lagi lalu membisikkan sesuatu sehingga Fatimah RA tersenyum. Aisyah RA bertanya tentang hal itu, lalu Fatimah RA menjawab: Rasulullah SAW membisikkan kepadaku bahawa Baginda SAW akan wafat dengan sakit yang sedang dihadapinya, lantas aku menangis. Kemudian

Baginda SAW SAW membisikkan kepadaku bahawa aku adalah ahli keluarganya yang pertama akan menyusul selepas daripada Baginda SAW, maka Fatimah tersenyum...”.

Nabi SAW juga turut menghiburkan Fatimah RA Sebagaimana dalam hadis riwayat Imam al-Bukhari (3623), Nabi SAW bersabda:

أَمَا تَرَضِينَ أَنْ تَكُونِي سَيِّدَةً نِسَاءَ أَهْلِ الْجَنَّةِ – أَوْ نِسَاءً
الْمُؤْمِنِينَ – فَضَحَّكَتْ لِذَلِكَ

Bermaksud: Apakah kamu tidak redha untuk menjadi penghulu wanita syurga dan penghulu wanita mukmin – maka Fatimah pun tersenyum.

Nabi SAW juga turut menghiburkan Fatimah RA bahawa dia adalah ketua atau penghulu wanita sekalian alam. Setelah itu, Baginda SAW memanggil Hasan RA dan Husain RA lalu berpesan kepada mereka dengan kebaikan. Kemudian, Baginda SAW memanggil pula para isterinya lalu memberi nasihat dan peringatan kepada mereka. Sakit Baginda SAW bertambah kuat akibat daripada kesan racun daging kambing yang dikunyahnya di Khaibar. Sebagaimana dalam hadis riwayat Imam al-Bukhari (4449):

وَبَدَأَتْ سَاعَةً احْتِضارَهُ صَلَى اللَّهُ عَلَيْهِ وَسَلَّمَ
فَأَسْنَدَتِهِ عَائِشَةَ رَضِيَ اللَّهُ عَنْهَا إِلَى صَدَرِهَا وَكَانَتْ
تَقُولُ : إِنَّ مِنْ يَعْمَلُ اللَّهَ عَلَيْيَ : أَنَّ رَسُولَ اللَّهِ صَلَّى اللَّهُ عَلَيْهِ
وَسَلَّمَ ثُوُقَّيْ فِي بَيْتِيْ، وَفِي يَوْمِيْ، وَبَيْنَ سَحْرِيْ وَنَحْرِيْ، وَإِنَّ
اللَّهَ جَمَعَ بَيْنَ رِيقِيْ وَرِيقِهِ عِنْدَ مَوْتِيْ

Bermaksud: Ketika tiba saat terakhir kehidupan Rasulullah SAW, lalu Aisyah RA menyandarkan Baginda SAW ke ribanya. Aisyah berkata: Antara nikmat-nikmat yang Allah kurniakan kepadaku ialah Rasulullah SAW wafat di dalam rumahku semasa giliranku dan di pangkuanku antara leher dan dadaku.”

Ketika Abdul Rahman bin Abu Bakar RA masuk menemui Baginda SAW dengan ditangannya kayu sugi. Rasulullah SAW memandang ke arah Abdul Rahman RA untuk meminta kayu sugi tersebut. Sebaik sahaja selesai bersugi, Baginda SAW mengangkat tangannya atau jarinya serta mendongak ke bumbung sambil bibirnya bergerak. Aisyah RA merapatkan telinganya kerana ingin mendengar apa yang diucapkan oleh Baginda SAW SAW, sebagaimana dalam hadis riwayat Imam at-Tirmizi (3496):

حَدَّثَنَا هَارُونُ حَدَّثَنَا عَبْدَةُ عَنْ هِشَامِ بْنِ عُرْوَةَ عَنْ عَبَادِ
بْنِ عَبْدِ اللَّهِ بْنِ الزُّبَيرِ عَنْ عَائِشَةَ قَالَتْ سَعَيْتُ رَسُولَ اللَّهِ
صَلَّى اللَّهُ عَلَيْهِ وَسَلَّمَ يَقُولُ عِنْدَ وَفَاتِهِ اللَّهُمَّ اغْفِرْ لِي
وَارْحَمْنِي وَأَلْحِفْنِي بِالرَّفِيقِ الْأَعْلَىٰ . قَالَ أَبُو عِيسَى هَذَا
حَدِيثٌ حَسْنٌ صَحِيحٌ.

Bermaksud: Telah menceritakan kepada kami Harun telah menceritakan kepada kami 'Abdah dari Hisyam bin 'Urwah dari 'Abbad bin Abdallah bin Az Zubair dari Aisyah ia berkata; saya mendengar Rasulullah SAW ketika hendak meninggal mengucapkan, "Allaahummaghfirla, Warhamnii, Wa Alhiqni Birraifiqil A'laa" (Ya Allah, ampunilah aku, rahmatilah aku, dan pertemukan

aku dengan kekasih Yang Tertinggi). [Abu Isa berkata hadis ini adalah hadis hasan sahih.]

Dalam Kitab ar-Rahiq al-Makhtum (430-432), Baginda SAW mengulangi kalimah akhir tersebut sebanyak tiga kali, kemudian tangan Baginda SAW terkulai layu dan Baginda SAW pun pergi mengadap Kekasih Yang Tertinggi.

BAHAGIAN 6

KEPIMPINAN KHULAFĀ AR-RASYIDIN

6. KEPIMPINAN KHULAFĀ AR-RASYIDIN

Tamadun Islam pada zaman *Khulafā ar-Rasyidin* terserlah daripada aspek siasah, dakwah dan pentadbiran negara Islam yang sistematik. *Khulafā ar-Rasyidin* yang dimaksudkan ialah terdiri daripada:

- 1) Sayidina Abu Bakar as-Siddiq RA.
- 2) Sayidina Umar al-Khattab RA.
- 3) Sayidina Uthman bin Affan RA.
- 4) Sayidina Ali bin Abi Talib RA.

Keempat-empat khalifah telah berjaya menjadikan negara Islam di Madinah sebuah negara yang kukuh dengan menggunakan pendekatan siasah dan dakwah masing-masing. Sistem khalifah semasa zaman ini juga merupakan satu corak pemerintahan yang unggul dan memenuhi tuntutan dalam hidup bermasyarakat dan bernegara sesuai dengan fitrah manusia itu sendiri. Sistem khalifah ini berjalan berdasarkan ajaran wahyu daripada Allah SWT yang disampaikan menerusi Rasulullah SAW dan seterusnya diteruskan oleh khalifah selepasnya.

Pendekatan siasah dan dakwah *khulafā ar-Rasyidin* telah banyak berjasa terhadap pembangunan negara Islam. Tugas dan peranan utama yang dilakukan oleh Khulafā ar-Rasyidin adalah untuk meneruskan proses kesinambungan kepimpinan ummah dan pemerintahan kerajaan Islam Madinah yang telah diasaskan oleh Baginda Rasulullah SAW. Tumpuan usaha diberikan untuk meneruskan tugas pemerintahan dan rancangan oleh Rasulullah SAW bagi memantapkan serta memperkuatkan kedudukan ummah dan kerajaan Islam.

Dasar perluasan wilayah kerajaan Islam yang dijalankan oleh *Khulafa ar-Rasyidin* menyebabkan kedudukan pemerintahan kerajaan Islam menjadi bertambah kuat dan besar, kedudukan ekonomi kerajaan Islam menjadi semakin mantap serta kukuh dan ilmu pengetahuan berkembang dengan pesat hasil daripada berlaku asimilasi dan interaksi antara golongan Islam dengan penduduk setempat di kawasan-kawasan yang telah ditakluki oleh mereka.

6.1 Sayidina Abu Bakar al-Siddiq RA

Sayidina Abu Bakar RA dilahirkan pada 572 M dan meninggal dunia pada 634 M bersamaan 21 Jamadilakhir tahun 13 H. Beliau termasuk antara golongan yang paling awal memeluk Islam. Nama sebenarnya adalah Abdul Kabah bin Usman, kemudian diubah oleh Rasulullah SAW menjadi Abdullah. Sumber lain menyebutkan namanya adalah Abdullah bin Quhaffah berasal daripada keturunan Bani Tamim. Nabi Muhammad SAW memberinya gelaran al-Siddiq kerana sentiasa membenarkan kata-kata Nabi Muhammad SAW, sehingga beliau lebih dikenali dengan nama Abu Bakar as-Siddiq RA. Baginda SAW memilih Abu Bakar RA untuk menemaninya ketika berhijrah dan mengimami solat mengantikan Baginda SAW, kerana beliau paling banyak berkorban.

Sejak memeluk Islam, beliau berhasrat membantu Baginda SAW dalam berdakwah demi agama Allah dan membela kaum Muslimin. Beliau lebih mencintai Rasulullah SAW daripada dirinya sendiri, selalu mendampingi Rasulullah SAW dalam setiap peristiwa. Justeru, kaum Muslimin mengangkatnya sebagai khalifah pengganti Rasulullah SAW. Di samping itu, imannya begitu teguh, akhlaknya pun cukup sempurna dan semangatnya berkobar-kobar membela Islam serta menyebarkan agama Allah SWT di muka bumi ini.

6.1.1 Peristiwa Hijrah ke Madinah

Peristiwa Hijrah Nabi Muhammad SAW ke Madinah merupakan peristiwa sejarah yang amat penting dalam sejarah perjuangan umat Islam bagi menegakkan kalimah Allah SWT di muka bumi ini. Penderitaan dan penyeksaan yang ditanggung oleh Baginda SAW, para sahabat dan umat Islam di Mekah mendorong penghijrahan itu dilakukan. Tambahan pula selepas mendapat perintah daripada Allah. Sayidina Abu Bakar RA memainkan peranan penting dalam peristiwa Hijrah. Abu Bakar RA merupakan individu yang menemani Nabi Muhammad SAW sewaktu berlakunya pengepungan di rumah Baginda SAW yang dilakukan oleh pemuda-pemuda kafir Quraisy dengan tujuan untuk membunuh Baginda SAW.

Mereka berharap dapat membunuh Baginda SAW ketika Baginda SAW keluar dari rumahnya. Rancangan jahat kaum kafir Quraisy itu diberitahu Allah SWT kepada Rasul-Nya dan memerintahkan supaya berhijrah ke Yathrib. Selepas orang kafir Quraisy mengetahui Nabi SAW dan Abu Bakar RA telah tiada dan sedang dalam perjalanan menuju ke Yathrib mereka mengeluarkan tawaran hadiah seratus ekor unta kepada sesiapa sahaja yang berjaya menangkap Nabi Muhammad SAW hidup ataupun mati. Akhirnya mereka mengetahui juga Baginda SAW dan Abu Bakar RA bersembunyi di Gua Thur. Ada di antara mereka yang sampai ke gua itu, tetapi tidak menemui Nabi Muhammad SAW dan Abu Bakar RA.

Beliau berasa cemas dan bimbang akan keselamatan Nabi Muhammad SAW apabila orang-orang kafir Quraisy itu tiba di pintu gua Thur. Beliau merasakan perlu untuk mempertahankan Baginda SAW dengan seluruh jiwa raganya. Setelah gerakan kaum kafir Quraisy mencari Rasulullah SAW berhenti dan mereka menyangka Baginda SAW telah sampai ke Madinah,

maka keluarlah Baginda SAW berdua dari gua Thur. Pada akhirnya mereka pun tiba di Quba. Baginda SAW berada di Quba selama 4 hari dan di sutilah Baginda SAW membina masjid yang pertama dalam Islam. Mereka memasuki Madinah pada 12 Rabiulawal tahun 1 Hijrah.

6.1.2 Menyertai Peperangan Bersama Nabi Muhammad SAW

Sayidina Abu Bakar RA selalu mengikut Baginda SAW bertempur dalam segala peperangan semasa hayatnya seluruh hidupnya disumbangkan dan dikorbankan untuk membela Nabi Muhammad SAW dalam menegakkan agama Allah SWT yang Maha Suci. Beliau telah bertempur dengan gagah berani di bawah kibaran panji-panji kebenaran Rasulullah SAW.

Dalam masalah tawanan peperangan Badar, Baginda SAW memilih pandangan Abu Bakar RA yang cenderung tawanan dibiarkan hidup dengan harapan mereka akan menganut agama Islam. Ia juga boleh menghindarkan kemarahan orang kafir Quraisy yang akan berdendam dan bertindak balas sekiranya tawanan dibunuh. Mulai saat itulah Abu Bakar RA selalu mengikuti Rasulullah SAW dalam segala pertempuran selama berada di Madinah dan mendampingi Rasulullah SAW dalam perjuangan. Maka amat sesuai dengan kedudukannya sebagai sahabat yang paling rapat dan dipercayai oleh Baginda SAW.

6.1.3 Sikap Dermawan

Beliau adalah antara orang yang terawal memeluk Islam dan menjadi seorang sahabat yang paling disayangi oleh Baginda SAW. Sebelum memeluk Islam Sayidina Abu Bakar RA memang terkenal sebagai seorang bangsawan Arab yang kaya lagi dihormati oleh masyarakat.

Setelah memeluk Islam beliau merupakan tokoh Islam yang utama berperanan memperkuatkan perkembangan dakwah Islam di peringkat awal kerana umat Islam majoritinya lemah dan miskin. Beliau mengorbankan seluruh harta bendanya bagi kepentingan agama Islam. Dalam kalangan para sahabat beliau tergolong orang yang paling murah hati dan paling dermawan. Sebagaimana beliau menyerahkan dirinya dalam perang *fi sabilillah*, beliau juga menyerahkan dirinya untuk menangkis hal-hal yang tidak disenangi atau menjerumuskan kaum muslimin dalam keadaan bahaya.

Beliau tidak kedekut dengan hartanya bahkan kebanyakannya hartanya didermakan untuk perjuangan jihad di jalan Allah SWT. Demi perkembangan Islam, beliau menyumbangkan wang sebanyak 40,000 dirham kerana memperjuangkan agama Allah dengan penuh rasa ikhlas. Bantuan kewangan Abu Bakar RA itu dicurahkan melalui cara yang pelbagai seperti membeli hamba abdi yang telah memeluk Islam dan diseksa oleh tuannya. Jumlah hamba abdi yang telah dibelinya ada tujuh orang. Antaranya Bilal bin Rabbah RA dan Amir bin Fahirah RA. Selain itu, beliau meneruskan bantuannya untuk membantu kaum Muslimin yang fakir miskin, juga membantu dalam menyediakan kelengkapan angkatan perang dan menjamu para tetamu serta melakukan kerja amal sosial yang lain.

Dalam perang Tabuk, Rasulullah SAW telah meminta kepada kaum Muslimin agar mengorbankan hartanya di jalan Allah SWT lalu datanglah Sayidina Abu Bakar RA membawa kesemua harta bendanya dan meletakkannya di antara kedua tangan Rasulullah SAW. Demikianlah kehebatan jiwa Abu Bakar as-Siddiq RA sebagai contoh kemurahan hati yang tiada bandingannya di dunia sehingga hari ini. Wajar menjadi contoh dan teladan dalam memperjuangkan Islam.

Perang Tabuk merupakan peperangan terakhir yang disertai Rasulullah SAW sebelum Baginda SAW wafat. Peperangan ini berlaku pada tahun ke-9 hijrah, di mana Rasulullah SAW menerima banyak kunjungan tetamu daripada kabilah-kabilah Arab yang datang ke Madinah untuk menyatakan keislaman mereka. Namun sumbangan Abu Bakar RA mengorbankan seluruh hartanya untuk tujuan persiapan peperangan Tabuk ini tetap kekal abadi dalam lipatan sejarah perjuangan Islam dalam menegakkan kalimah Allah SWT.

6.1.4 Calon Pengganti Rasulullah SAW

Keistimewaan Abu Bakar RA begitu banyak semasa hayatnya dan ikhlas sepenuhnya terhadap Nabi Muhammad SAW serta kaum Muslimin. Majoriti Para Sahabat RA secara ijmak mengakui bahawa Abu Bakar as-Siddiq RA adalah orang yang paling layak menjadi pengganti Baginda SAW begitu juga pandangan yang dipegang oleh Ahli Sunah Wal Jamah. Liku-liku hidupnya menunjukkan Khalifah Abu Bakar RA adalah orang yang utama mengatasi dan mendahului sahabat-sahabatnya dalam semua hal, baik urusan yang bersangkut ibadat atau perjuangan menegakkan syiar Islam di muka bumi ini. Sejarah perjuangan hidupnya di masa silam menjadi teladan kepada umat Islam masa kini.

Tidak ada suatu hari yang dilalui oleh Abu Bakar RA tanpa mengerjakan seruan untuk berbuat baik berupa amal kebaikan, mencurahkan bakti dengan rasa kasih sayang sama ada diminta atau tidak. Dalam hijrah ke Madinah bersama Nabi SAW, beliau membawa seluruh harta kekayaannya kerana lebih mengutamakan kepentingan agama daripada kepentingan isteri dan anak-anaknya. Tidak ada satu tugas pun yang dilakukan oleh Abu Bakar RA dalam menunaikan hak-hak dan kewajipan-kewajipan agamanya, melainkan tugas itu menunjukkan kepada sifatnya yang mewarnai keseluruhan kehidupan mengikut ajaran Islam,

mencontohi Rasulullah SAW dan beliau selalu berhati-hati dalam setiap perkara yang mungkin disegerakan dan mungkin ditangguhkan. Begitulah keutamaan Abu Bakar RA dalam dakwah Islam dan aktiviti kebajikan. Beliau pengikut setia yang pertama dan penyambut Islam yang pertama. Sumbangan dan jasa Abu Bakar RA harum mewangi menghiasi persada alam hingga ke akhir zaman.

6.1.5 Keberanian Sayidina Abu Bakar As-Siddiq RA

Keberanian Abu Bakar RA dikatakan sepadan dalam medan perang, berhujah, menepati janji dan setia. Ketika beliau telah memeluk Islam dengan berani mengatakan keislamannya dan mengerjakan solat serta berdoa secara terang-terangan tanpa mempedulikan apa yang akan menimpanya.

Ketika perang diwajibkan ke atas umat Islam, beliau menjadi tentera yang paling dekat dengan Rasulullah SAW bertujuan melindungi Baginda SAW setiap ancaman, kesulitan ataupun bahaya. Dalam sebahagian pertempuran, terdapat segelintir tentera yang berundur, namun beliau tidak pernah berundur walau sesulit dan gentingnya keadaan.

Ketika berada dalam situasi cemas, Abu Bakar RA tidak berganjak dan kekal berada di barisan paling hadapan. Sifat keberanian beliau terserlah dengan menjadikan Masjidil Haram sebagai tempat solat dan membaca al-Quran, iaitu berhampiran jalan yang dilalui orang sehingga mereka mendengar bacaannya. Kaum Musyrikin mengancamnya dan beliau tidak takut pada ancaman mereka. Di samping keberanian, kebenaran dan kesempurnaan akhlaknya, Abu Bakar RA mempunyai kecerdasan akal melebihi kecerdasan para pembesar Quraisy di zamannya.

6.1.6 Sayidina Abu Bakar As-Siddiq RA Khalifah Pertama

Persetujuan pelantikan Sayidina Abu Bakar RA menjadi pemimpin pertama umat Islam selepas kewafatan Rasulullah SAW berdasarkan kepada beberapa faktor yang tidak ada pada sahabat-sahabat yang lain. Kewibawaannya sebagai seorang pemimpin antaranya, kepetahan berhujah, pelaksanaan amal kebajikan yang dilakukan, ahli keluarganya yang dihormati dan keperibadian yang disegani. Ketokohan beliau sebagai pemimpin yang agung yang memastikan Islam bersinar terus-menerus menempuh zaman-berzaman dan kekal hingga kini.

Seperti yang diceritakan sebelum ini, selepas terjadi perdebatan yang hangat antara golongan Ansar dan Muhajirin dalam soal pemilihan khalifah yang merunsingkan keadaan pada ketika itu, Abu Bakar RA telah muncul sebagai khalifah pertama pilihan Muslimin. Beliaulah pemimpin gagah yang menjadi pilihan umat Islam untuk melanjutkan perjuangan yang telah ditinggalkan oleh Rasulullah SAW untuk mengembangkan syiar Islam dan memimpin umat ke jalan benar. Sayidina Abu Bakar RA dianggap sahabat yang paling layak untuk menjadi khalifah yang pertama setelah wafatnya Rasulullah SAW bergantung kepada beberapa faktor iaitu Abu Bakar RA adalah seorang sahabat yang paling akrab dengan Rasulullah SAW dibandingkan dengan sahabat-sahabat lain. Beliau juga adalah lelaki dewasa pertama yang memeluk Islam di hadapan Baginda SAW.

Beliau mendampingi Baginda SAW dalam segenap perkara untuk menyebarkan agama Islam. Beliau turut bersama Nabi SAW dalam setiap peperangan untuk melawan musuh Islam dan menegakkan syiar Islam. Sayidina Abu Bakar RA selalu bersama Rasulullah SAW dalam perjalanan dari Mekah ke Madinah yang penuh bahaya. Beliau orang pertama mempercayai peristiwa

Israk Mikraj Rasulullah SAW, apabila diberitahu kepada umum, sedangkan orang ramai masih meragui kebenarannya pada ketika itu. Kewibawaan Sayidina Abu Bakar RA juga menjadi sebab beliau layak sebagai khalifah pertama dalam senarai *Khulafa ar-Rasyidin*. Beliau berasal daripada keturunan yang mulia, berhemah tinggi, mempunyai peribadi yang mulia, dan bijaksana lagi dipercayai sehingga Nabi Muhammad SAW sendiri yang menggelarkan Sayidina Abu Bakar as-Siddiq RA yang dipercayai.

Sifat dermawan dan murah hati yang perlu kepada seorang pemimpin ada pada diri Sayidina Abu Bakar RA. Peribadinya sendiri adalah menjadi faktor penting. Beliau seorang yang berpendirian tegas.

Sayidina Abu Bakar RA menjadi khalifah yang pertama pada tahun 632 M. Ketika Rasulullah SAW sedang sakit dan saat menjelang ajalnya, Abu Bakar RA telah dipilih oleh Rasulullah SAW untuk menjadi imam di dalam solat menggantikan Baginda SAW, banyak yang menganggap ini sebagai tanda bahawa Abu Bakar RA merupakan individu yang paling layak menggantikan tempat Baginda SAW bagi memimpin umat Islam. Setelah kewafatan Rasulullah SAW, tiga perjumpaan telah dilakukan dalam kalangan para pemimpin kaum Ansar dan Muhajirin di Madinah. Akhirnya Sayidina Abu Bakar RA dipilih sebagai pemimpin baru umat Islam ataupun khalifah Islam. Peristiwa perlantikan Sayidina Abu Bakar RA ini membuktikan semangat perpaduan yang ditunjukkan oleh umat Islam.

Sumbangan Abu Bakar RA dilihat sangat penting sebagai ketua pentadbiran di Madinah setelah dilantik sebagai khalifah yang pertama. Beliau juga merupakan pakar rujuk bagi menyelesaikan permasalahan berkait hukum dan keadilan. Pemerintahan beliau yang singkat selama dua tahun, memfokuskan dalam memerangi golongan murtad yang enggan membayar zakat yang

dikenali sebagai peperangan Riddah. Khalifah Abu Bakar RA juga menentang individu-individu yang mengakui nabi seperti Musailamah al-Kazzab di Yamamah, Sajah al-Harith, Tulaiyah al-Asadi dan al-Aswad al-Ansi di Yaman.

Peperangan menentang golongan murtad ini menyebabkan ramai penghafal al-Quran gugur syahid. Hal ini menimbulkan keimbangan terhadap terhapusnya al-Quran. Dengan nasihat dan cadangan daripada Sayidina Umar al-Khattab RA, khalifah Abu Bakar RA telah berusaha mengumpul dan menulis semula ayat-ayat al-Quran daripada simpanan para sahabat. Jawatankuasa ini diketuai oleh Zaid bin Thabit RA. Selain itu, khalifah Abu Bakar RA juga menghantar wakil dalam usaha pembukaan kota bertujuan meluaskan empayar Islam khususnya di wilayah Rom dan Parsi.

6.2 Sayidina Umar al-Khattab RA

“Umar al-Faruq” demikian gelaran terhadap Sayidina Umar al-Khattab. Al-Faruq bermaksud membezakan hak dengan yang bathil. Nama penuhnya Umar bin Khattab bin Naufal bin Abdul Uzaz bin Ribah bin Abdullah bin Qurat bin Zurah bin Ali bin Kaab bin Luway bin Fihir bin Malik. Salasilah keturunannya bersambung keturunan dengan salasilah keturunan Rasulullah SAW pada moyang mereka, Kaab, iaitu keturunan yang ketujuh daripada kerabat Nabi Muhammad SAW

Sayidina Umar al-Khattab RA dilahirkan pada tahun 584 M di Kota Mekah. Ibunya pula bernama Hantamah binti Hisyam bin al-Mughirah bin Abdullah bin Umar bin Makhzum. Bani Makhzum merupakan satu kaum yang besar dalam kabilah Quraisy. Semasa zaman Jahiliah, ia telah banyak melahirkan pemimpin-pemimpin yang hebat. Mereka terkenal dengan bilangan yang ramai dalam kepimpinan, masyhur dengan keberanian yang tiada tara, kuat dan keras sehingga kaum Quraisy menyerahkan tugas penjagaan tali gembalaan dan

khemah-khemah kepada mereka. Sebelum keislaman, tugas ini berada di tangan Khalid bin al-Walid RA.

Ramai daripada kalangan kabilah Quraisy yang menggalakkan ahlinya untuk membentuk hubungan kekeluargaan dengan Bani Makhzum demi melahirkan keturunan yang kuat dan berani. Oleh itu, al-Khattab bin Nufail telah mengahwini Hantamah binti Hisyam yang akhirnya telah melahirkan Sayidina Umar bin al-Khattab RA. Beliau mewarisi kekuatan dan keberanian dari Bani Makhzum, keras hati dan kasar dari bapanya al-Khattab dan kasih sayang dari Bani Adi. Ini adalah sifat yang jelas terserlah di dalam dirinya sewaktu dalam keadaan jahiliah. Sayidina Umar al-Khattab RA dilahirkan 42 tahun sebelum Hijrah.

Sewaktu kecilnya, Sayidina Umar al-Khattab RA menggembala kambing. Apabila usianya remaja, beliau berjinak-jinak dengan dunia perniagaan dan sering berdagang ke Syam. Selain kedudukan keluarganya yang disegani, Sayidina Umar al-Khattab RA juga dikenali sebagai pemuda Quraisy yang gagah berani. Malah, di pasar Ukkaz, beliau merupakan juara gusti yang paling perkasa. Sebelum memeluk agama Islam, Sayidina Umar al-Khattab RA amat memusuhi Rasulullah SAW. Sikapnya sama seperti Abu Jahal. Sayidina Umar al-Khattab RA menganiaya pengikut-pengikut Rasulullah tanpa belas kasihan. Malah, beliau pernah menyeksa hambanya yang bernama Labinah kerana memeluk agama Islam.

Pada peringkat awal dakwah Islam, Umar al-Khattab merupakan penghalang terbesar kepada perjuangan Rasulullah SAW. Kebencianya kepada agama Islam amatlah ketara. Beliau tidak segan silu menyeksa orang Islam dan beliau juga berpegang teguh dengan fahaman jahiliahnya. Namun begitu, Umar tidak mampu untuk menggugat pendirian mereka terhadap agama Islam.

6.2.1 Sayidina Umar Al-Khattab RA Memeluk Islam

Harapan Rasulullah SAW, agar Umar memeluk Islam diluahkan melalui doanya sebagaimana dalam hadis riwayat Imam at-Tirmizi (3681) dan Imam Ahmad (5696), daripada Abdullah Bin Umar:

اللَّهُمَّ أَعِزَّ إِلَيْكَ إِلَيْكَ الْإِسْلَامَ بِأَحَبِّ هَذِينَ الرَّجُلَيْنِ إِلَيْكَ
أَبِي جَهَنَّمٍ أَوْ يَعْمَرَ بْنَ الْحَطَّابِ قَالَ: وَكَانَ
أَحَبَّهُمَا إِلَيْهِ عُمرٌ

Bermaksud: “Ya Allah! Muliakanlah (perkuatkanlah) Islam dengan salah seorang yang lebih engkau kasih dari kedua laki-laki ini, iaitu melalui Abu Jahal (Amr bin Hisyam) atau Umar bin al-Khattab Baginda SAW bersabda: Ternyata yang lebih Allah kasih diantara keduanya adalah Umar (Umar bin al-Khattab RA)”

Allah SWT memperkenan doa Rasulullah SAW itu apabila Umar al-Khattab memeluk Islam sekitar tahun kelima sesudah Nubuwah atau 616 M. Pada awalnya, Sayidina Umar al-Khattab RA merupakan tokoh Quraisy yang keras penentangannya terhadap Islam, dan sewaktu mendengar adiknya memeluk agama Islam, beliau sangat marah kerana ia merupakan sesuatu yang amat memalukan dan bertentangan dengan pendiriannya. Dengan keadaan yang tergesa-gesa, beliau segera ke rumah Fatimah binti al-Khattab iaitu adiknya.

Umar memperlihatkan sikap keras lalu bertanya dengan suara tinggi, “ Apakah bacaan yang aku dengar tadi, yang berhenti bila aku tiba?”. “Tidak ada apa-apa yang dibaca, kamu silap, ” jawab Fatimah dan suaminya

serentak. "Tidak silap", tegas Umar. " Tidak silap juga bila aku katakan bahawa aku tahu kamu berdua sudah pun menjadi penganut agama Muhammad!". Tanpa menantikan jawapan, Umar al-Khattab menyerang iparnya dan menampar pipi adiknya, Fatimah. Selepas melihat darah mengalir menyebabkan Umar menanggung malu atas tindakannya itu.

Umar berkata kepada adiknya, aku ingin lihat apa yang dibawa oleh Muhammad. Fatimah menjawab "Wahai abangku, engkau dalam keadaan kotor kerana kesyirikanmu, ia tidak boleh dipegang kecuali oleh orang yang bersih." Setelah Umar al-Khattab membersihkan dirinya, Fatimah pun menyerahkan helaian ayat suci yang bertulis "Taha" kepadanya. Setelah membaca ayat-ayat suci tersebut, Umar al-Khattab menyuruh hamba adiknya, Khabbab membawanya ke tempat Nabi Muhammad SAW kerana beliau ingin memeluk Islam. Apabila beliau bertemu Rasulullah SAW, Umar berkata "Wahai Muhammad, aku datang untuk beriman kepada Allah, menjadi pengikutmu dan mempercayai apa sahaja yang kamu bawa dari-Nya. Sejak peristiwa pengislaman Saidina Umar al-Khattab RA, umat Islam berada dalam keadaan yang lebih selamat dan tidak gentar kerana Umar bertindak melindungi umat Islam daripada gangguan musyrikin dan sebagai perisai umat Islam yang disegani di Kota Mekah. Justeru perkembangan dakwah Islam menjadi semakin mudah.

6.2.2 Peribadi Sayidina Umar al-Khattab RA

Sayidina Umar bin al-Khattab RA ialah seorang pahlawan yang gagah berani, seorang ahli ibadat dan seorang yang disegani. Beliau terkenal kerana sifatnya yang adil, penyayang, cerdas, teguh pendirian, beriman dan selalu bersedia untuk membela Islam. Sifatnya yang mulia itu sentiasa menjadi sebutan kawan dan lawan.

Sejak zaman jahiliah lagi, beliau telah mewarisi jawatan kadi daripada kabilah ayahnya. Jika dibandingkan dengan ahli keluarganya yang lain, Sayidina Umar al-Khattab RA yang paling cerdas dalam keluarga Bani Adi. Beliau memegang jawatan sebagai wakil kaumnya untuk berunding dengan kabilah-kabilah Arab yang lain dan sering menghakimi sesuatu perbicaraan. Oleh sebab itu, beliau berjaya menyelesaikan banyak persengketaan. Sifat adil Sayidina Umar al-Khattab RA tidak mengenal pangkat, kedudukan dan hubungan kekeluargaan, walaupun anaknya sendiri yang melakukan kesalahan. Malah, hukuman juga akan dikenakan terhadap anaknya apabila mereka melakukan kesalahan.

Sayidina Umar al-Khattab RA adalah seorang yang tegas dalam menegakkan kebenaran. Beliau merupakan seorang penentang Islam yang amat kuat sebelum memeluk Islam, tetapi sejurus sesudah memeluk Islam, Sayidina Umar al-Khattab RA menjadi lebih berani dan tegas dalam memperjuangkan hak dan kebenaran Islam

6.2.3 Pelantikan Sayidina Umar Al-Khattab RA Sebagai Khalifah

Pelantikan Sayidina Umar al-Khattab RA sebagai khalifah kedua diusulkan sendiri oleh khalifah pertama Sayidina Abu Bakar al-Siddiq RA ketika beliau menghadapi saat-saat akhir hayatnya pada 21 Jamadilakhir, 13 H. Dalam proses pelantikannya, Khalifah Abu Bakar RA terlebih dahulu meninjau pendapat sebilangan para sahabat mengenai cadangannya itu. Sesudah menimbang sedalam-dalamnya dan berpuas hati di atas pendapat dan pandangan para sahabat. Maka, Khalifah Abu Bakar RA mengarah Sayidina Uthman bin Affan RA supaya menulis dan mengeluarkan watikah, yang isi kandungannya melantik Sayidina Umar al-Khattab RA sebagai khalifah untuk mengantikan tempatnya.

Khalifah Umar al-Khattab RA memberikan sumbangan yang hebat dalam menyebarkan dakwah Islam. Wilayah Islam dibahagikan kepada beberapa bahagian, beliau melantik gabenor, setiausaha dan ketua-ketua jabatan sebagai pegawai yang bertugas. Setiap tahun, para pegawai tersebut akan datang ke Mekah untuk membuat laporan. Beliau menstruktur semula ketenteraan dengan meluaskan empayar Islam dan berjaya menakluki semula Baitul Maqdis tanpa berlakunya pertumpahan darah.

Beliau juga memperkenalkan pentadbiran yang lebih baik dengan mewujudkan Baitulmal atau Jabatan Kewangan yang menguruskan kewangan secara sistematis, mewujudkan saluran pengaduan awam secara langsung sampai kepada khalifah, mewujudkan jabatan polis dan juga *hisbah* (audit). Khalifah Umar al-Khattab RA juga membentuk Majlis Syura iaitu sebuah Lembaga atau Majlis Perundungan Negara yang bertanggungjawab menentukan polisi negara yang berkaitan dengan hubungan luar dan pemerintahan negara.

Majlis Syura juga membincangkan masalah tentang politik, sosial dan keselamatan. Selain itu, beliau mengasaskan kalender Hijrah. Beliau menjadikan tahun Hijrah Rasulullah SAW ke Yathrib (Madinah) sebagai tarikh permulaan perkiraan kalender bagi umat Islam. Pengenalan kalender ini memudahkan catatan peristiwa-peristiwa yang berlaku selepasnya dan digunakan oleh umat Islam sehingga kini.

6.3 Sayidina Uthman Bin Affan RA

Nama penuh beliau ialah Uthman bin Affan bin Abi al-Aas bin Umayyah bin Abu Syam bin Abdi Manaf, keturunan Bani Umayyah, satu cabang daripada kabilah Quraisy. Keturunan beliau adalah bersambung dengan keturunan Nabi Muhammad SAW. Beliau memperoleh gelaran "Zun

"Nurain" yang ertiannya yang memiliki dua cahaya. Sebabnya ialah kerana Rasulullah SAW telah mengahwinkannya dengan dua orang puterinya iaitu yang pertama kali dengan Rugayah RA dan sesudah wafatnya semasa Perang Badar, maka Rasulullah SAW telah mengahwinkannya pula dengan Kalthum RA.

Sayidina Uthman bin Affan RA lahir kira-kira enam tahun selepas hari kelahiran Nabi Muhammad SAW. Nama ayahnya ialah Affan, sedangkan ibunya bernama Arwah. Neneknya bernama Baizah, anak daripada Abdul Muthalib. Ini bermakna nenek Sayidina Uthman bin Affan RA adalah ibu saudara kepada Nabi Muhammad SAW. Sayidina Uthman bin Affan RA termasuk suku Quraisy cabang Umayyah.

Orang ramai menganggap bahawa Bani Umayyah sama dengan Bani Hasyim. Ketika Sayidina Uthman bin Affan RA dewasa dia menjadi saudagar kain. Perdagangan kain ini membuatkan Sayidina Uthman bin Affan RA menjadi orang yang kaya-raya. Dengan kekayaan ini beliau selalu bersiap sedia membantu rakyat. Sayidina Uthman bin Affan RA baik hati dan sangat peramah. Beliau selalu menyediakan sejumlah wang untuk menolong orang-orang yang terlibat dalam kesukaran. Penduduk Mekah amat menghormati beliau dan menyukai Sayidina Uthman bin Affan RA dengan sepenuh hati mereka.

Sayidina Abu Bakar RA orang yang berjaya membawa Uthman kepada Islam. Oleh itu, kedua-keduanya terlibat dalam perdagangan. Beliau dan Sayidina Abu Bakar RA menjadi sahabat rapat. Setelah mendapat seruan ajaran Islam, Uthman menerimanya. Beliau adalah antara orang yang terawal memeluk agama Islam. Uthman adalah salah seorang sahabat besar dan penulis wahyu.

Demikian besarnya kecintaan dan penghormatan Rasulullah SAW terhadap Sayidina Uthman RA. Tatkala isterinya yang kedua itu pula meninggal, Rasulullah SAW telah berkata kepadanya, "Jika ada anak perempuku lagi hai

Uthman, tentu engkau ku ambil sebagai menantu. Beliau juga adalah saudagar kaya dan sangat dermawan dan beliau pernah menjadi wakil peribadi Rasulullah SAW dalam perundingan dengan orang-orang Quraisy yang mewujudkan Perdamaian Hudaibiyah dan pernah menjadi Pemangku Ketua Negara ketika Rasulullah SAW keluar berperang.

6.3.1 Kepimpinan dan Sejarah Pentadbiran

Pemerintahan Khalifah Uthman RA selama 12 tahun. Berlaku zaman keamanan dan keagungan Islam, sumbangan dan pengorbanan beliau begitu menyerlah khususnya terhadap perkembangan dakwah Islam yang menumpukan kepada pengumpulan, penyelarasan dan pembukuan mashaf dari sudut penulisan al-Quran sehingga terhasilnya Mushaf Resam Uthmani sehingga ke hari ini. Penyebaran Islam melalui penulisan Mushaf tersebut amat penting bagi perkembangan dakwah Islam secara global.

6.3.2 Pembukuan Al-Quran

Peluasan kuasa telah menyebabkan penyebaran Islam terjadi secara meluas. Apabila ramai orang yang memeluk Islam sudah tentu banyak perbezaan antara sesuatu wilayah dengan wilayah yang lain terutama dari sudut dialek. Apa yang paling ketara sekali ialah dalam masalah mereka mempelajari al-Quran. Banyak terdapatnya perbezaan bacaan yang membawa kepada salah bacaan antara satu tempat dengan tempat yang lain. Dengan keadaan ini banyak terjadinya salah faham dan saling tuduh-menuduh sesama orang Islam dalam menyatakan siapakah yang betul pembacaannya.

Oleh itu Khalifah Uthman RA telah menerbitkan satu naskhah al-Quran yang baru yang mana ia digunakan secara rasmi untuk seluruh umat Islam.

Khalifah Uthman telah menggunakan dialek Bahasa Quraisy dan yang mana al-Quran yang berbeza telah dibakar. Al-Quran inilah yang digunakan hingga ke hari ini yang mana ia dikenali dengan nama Mushaf Uthmani. Langkah-langkah ini bertujuan untuk menjamin kesucian al-Quran sebagai sumber perundangan Islam.

6.3.3 Pembesaran Masjid Nabawi

Masjid Nabawi telah menjadi padat kerana dipenuhi dengan jemaah yang semakin ramai. Oleh itu Khalifah Uthman telah membesarkan masjid tersebut dengan membeli tanah bagi meluaskan kawasan tersebut. Masjid tersebut telah diluaskan pada tahun 29 Hijrah. Beliau juga menyebarkan dakwah Islam. Khalifah Uthman sering berdakwah di penjara dan beliau berjaya mengislamkan ramai banduan. Beliau juga banyak mengajar hukum-hukum Islam kepada rakyatnya. Ramai pendakwah telah dihantar ke serata negeri bagi menyebarkan ajaran Islam.

Beliau juga telah melantik ramai tenaga pengajar hukum Islam dan juga melantik petugas khas yang membetulkan saf-saf solat. Beliau juga banyak menggunakan al-Quran dan as-Sunah dalam melaksanakan hukuman. Pada akhir tahun 34 Hijrah, pemerintahan Islam dilanda fitnah. Sasaran fitnah tersebut adalah Sayidina Uthman RA hingga mengakibatkan beliau terbunuuh pada tahun berikutnya. Fitnah yang keji datang dari Mesir berupa tuduhan-tuduhan palsu yang dibawa oleh orang-orang yang datang hendak mengerjakan umrah pada bulan Rejab.

Sayidina Ali bin Abi Thalib RA bermati-matian membela Sayidina Uthman RA dan menyangkal tuduhan mereka. Sayidina Uthman bin Affan RA syahid dibunuuh oleh pemberontak-pemberontak yang mengepung rumahnya. Pada tanggal 8 Zulhijah 35 H, Sayidina

Uthman bin Affan RA menghembuskan nafas terakhirnya sambil memeluk al-Quran yang dibacanya.

6.4 Sayidina Ali Bin Abi Talib RA

Sayidina Ali bin Abi Talib RA adalah seorang tokoh sejarah yang hidup pada abad yang ke-14. Kehebatan sejarah hidup beliau sejak 1400 tahun sehingga sekarang masih berpengaruh di dalam kehidupan kaum muslimin di seluruh dunia. Beliau adalah seorang pemimpin yang dibesarkan, diasuh dan dididik oleh penerima wahyu Allah SWT iaitu Nabi Muhammad SAW. Beliau dilahirkan di Kaabah. Dididik dan dibesarkan oleh Rasulullah SAW. Sejak berumur 8 tahun beliau telah memeluk agama Islam dan beliau juga termasuk antara pemuda pertama yang memeluk agama Islam. Beliau sentiasa berusaha untuk mencontoh tingkah laku Rasulullah SAW. Beliau juga menjadi menantu Rasulullah SAW dengan mengahwini salah seorang puteri Rasulullah SAW iaitu Fatimah RA dan akhirnya menjadi khalifah yang keempat.

Sayidina Ali Bin Abi Talib RA sangat terkenal kerana beliau seorang alim dan bijaksana. Seorang yang mengumpulkan al-Quran dan menghafal al-Quran. Seorang pahlawan perang, negarawan dan diplomat. Seorang yang berilmu dan sangat cinta ilmu pengetahuan. Seorang pemimpin yang mendahuluikan kepentingan rakyat daripada kepentingan peribadi beliau. Seorang cinta perdamaian tetapi tegas dalam melaksanakan amar makruf yang terkemuka yang telah memberi impak besar kepada umat Islam dari saat beliau bersama Rasulullah SAW sehingga kewafatan beliau.

Sayidina Ali RA digelar sebagai Abu Turab (Bapa Tanah). Gelaran ini diberikan oleh Rasulullah SAW sebagaimana disebutkan dalam sebuah hadis riwayat Imam al-Bukhari (6280), daripada Sahl bin Said RA:

- ما كانَ لِعَلَيْيِ اسْمٌ أَحَبَّ إِلَيْهِ مِنْ أَبِي تُرَابٍ، وَإِنْ كَانَ
 لَيَفْرُخُ بِهِ إِذَا دُعِيَ بِهَا، جَاءَ رَسُولُ اللَّهِ صَلَّى اللَّهُ عَلَيْهِ
 وَسَلَّمَ بَيْتَ فَاطِمَةَ عَلَيْهَا السَّلَامُ، فَلَمْ يَجِدْ عَلَيْهَا فِي
 الْبَيْتِ، فَقَالَ: أَيْنَ ابْنُ عَمِّكِ فَقَالَتْ: كَانَ يَبْيَنِي وَيَبْيَنْهُ
 شَيْءٌ، فَعَاصَبَنِي فَخَرَجَ فَلَمْ يَقُلْ عِنْدِي، فَقَالَ رَسُولُ اللَّهِ
 صَلَّى اللَّهُ عَلَيْهِ وَسَلَّمَ لِإِنْسَانٍ: انْظُرْ أَيْنَ هُوَ فَجَاءَ فَقَالَ:
 يَا رَسُولَ اللَّهِ هُوَ فِي الْمَسْجِدِ رَاقِدٌ، فَجَاءَ رَسُولُ اللَّهِ صَلَّى
 اللَّهُ عَلَيْهِ وَسَلَّمَ وَهُوَ مُضْطَجَعٌ، قَدْ سَقَطَ رِدَاؤُهُ عَنْ شِعْرِهِ
 فَأَصَابَهُ تُرَابٌ، فَجَعَلَ رَسُولُ اللَّهِ صَلَّى اللَّهُ عَلَيْهِ وَسَلَّمَ
 قَسْحَةً عَنْهُ وَهُوَ يَقُولُ: قُمْ أَبَا تُرَابٍ، قُمْ أَبَا تُرَابٍ.

Bermaksud: Tiada satu gelaran yang lebih disukai oleh Ali bin Abi Talib RA selain daripada gelaran Abu Turab. Dia akan gembira jika dia dipanmggil dengan gelaran tersebut. Telah datang Rasulullah SAW ke rumah Fatimah RA, Baginda SAW mendapati Ali bin Abi Talib RA tiada di rumah. Lantas Baginda SAW bertanya kepada Fatimah RA: "Di mana sepupumu? Lalu kata Fatimah r.a: "Antaraku dan dia ada sesuatu terjadi dan dia marah kepadaku, lalu dia keluar dan tidak memberitahuku". Lalu Rasulullah SAW berkata kepada orang (yang ditemuinya): Carilah dimana dia. Orang pun datang dan beritahu Rasulullah SAW: Dia sedang duduk di masjid . Rasulullah SAW pun datang ke masjid dan didapati Ali bin Abu Talib RA sedang berbaring di sana sambil selendangnya jatuh daripada

bahunya dan terkena tanah. Rasulullah mengambilnya dan menyapunya sambil berkata kepada Ali bin Abu Talib RA: " Bangunlah wahai Abu Turab! Bangunlah wahai Abu Turab.

6.4.1 Latar Belakang Sayidina Ali RA

Sayidina Ali RA telah dilahirkan pada tahun ke-9 sebelum kebangkitan Nabi Muhammad SAW sebagai Rasul. Beliau juga tiga puluh satu tahun lebih muda daripada Baginda SAW Rasulullah SAW. Ibu beliau bernama Fatimah binti Asad bin Hashim bin Abdul Manaf iaitu sepupu bapanya, Abu Talib. Oleh itu, asal keturunan beliau adalah anak daripada keturunan Bani Hashim yang bernama Talib, kedua bernama Aqil ketiga bernama Jaafar dan seterusnya Ali. Abang sulung beliau yang bernama Talib adalah sebaya dengan Rasulullah SAW.

Kaum Quraisy telah dilanda kesusahan pada suatu musim kemarau. Abu Talib, seorang yang pemurah dan berhati mulia turut terasa dengan musibah yang menimpa kaumnya itu. Beliau adalah di antara orang yang paling kaya di Mekah pada masa itu. Rasulullah SAW telah berkata kepada bapa saudaranya Abbas. "Wahai bapa saudaraku Abbas! Saudaramu Abu Talib ada banyak tanggungan. Apa kata kita berjumpa dengannya untuk meringankan tanggungannya itu? Saya ambil seorang, pak cik pula ambil seorang" Jawab Abbas " Ya aku setuju". Lalu mereka berdua pun pergi berjumpa dengan Abu Talib dan menyatakan hasrat bahawa mereka ingin meringankan bebanan Abu Talib dengan mengambil Ali dan Jaafar, Abu Talib bersetuju, maka tinggallah Aqil bersama Talib.

Semenjak hari itu, Sayidina Ali bin Abi Talib RA sentiasa bersama Baginda SAW sehingga dalah dibangkitkan sebagai nabi dan rasul. Sayidina Ali bin Abi Talib RA juga turut mengikut ajaran Baginda SAW. Beliau telah

mengucap dua kalimah syahadah dan membenarkannya dalam hati. Begitu juga dengan Jaafar, beliau telah tinggal bersama-sama dengan Abbas sehingga lah beliau memeluk Islam.

Setelah Sayidina Ali bin Abi Talib RA berpindah ke rumah Rasulullah SAW beliau begitu gembira dan bahagia sekali kerana kasih sayang yang diberikan oleh Rasulullah SAW kepadanya. Seharian beliau bersama Rasulullah SAW apa yang beliau lihat adalah akhlak mulia yang ditunjuk dan diajarkan kepadanya oleh Rasulullah SAW. Semua perkara yang diketahui adalah benar dan tiada perkataan yang didengarnya melainkan semuanya adalah benar belaka. Seluruh kehidupannya adalah di bawah asuhan sepupunya iaitu Rasulullah SAW sama ada dari segi pertuturan, tingkah laku, pemikiran dan segalanya.

Setelah Nabi Muhammad SAW dilantik sebagai nabi dan rasul beliau adalah remaja pertama yang percaya dan mengamalkan ajaran Baginda SAW. Tiada suatu keraguan pun yang menghantui fikiran dan sanubarinya. Beliau yakin dengan apa yang diperkatakan oleh sepupunya itu, kerana semenjak kecil lagi beliau tidak pernah mendengar perkataan dusta yang keluar dari lidahnya. Sayidina Ali bin Abi Talib RA cukup mengenali dengan adab, akhlak, keikhlasan dan peribadi Rasulullah SAW.

6.4.2 Kebijaksanaan Sayidina Ali RA

Rasulullah SAW telah menggalakkan Ali RA supaya belajar dan berlatih ilmu - ilmu perang di samping mempelajari pembacaan dan penulisan. Ternyata Ali begitu rajin dan tekun dalam belajar sehingga beliau menjadi seorang remaja yang sangat hebat sekali dalam penguasaan ilmu – ilmu tersebut. Beliau baru berumur 9 tahun pada masa itu dan tidak dibenarkan berperang. Walau bagaimanapun, ada misi lain untuk beliau. Beliau

telah ditugaskan supaya pergi ke Kaabah dan bercakap dengan mana – mana orang asing. Sekiranya kedatangan orang asing itu adalah untuk bertanyakan tentang Islam atau tentang Rasulullah SAW maka dia hendaklah menunjukkan kepada orang itu tempat kediaman Baginda SAW. Beliau telah ditugaskan demikian kerana berita tentang agama baru iaitu Islam telah mula tersebar hingga ke tempat lain. Oleh sebab itu ramailah orang yang telah datang ke Mekah untuk memastikan berita itu.

6.4.3 Perkembangan di Darul al-Arqam

Setelah bilangan orang Islam bertambah seramai 30 orang, maka adalah amat penting bagi Rasulullah SAW untuk bertemu dan memberikan nasihat kepada mereka perkara yang sepatutnya mereka lakukan untuk menghadapi tekanan atau permasalahan dengan masyarakat kafir. Melalui pertemuan tersebut mereka dapat memahami kewajipan berkomunikasi sesama muslim dan persefahaman sesama sendiri kerana dakwah Islam akan diisyiharkan secara terang – terangan. Pertemuan tersebut telah diadakan di Darul Arqam (rumah al – Arqam). Sayidina Ali RA juga turut serta di dalam pertemuan tersebut. Bapa saudara Nabi Muhammad SAW dan bapa saudara Sayidina Ali RA iaitu Hamzah bin Abdul Muttalib RA yang digelar “Singa Allah” telah memeluk Islam. Tidak lama kemudian, Umar bin al-Khattab RA pula masuk Islam.

6.4.4 Tugasan Penting Sayidina Ali RA

Dakwah Islam akhirnya telah bertukar kepada peringkat terang – terangan sehingga menjadi pengetahuan umum. Pada masa itu Sayidina Ali RA sudah pun meningkat dewasa dan menjadi seorang pemuda yang pintar dan gagah berani. Beliau mula berfikir bahawa beliau harus memainkan peranan untuk membantu Rasulullah SAW dalam misi menegakkan agama Allah.

Tambahan pula, pada masa itu isteri baginda Rasulullah SAW iaitu Khadijah RA sudah pun kembali ke rahmatullah. Selain daripada itu Abu Talib juga telah meninggal dunia. Tidak lama selepas itu, berlakulah peristiwa Israk dan Mikraj. Sayidina Ali RA pula sentiasa berlatih dan mendalami ilmu perangnya sebagai persediaan untuk menghadapi hari-hari yang bakal menjelma.

6.4.5 Peristiwa Hijrah Sayidina Ali RA

Rasulullah SAW telah memerintahkan bahawa selain Ali dan Abu Bakar RA, semua orang Islam yang lain mestilah berhijrah dan bersatu dengan saudara kaum Ansar di Yathrib agar mereka lebih kuat. Kaum muslimin terus melakukan penghijrahan dari Mekah ke Yathrib untuk bertemu dengan saudara mereka sepetimana yang disuruh oleh Rasulullah SAW sedangkan Baginda SAW sendiri masih belum ke mana-mana sebelum mendapat perintah daripada Allah SWT.

Sayidina Umar bin al-Khattab RA berjalan keluar dan berkata secara terbuka sambil mengisyitharkan penghijrahannya dan mencabar sesiapa sahaja dari kaum musyrikin yang berani tampil untuk menghalangnya. Mereka merancang untuk membunuh Rasulullah SAW dan orang-orang Islam. Allah SWT telah menghabarkan kepada Baginda SAW setiap apa yang dibincangkan oleh mereka dan telah memerintahkan Baginda SAW supaya tidak tidur di atas tilamnya pada malam itu bahkan hendaklah berhijrah ke Yathrib dengan segera.

Malam tersebut adalah malam yang dianggap penting bagi kaum kafir Quraisy untuk membunuh Rasulullah SAW. Setelah malam menjelang tiba, semua pemuda-pemuda yang ditugaskan untuk membunuh Nabi Muhammad SAW mula mengepung kediaman Baginda SAW. Mereka menunggu sampai tengah malam

sehingga Baginda SAW tidur. Apabila Baginda SAW keluar mereka akan menerpa lalu terus membunuh Baginda SAW. Rasulullah SAW menyedari perkara tersebut lalu Baginda SAW menyuruh sepupunya Sayidina Ali bin Abi Talib RA supaya tidur di atas tilam Baginda SAW dan berselimut dengan kain selimutnya sepetimana Baginda SAW tidur pada kebiasaananya.

Sayidina Ali RA ditugaskan untuk tidur di tempat Rasulullah SAW pada malam itu. Beliau sanggup mempertahankan nyawanya sendiri demi berbakti kepada Rasulullah SAW dan Islam yang tercinta. Sebelum Baginda SAW keluar, Baginda SAW sempat mengucapkan selamat tinggal kepada Sayidina Ali RA *"Kamu sekali-kali tidak akan dimusnahkan oleh sesuatu yang kamu benci"*. Inilah peranan dan pengorbanan yang telah dilakukan oleh Sayidina Ali bin Abu Talib RA pada masa itu. Walaupun tugas itu teramat berat untuk dipikul, tetapi berbekalkan keimanan yang jitu serta kasih sayangnya terhadap Rasulullah SAW dan ditambah pula dengan kata-kata perangsang dari Baginda SAW, beliau akhirnya melakukan suruhan itu dengan penuh rela dan tawakal kepada-Nya.

Apabila Baginda SAW keluar dari rumah, Baginda SAW membaca surah Yasin ayat 1-9. Setelah selesai membaca, Allah menjadikan pemuda-pemuda tersebut mengantuk dan terus tertidur dengan lena sekali. Baginda SAW segera keluar dari rumahnya dengan penuh keyakinan tanpa disedari oleh sesiapa pun. Apabila mereka terjaga, mereka cuba mengintai-intai celah dinding rumah Rasulullah SAW dan mereka nampak ada manusia sedang berbaring walhal itu adalah Sayidina Ali RA.

6.4.6 Hijrah Sayidina Ali RA Ke Madinah

Sayidina Ali pun segera memulakan hijrahnya setelah selesai melaksanakan tugas yang telah diamanahkan

oleh Rasulullah SAW Mereka berjalan siang dan malam agar cepat sampai di Madinah. Setibanya sahaja beliau di Madinah, kakinya mula membengkak dan kulitnya pula tersiat-siat, amat menyakitkan. Rasulullah SAW bersabda “*Tolong panggilkan Ali datang ke sini*”. “*Dia tidak dapat berjalan*” sapa salah seorang lelaki yang berada disitu. Baginda SAW pun pergi menemui Sayidina Ali RA lalu memeluknya sambil menangis kasihan melihat kesakitan yang dialami oleh Sayidina Ali RA itu. Baginda SAW lantas meludah di tapak tangannya dan menyapu ke dua – dua belah kaki Saydina Ali RA yang melebet itu. Ternyata kedua-dua belah kakinya telah sembuh dengan izin Allah. Rasulullah SAW telah mempersaudarakan kaum Muhajirin dan kaum Ansar supaya mereka bersatu ekoran keadaan Madinah pada masa itu tidak stabil dari segi pertahanan.

6.4.7 Menyertai Peperangan

Sayidina Ali bin Abu Talib RA juga turut menyertai peperangan bersama-sama Baginda SAW Rasulullah SAW Salah satunya adalah perang Badar, di mana Sayidina Ali bin Abu Talib RA dan Mirthad al-Ghinawi terpaksa menunggang seekor unta sahaja kerana kekurangan pengangkutan. Pada peperangan itu dikatakan dalam sebuah riwayat terdapat dua bendera iaitu putih dan hitam. Yang putih berada di tangan Sayidina Ali Bin Abi Talib RA dan yang hitam di tangan kaum Ansar.

Pada hari perang Badar itu, ketangkasan dan kekuatan Sayidina Ali RA telah terserlah dan mula diketahui umum. Sayidina Ali RA baru sahaja mencelah umur 24 tahun pada ketika itu. Beliau berjaya membunuh seramai lapan orang musyrikin dan menawan Amru bin Abu Sufian. Sayidina Ali Bin Abu Talib RA turut terlibat dengan peperangan yang lain antaranya perang Uhud, Khandaq, Fadak, Khaibar, Hunain dan Tabuk.

6.4.8 Perkahwinan Sayidina Ali RA dengan Fatimah RA

Dalam suatu perbualan di antara Sayidina Umar al-Khattab RA dan Sayidina Ali Bin Abu Talib RA, *"Umar al-Khattab RA menanyakan umur Sayidina Ali RA serta memberitahu Sayidina Ali RA bahawa dia sudah layak berkahwin"*. Sayidina Ali RA berdiam diri dan berasa serba salah untuk menjawabnya. Sayidina Umar al-Khattab RA mencadangkan agar Sayidina Ali RA melamar Fatimah RA puteri Rasulullah SAW yang sudah hampir berumur 18 tahun. Dia sememangnya gadis yang cantik serta baik akhlaknya.

Menurut Sayidina Umar al-Khattab RA, Fatimah RA anak bongsu Rasulullah banyak menderita akibat perbuatan kaum kafir Quraisy serta kehilangan ibu tersayang iaitu Siti Khadijah RA. Rasulullah SAW pernah berkata dalam kalangan penghuni syurga ialah Khadijah RA, Fatimah RA, Aishah RA dan Mariam RA. Tetapi Sayidina Ali RA menolak kerana beliau merasakan dirinya yang miskin tidak layak untuk mengahwini Fatimah RA. Setelah dipujuk oleh Sayidina Abu Bakar al-Siddiq RA, Sayidina Ali Bin Abi Talib RA pun bersetuju.

Pada suatu hari Sayidina Ali RA menghadap Nabi Muhammad SAW yang ketika itu berada di rumah Ummu Salamah RA. Sayidina Ali RA pun kemudian memberitahu hajatnya ingin melamar Fatimah RA untuk dijadikan sebagai isterinya. Rasulullah SAW senang hati mendengar permintaan Sayidina Ali RA dan bertanya kepada Sayidina Ali RA. Dalam sebuah hadis riwayat Imam An-Nasai' (3322):

قال: تَرَوْجَحْتُ فاطمَةَ رضِيَ اللَّهُ عَنْهُ، فَقُلْتُ: يَا رَسُولَ اللَّهِ، ابْنِ بَيِّنٍ، قَالَ: أَعْطِهَا شَيْئًا، قُلْتُ: مَا عِنْدِي مِنْ شَيْءٍ، قَالَ: فَأَيْنَ دِرْعُكَ الْحَطَمِيَّةُ؟ قُلْتُ: هِيَ عِنْدِي، قَالَ: فَأَعْطِهَا إِيَّاهُ.

Bermaksud: Dari Ibnu Abbas bahawa Ali radhiallahu'anhu berkata; Dahulu saat saya akan menikahi Fatimah RA, aku berkata; wahai Rasulullah, bantu aku menikahi Fatimah, beliau bersabda, "Baik, Berilah ia sesuatu", saya berkata; saya tidak memiliki sesuatu, beliau bersabda, "Dimanakah baju perisaimu yang anti rosak itu?" aku menjawab ia ada padaku, beliau bersabda, "Berikan padanya."

Menurut sebuah riwayat yang turut disanadkan kepada Sayidina Ali Bin Abi Talib RA bahawa Rasulullah SAW menyediakan tilam dan bantal yang lembut yang diperbuat daripada bulu biri-biri hasil seni beberapa orang yang mahir dalam kerja seperti ini. Perkahwinan Sayidina Ali RA dan Fatimah telah RA dilangsungkan pada tahun selepas perang Badar. Mereka dikurniakan cahaya mata pertama iaitu Hasan RA.

6.4.9 Pelantikan Sayidina Ali RA Sebagai Khalifah

Setelah kematian Khalifah Uthman bin Affan RA, Kota Madinah tidak lagi aman dan ditadbir oleh al-Ghafiqi bin Harb al-Akki. Dia adalah ketua golongan penentang yang membunuh Khalifah Uthman RA. Disebabkan itu penduduk Madinah tidak menyukainya. Orang Mesir hendak melantik Sayidina Ali bin Abi Talib RA menjadi

Khalifah, tetapi beliau menolaknya kerana mereka golongan penentang Khalifah Uthman bin Affan RA.

Pelbagai cadangan yang dibuat oleh mereka untuk melantik Khalifah antaranya ialah Talhah bin Ubaidullah RA, Zubair bin Awam RA dan Abdullah bin Umar RA iaitu anak kepada Sayidina Umar al-Khattab RA. Akhir sekali, al-Ghafiqi sendiri menemui Ammar bin Yaser RA supaya mencari sendiri pengganti Khalifah Uthman Affan RA. Penduduk Madinah berasa tertekan dengan amaran al-Ghafiqi itu. Kemudian orang Muhaajirin dan Ansar berarak ke rumah Sayidina Ali bin Abi Talib RA lalu mereka mendesaknya untuk menerima perlantikan itu. Sayidina Ali RA pun bersetuju dan menerimanya.

6.5 Pengajaran daripada Perjuangan Para Sahabat

- 1) Nabi Muhammad SAW mempunyai sahabat-sahabat karib yang rapat dan setia menemani dan mempertahankan Baginda SAW dan kaum Muslimin dalam menghadapi cabaran menyebarkan dakwah agama Islam. Para sahabat terpilih ini membantu dengan penuh ikhlas.
- 2) Sayidina Abu Bakar RA sentiasa membenarkan kata-kata Rasulullah SAW walau apa jua keadaan dan memberikan semangat motivasi dan perlindungan kepada Baginda SAW bagi menghadapi ancaman musuh.
- 3) Sayidina Umar RA merupakan individu yang terkenal dengan sifat keberanian dan merupakan perisai kepada umat Islam, tidak gentar walau sedikit kerana kecintaan terhadap memperjuangkan agama Islam dan sifat sayangnya terhadap Rasulullah SAW yang begitu tinggi.
- 4) Sayidina Uthman RA pula merupakan seorang hartawan yang dermawan sebagaimana Sayidina Abu Bakar RA yang sentiasa membantu melancarkan gerakan dakwah Baginda SAW dengan ikhlas. Pertolongan dari sudut harta amat penting memandangkan umat Islam majoritinya

dalam keadaan yang lemah dan miskin pada peringkat awal perkembangan Islam.

- 5) Saidina Ali RA merupakan seorang yang berani, cerdas, bijak serta menjadi sahabat kepercayaan Nabi SAW. Keberanian dan pengorbanannya dalam menyertai semua peperangan bersama Nabi SAW kecuali perang tabuk, kerana pada ketika itu Nabi SAW meminta dan mempercayainya dengan memberi amanah kepadanya agar menjaga kota Madinah pada ketika itu.
- 6) Semangat pengorbanan yang tinggi serta sifat cinta dan sayangnya kepada Nabi Muhammad SAW dalam menerima dan meneruskan perjuangan Nabi SAW dalam menegakkan Syiar Islam.
- 7) Kejayaan Rasulullah SAW mendidik para sahabat untuk meneruskan perjuangan Islam perlu dijadikan contoh dan model kepada umat masa kini.

BAHAGIAN 7

PENUTUP

7. PENUTUP

Semoga dengan mempelajari ilmu sirah ini kita semua dapat mengambil teladan dan contoh Nabi Muhammad SAW dengan mengetahui sirah dan petunjuknya, serta mengambil iktibar dan pengajaran daripadanya.

Mempelajari sirah Nabi Muhammad SAW bermaksud mempelajari sirah semulia-mulia manusia ini kerana Baginda SAW adalah manusia paling mulia di dunia ini. Selain dapat memahami ayat-ayat al-Quran dengan makna yang sebenar, penurunan ayat al-Quran ada perkaitannya juga dengan sirah Rasulullah SAW.

Ilmu sirah merupakan satu ilmu yang sangat luas. Ia juga menjadi sumber bagi ilmu-ilmu akidah, hukum-hakam, akhlak, pendekatan dakwah dan pelbagai lagi. Justeru sebagai seorang Islam kita perlu menjadikan sirah atau perjalanan hidup Rasulullah SAW sebagai petunjuk dan ikutan.

RUJUKAN

- Ahmad Zaki Abd Latiff & Azam Hamzah Ahmad Zaki Abd Latiff (2015), Tamadun Islam dan Tamadun Asia (TITAS), Shah Alam: Oxford Fajar Sdn Bhd.
- Akran Dhiya' al-Umuri (2010). *Shahih Sirah Nabawiyah*. (Jakarta: Pustaka as-Sunah)
- Abdul Mun'im al-Hasyimi, 2016, Indahnya Akhlak Rasulullah SAW, cet. Ke-5, Inteam Publishing
- Buku Panduan Guru Mengajar Tahun 1,2, dan 3
- Haron Din, 2003, Manusia dan Islam, Jld. 2, Dewan Bahasa dan Pustaka JAKIM (t.t), Jenis-jenis Hadis,
- Mahyuddin Yahaya & Ahmad Jelani Halimi (1997). *Sejarah Islam*. (Selangor: Penerbit Fajar Bakti Sdn Bhd).
- Mohd Asmadi Yakob & Baterah Alias (2017), Tajuk 3 : Islam dan Hubungan Etnik, Kuala Lumpur : Tech Production.
- Mohamad Zarifi Mohamad Daud (2018). *Menyantuni Ummat, Membawa Rahmat*. (Putrajaya: JAKIM).
- Mufti Wilayah Persekutuan (2018), Berinteraksi dengan As-Sunah, <https://muftiwp.gov.my/en/artikel/irsyad-al-hadis/2309-irsyad-al-hadis-siri-ke-250-berinteraksi-dengan-Sunah>
- Mustafa al-Siba'i (2015), *al-Sirah al-Nabawiyah al-Durus wa 'Ibar*, Selangor: Pustaka Salam.
- Muhammad Sa'id Ramadan Al-Buti, 1988, *Fiqh al-Sirah* 1, Dewan Pustaka Fajar
- Muhammad Husain Haekal, 1995, *Sejarah Hidup Muhammad*, Litera AntarNusa
- Razaleigh Muhamat Kawangit (Jun, 2014), Pelaksanaan Dakwah dan Politik Islam Zaman Rasulullah, Universiti Kebangsaan Malaysia.
- Rusydi Ramli Al-Jauhari, 2012, *Bibliografi Agung Rasulullah SAW*, cet.1, Mustread SDN BHD: Kuala Lumpur
- Sheikh Muhammad Yusuf, 2012, *Kisah Kehidupan Para Sahabat Rasulullah SAW*, Darul Nu'man
- Safi ul- Rahman al-Mubarakpuri, 2014, *Cahaya Abadi Riwayat Hidup Rasulullah SAW*, al-Hidayah Publication
- Zulkiple Abd. Ghani, 2009, *Sistem dan Modul Pengajaran dan Pembelajaran Saudara Muslim*, Universiti Kebangsaan Malaysia
- Dr. Mamduh al-'Arabi, 1988
- Al-Mawardi, 1996
- Zaad al-Ma'ad (3/9-10)

BUKU TEKS KELAS PENGAJIAN ISLAM PERKIM

SIRAH
TAHAP LANJUTAN

ISBN 978-967-25609-9-9



PERTUBUHAN KEBAJIKAN ISLAM MALAYSIA (PERKIM) 2021